

Luk

Luk ya girumana Tiopilas ġarone

¹ Kapore Tiopilas!* Banaga toitoi kaite a raurubu da voia nopode a tubutubuġana a girumidina. ² Taudi voia pakane matedie a kitakitana be beedie a vaivaiena a riuriuedina nama a girumidina. ³ Vutuna aubainama taugu uma voiedima è kita yaġedi da adi didimanae yà girugirumina tam aubaimma, ⁴ baninama tam sibo kuya kataie da aba awai katakataimna inam matabudi riukaua.

Jon tau babataito na kaba tubuġama

⁵ Yau giuma pakanama yai karena, inam Herod tauna Judia provins guyaunama. Inam raġandie pirisi ya miamiana isanama Sakaraias. Tauna Abia na waipirisima damnama† nopone be na visarama Elisabet tauna Eron na waipirisima damnama nopone ya tubuġana. ⁶ Sakaraias be Elisabet taudi rabuidi yawasana didimanine a mianana Mamaitua noġone, be Mamaitua na riuvavasaġama matabudi a voteyeteyedina, be nam aba tenaġa ti voia waigewana. ⁷ Be taudi nam ti natunana, baninama Elisabet tauna yai kaikaipokina, be taudi rabuidi ai rawadosina.

* **1:1:** Luk na Gospel matabuna inam leta ya girugirumina Tiopilas aubainama. † **1:5:** Inam raġandie pirisi damdima matabudi 24. Taparoro tenaġa nopone dam tenaġa a noyanoyana, be taparoro ġesaudie dam ġesaudie a noyanoyana. Dam 24 nopodie dam tenaġa Abia na damma. (1 Stori 24:10, 19)

⁸ Raḡan tenaḡa Sakaraias Jerusalemma tempol nopone‡ ya noyanoyana, baninama Abia na waipirisima damnama adi noyama na raḡanima.

⁹ Inam damnama nopone Sakaraias a vinena§ da tauna Bada na tempolma nopone e saḡa be piupiu e gabuna. ¹⁰ Naumeki da Sakaraias tempol nopone piupiu ya gabugabuna maika, banaga ḡesaudima gabure a mia kwasa, be a moimoiragina.

¹¹ Sakaraias tempol nopone piupiu ya gabugabuna maika, Bada na aneama piupiu oltanama Diane ya maḡatarana, Sakaraias kasaunama yawwane. ¹² Sakaraias anea ya kitakitana, tauna ya ḡosori be ya naira kauana.

¹³ Be anea ya riuena, “Sakaraias, nam kwa naira! Mamaitua am moiragima ya paribeena, da am visarama Elisabet gomana tauḡominama tokare e tikana, be tam inam gomeninama kwai isana Jon. ¹⁴ Inam gomeninama tam ei nuaverem be banaga toitoi tai nuaverena inam gomeninama ya tubuḡana aubainama.

¹⁵ Baninama Bada matane tauna tokare banaga dosinama e tubuḡana. Tauna tokare nam waen bo upa bagibagidima e tegodi, ibewa. Be tauna tinanama kapone da nokoi ya naḡona Arua Babau noponama e moḡavuna. ¹⁶ Tauna Israel

‡ **1:8:** Jius ḡarodie tempol inam Mamaitua na vadama, anikaba taparoro be anikaba moiragi aubainama, maika sinagog. Be tempol taunaḡa nopone a rarau puyona, nam sinagog nopone.

§ **1:9:** ‘Vine’ inam umanama: Koukou nopone yeku a biridina, be tenaḡa ḡavoḡavorina. Be aba pirisinama yeku ḡavoḡavorinama ya paḡona, naumeki tauna piupiu ya gabuna. (Wainasi)

banegidima toitoi e verauḡa munaḡedina Bada adi Mamaituama ḡarone. ¹⁷ Be tauna Bada na kedadokadokama be tauna Elaija na aruama be na wairewapanama maika e noyana. Be tauna dosi nuedima e vitaredi da adi sedama nuedima ta paḡona.** Be banaga rawarawa ḡaiḡaidima nuedima e vitaredi da Mamaitua na nuauyauyama ta kataie be yawasana didimanine ta miana. Inam yabedima matabudi e voiedi, da banaga e vokaukauedina Bada na kaba verauma aubainama.”

¹⁸ Be Sakaraias anea ya riuena, “Nemanama yà kataie bake da tam kwa riuriu kaua? Bani-nama taugu yau visarama mate kaiteka kèi rawa-dosina.” ¹⁹ Dabudine anea Sakaraias ya paribee be ya riuna, “Taugu Geibriel. Taugu Mamaitua noḡone yà midimidina, tauna ya riuporeguna da uma riunama verenama yà riuriuemna, ²⁰ be tam nam kui sumaḡeguna, aubainama yodi tam gungum kwa miana naumeki da uma yabedima matabudi adi raḡan kaue ta tubuḡana.”

²¹ Banaga yaḡoro doḡae awai rabana da Sakaraias sibo ya dobina, be taudi a nuababaḡana aba aubainama Sakaraias tempol nopone e miamia gurata. ²² Tauna doḡae ya dobidobina raḡanine, nam aba i giuena, be matairaḡa ya voiena. Dabudi banaga a kataie da tauna mataḡomine rauboni ya kitana, be Sakaraias tauna naumeki da gungum ya mianana.

²³ Naumeki da tauna na noyama taparoronama ya kovikovina, tauna ya munaḡana na vadae.

** **1:17:** Bo: Dosi nuedima e vitaredina da maika seda adi noḡotama.

²⁴ Inam kaudima muridie tauna na visarama Elisabet ya boga be semoe ya miana naumeki da nawaravi 5 a kovina. Be Elisabet ya riuna, ²⁵ “Bada na raukiviveree ya raunuatoiegu be yau tunimayağama ya kaiporena.”

Anea Yesu na kaba tubuğama ya giuena

²⁶⁻²⁷ Rağanine Elisabet na nawaravima aniwai 6-nama murine, Mamaitua anea Geibriel ya riupore da ya nağona matatapu isanama Meri ġarone, tauna Jousep mate ai ġoapaparana. Jousep tauna guyau Deivid na damma nopone. Taudi rabuidi Nasaret meagaina a mianana Galili provinsnama nopone. ²⁸ Dabudine anea ya sağa da Meri ya riuena, “Ebom tam waivima waiaiaimma, Bada ġarome.”

²⁹ Inam rağanine Meri ya nuababağana be anea aba ya giugiuena tauna nam i kataiena, be tauna yawai nuanogonoğotana da inam giudima banidima aba. ³⁰ Be anea ya riuena, “Meri nam kwa naira! Tam Mamaitua kwawai nuavaina. ³¹ Tam tokare kwa boga be gomana tauğominama kwa tikana, be inam gomeninama kwai isana Yesu. ³² Tauna tokare banaga dosinama be Mamaitua sağasağa vavasaginama natunama e tubuğana. Be Yesu guyau Deivid na dame e tubuğana aubainama Mamaitua Deivid na waiguyauma natunama Yesu e utena. ³³ Be tauna Israel ġarodie ei bada nonoğana, be na waiguyauma nam e kovi.”

³⁴ Be Meri anea yai taravirena, “Inam nemanama? Taugu tauğoma nam mayanama e pağona.”

³⁵ Be anea ya paribee be ya riuna, “Arua Babau tokare e tava ġarome be saġasaġa vavasaginama na rewapanama vagurunama e rupumna. Inam vutuna aubainama tam tokare gomana babau-nama kwa tikana, tauna Mamaitua Natunama. ³⁶ Kwa noġoti da am dame Elisabet avedi yai rawadosina be gomana tauġominama tokare e tikana. Banaga a riuna da tauna kaikaipoki be yodi Elisabet tauna kaite na nawaravima 6 a kovina, ³⁷ baninama Mamaitua aba ya riued-ina tokare matabudi ta tubuġana.” ³⁸ Be Meri ya riuna, “Taugu Bada na taunoyama, be aba kuya riueguna tokare naumeki da e tubuġana.” Naumeki da anea Meri ya gose be ya naġona.

Meri Elisabet ya vakitana

³⁹ Inam kauinama murine Meri ya midisuġu be ya naġona oyae Judia provins nopone ⁴⁰ Sakaraias na meagaie, Elisabet kitanama be waikaiwenama aubainama. ⁴¹ Be Elisabet Meri na waikaiwama ya vaivaiena raġanine, tauna kapone gomana yai dagudagu be Elisabet noponama Arua Babau ya moġavuna. ⁴² Be bonanama dosine ya riuna, “Waiwaivi nopodie tam Mamaitua yai aiaina vavasagemna, tam be votamma mate! ⁴³ Aina, taugu kamai banabanaga be aba aubainama kitaguma kuya tava? Tam Bada tinanama be. ⁴⁴ Taugu am waikaiwama è vaievaiena raġanine, kapogue gomana nuanama ya vere be ya potina. ⁴⁵ Tam Mamaitua yai aiainimna, baninama kuyai sumaġa da Bada riunama ġarome e tubuġana.”

Meri na kaisuġusuġuma sarenama

⁴⁶ Meri ya riuna,

- “Taugu Bada yà kaisuḡu
 47 be nuaguma ya verena, baninama Mamaitua tauwai yawasaniguma.
 48 Taugu waivi kavakava be yaḡoro tauna ya noḡotiguna. Be yodi da nokoi ya naḡona kimta da kimta tokare ta riuna da riukaua taugu Mamaitua yai aiainiguna,
 49 baninama Mamaitua tauna vutuna babau be wairewapana vavasaginama tauna aubaiguma yaba dosinama ya voiena.
 50 Tauna na raunuatoima kimta be kimta aitaugā tauna ta vivivivirena e utedina.
 51 Tauna nimanama wairewapanine yaba dosidima ya voiedina be banaga raurau guyaguyaudima yai daberaridina.
 52 Tauna banaga wairewapanidima adi waibadae ya biri dobigedina, be banaga wainua-toitoidima ya biri tavaitedina.
 53 Tauna banaga kanikaniguridima vere ya utedina, be banaga waimauridima nimakavekavedima ya riuporedina.
 54 Tauna na taunoyama Israel e saguda, e noḡotida be e raunuatoi nonoḡedana,
 55 maika boni Eibraham be na damma ya riuedina nama.”
 56 Meri Elisabet mate a miana nawaravi rabuiteḡa, be muriḡa ya munagana na vadae.

Jon tauwai babataito na kaba tubuḡama

- 57 Yodi Elisabet na wainatunama raḡaninama ya tavana da gomana tauḡominama ya tubuḡana.
 58 Elisabet na banagama be na damma inam varinama a vaie be matabudi nuedima ya vere

kauana, baninama Mamaitua tauna Elisabet ya raunuatoi kauena.

⁵⁹ Be gomana na raḡanima aniwai 8-nama, inam raḡanine taudi matabudi a tavana kopitom aubainama. Be taudi a ḡoēgoena da gomana sibo tamanama isane ai isana Sakaraias. ⁶⁰ Be tinanama ya riuna, “Ibewa! Tauna isanama Jon.” ⁶¹ Be taudi a riuna, “Aba aubaina? Tam am dame inam nama isanama nam ima kenakenana.” ⁶² Dabudine taudi gomana tamanama waibuae ai taravire da gomana isanama nema. ⁶³ Dabudine Sakaraias anigiruma ya ḡoena da a ute be bogane umanama ya girumana, “Tauna isanama Jon”, be taudi inam isanama a basena. ⁶⁴ Be yai raḡantenāḡe da Sakaraias ya giu mu-naḡa be Mamaitua isanama ya kaisuḡusuḡuna. ⁶⁵ Be na banagama inam kaudima a kitekitedina, taudi Mamaitua na rewapanama a base be Judia provins matabuna nopone inam yabedima banaga ai giuguedina. ⁶⁶ Banaga matabudi aitaḡa nama giudima a vaivaiedina, taudi ai nuanogonogote be a riuna, “Uma gomeninama tokare aba e tubuḡa, baninama yodi tà kitakitana da Mamaitua tauna mate.”

Sakaraias ei perovetana

⁶⁷ Be Jon tamanama Sakaraias noponama Arua Babau yai moḡavu be Mamaitua riunama yawai perovetaena.

⁶⁸ “Bada Israel Mamaituanama ya kaikai suḡusuḡuna. Tauna ya verauna na banagama kuvesidima be waiyawasanidima aubainama.

- 69 Tauna na taunoyama Deivid na dame
Tauwai yawasana wairewapaninama ya
riuporena tauda aubaidama,
- 70 maika boni Mamaitua peroveta ġarodie ya
giugiuna nama,
- 71 da tauna banaga aitau ta tuatuaġaiedana
bo dà ġaviama nimedie be tauna ei
yawasanidana.
- 72 Tauna e rarau nuatoina waġawaġadama
waġewagedima ġarodie be riuwainoġota
babaunama e noġotina
- 73 vutuna tauna tamadama Eibraham ġarone boni
ya sausaugana nama.
- 74-75 Tauna dà ġaviama adi rewapanae be ei
yawasanidana da tauda babaudama tà
tubuġa be nuadama torane be didimana
mate Mamaitua tai yaragena raġan
matabuna.
- 76 Be tam yau gomanama tam tokare Mamaitua
saġasaġa vavasāġinama na perovetama.
Baninama tam tokare kwa doka be Bada na
kedama kwa sepana.
- 77 Tam banaga kwa riuedina da Mamaitua taudi
ei yawasanidina, baninama yodi raġan ya
tavana da Mamaitua adi gewagewama e
noġota poredina.
- 78 Baninama Mamaitua na raunuatoima dosi-
nama kapoyaninama marae be ġarode
yovonama ewai karena,
- 79 da yana e yovoġena aitauġa guri na
waikupikupie ta miamiana ġarodie. Be
tauna ei dokeda be suba kedanama ei
kataidana.”

⁸⁰ Naumeki da gomana ya moraba da arue yai rewapanana. Be tauna dobu kavakavane ya miana naumeki da na raḡan kauama ya tavana, yodibe patara nopodie na noyama yai karena Israel banegidima ḡarodie.

2

Yesu na kaba tubuḡama (Mt 1:18-25)

¹ Inam raḡandie Sisa Augastas na riuma ya boru da dobu matabuna deḡo banaga ta miamiana, nama sensus ta voiena. ² Noḡone nam sensus i kenakenana, be uma raḡandie yodi sensus ai karena. Inam raḡanine Kwirinias tauna Siria provins nopone yawai primiana. ³ Vutuna aubainama banaga matabudi a munaḡana adi meagaie sensus aubaina. ⁴ Naumeki da Jousep mate tauna Nasaret meagainama Galili provins nopone ya gose be ya naḡona Betliemma, guyau Deivid na meagaie Judia provins nopone, baninama Jousep tauna Deivid na damma nopone. ⁵ Be Jousep na ḡoapaparama Meri ma bogana, taudi a naḡona sensus aubainama.

⁶ Be taudi Betliemma be gomana na kaba tubuḡama raḡaninama ya tavana, ⁷ naumeki da Meri gomana kaevounama tauḡominama ya tikana. Be barekie nam deḡo gabu i kenakenana aubainama, tauna gomana garae ya paiwi be musara adi ḡobee yai kenana.

Tauyosi be anea

⁸ Inam kupine sipu taurabedima wapue a miana be adi sipuma a kitakita watanidina.

⁹ Be Bada na aneama ġarodie ya dobi be Bada neneġarinama yai yanedi be taudi a naira kauana.

¹⁰ Dabudine anea ya riuedina, “Nam ko naira! Taugu vari verenama yà yovoyovoġena ġaromie da tokare banaga matabuna tai nuaverena,

¹¹ baninama manaka Deivid na meagaie Tauwai yawasana ya tubuġana taumi aubaimima. Tauna Bada Keriso. ¹² Taumi gomana umanama ko kitana, tauna a paiwi be musara adi ġobee e kenakenana, be inam nama ko kataiena da inam tauna.”

¹³ Be yai raġantenage da anea damnama dosinama a maġatara be inam aneana mate Mamaitua a kaisuġusuġu be a riuriuna, ¹⁴ “Kawasage be kaisuġusuġu Mamaitua ġarone ta kena, baninama tauna saġasaġa vavasaginama aubainama. Be aitauga dobie didimanaġa ta naġonaġona, Mamaitua taudi na subama e uteutedina.”

¹⁵ Raġanine anea tauyosi a gosedi be a munamunaġana marae, dabudine tauyosi adi banagama adi banagama a riuedina, “Tà naġo Betliemma be Bada ya riuriuedana ya tubuġana tà kitana.” ¹⁶ Naumeki da a naġo makamakai da Jousep, Meri be gomana musara adi ġobee ya kenakenana a banavidina.

¹⁷ Taudi inam kauinama a kitakita kovina, murine anea gomana varinama ya riuriuedina, inam dabudi ai daberarina. ¹⁸ Be banaga matabudi aitauga tauyosi adi giuma a vaivaiena, taudi a basena. ¹⁹ Be Meri tauna inam riudima nuane ya taudididi be yawai nuanoġonoġotedina. ²⁰ Naumeki da tauyosi a munaġa be Mamaitua a kawa saġe be a kaisuġuna yaba matabuna a ki-

takita be a vaivaiena aubainama. Yaba matabuna anea ya riuriuedina, nama a tubuḡana.

Yesu ai isa be a verauḡena tempol nopone

²¹ Yodi gomana na raḡanima aniwai 8-nama, inam kopitom raḡaninama ya tavana, be dabudine taudi gomana ai isana ‘Yesu’. Inam isanama anea Meri ya riu dokena, muriḡa da Meri ya bogana.

²² Raḡanine Meri gomana tauḡominama ya tikana murine, Mousis na tarawatuma e riuriuna ruvane Meri nam waigapa i naḡona Mamaitua na vadae. Ibewa da ya miana da na raḡanima 40 a kovina. Be murine Jousep be Meri Yesu a tika saḡena Jerusalemma Bada waikatainama aubainama, ²³ baninama Bada na tarawatuma umanama ya riuna, “Banaga be musara tau-tauḡomidima kayevoudima matabudi ko saḡedi be Bada ko utena.” ²⁴ Be puyo bunebune rabui bo gabubu natunatudima rabui mate a saḡedina Bada na tarawatuma ya girugirumina nama.

Simeon na kaisuḡusuḡuma sarenama

²⁵ Inam raḡanine banaga tenaḡa Jerusalemma ya miamiana, isanama Simeon. Tauna yawasana didimane ya mia be Mamaitua ya vivivirena be Arua Babau tauna noponama ya moḡavu, be Israel tauwai yawasaninama ya raberabena. ²⁶ Be Arua Babau Simeon ya riuena da tauna nam sibo ya guri naumeki da noḡone Bada na Kerisoma e kitana. ²⁷ Naumeki da Meri be Jousep gomana Yesu a saḡena tempol nopone da tarawatu aba ya riuriuedina voiedima aubainama. Inam raḡanine Arua Simeon yai doka nawena tempol

nopone. ²⁸ Be dabudine Simeon nimane gomana ya tika be Mamaitua ya kaisuḡusuḡuna be umanama ya riuna,

²⁹ “Naumeki Bada, yodi taugu am taunoyama nu-asubae yà gurina kuya riuriueguna nama,

³⁰ baninama Tauwai yawasana kuya riuriuporena, yodi matague è kitana.

³¹ Tauna dobu matabuna aubainama kuya riuporena. ³² Tauna dam matabudi e rawayanedi be tam ta kataiemna. Be mate tauna e voie da am banagama Israel ta kawa saḡedina.”

³³ Be Simeon gomana nema ya giugiu bakena, gomana na dosima inam giudima a basedina.

³⁴ Dabudine Simeon taudi yai aiainidi be gomana tinanama Meri ya riuena, “Israel banegidima toitoi adi yawasanae ta bekuna be toitoi adi yawasanae ta midisuḡuna, uma gomeninama kana taiye. Tauna Mamaitua ewai matairena aubainama banaga toitoi ta riuvirevirena ³⁵ be adi wainua noḡonoḡotama tauna ei maḡataridina. Inam voidima matabudi aubaidima tam tokare ta voiem da kwai nuaboya kauana, maika kea gangamnama kabe nuapoume i midimidi.”

³⁶ Be peroveta waivinama poranama isanama Hana, tauna mate dobudi tempol nopone. Tauna Panuel natunama be Aser na damma nopone. Hana na badama mate ai naḡi be a mianana modi ⁷³⁷ murine tauna yai kaiyababana. Be yodi tauna na suarama ⁸⁴ be kupi da suara tempol nopone ya miamiana. Be nam airaḡan tempol i gose rubuna. Tauna na noyama ya widiwidina be ya moimoiragina. ³⁸ Naumeki da Simeon gomana na

dosima mate a giugiuna raḡanine, Hana ya saḡa da Mamaitua ya kaisuḡusuḡu be banaga aitaḡa Jerusalem na Tauwai yawasanama a raberabena ḡarodie gomana na kauama ya giuedina.

A munaḡana Nasaretma

³⁹ Raḡanine Jousep be Meri yaba matabuna Bada na tarawatuma ya riuriuena a voia rovodina, murine taudi a munaḡana adi meagaie Nasaretma, Galili provins nopone. ⁴⁰ Dabudine gomana ya moraba be yai rewapanana, be nuayuyaya noponama ya moḡavu be Mamaitua na raukiviverema tauna ḡarone ya kenana.

Gomana Yesu tempol nopone

⁴¹⁻⁴² Naumeki da Yesu na suarama 12, be na dosima mate a naḡona Jerusalemma Naḡopore soinama aubainama. Inam taudi adi vaivaima aubainama, taudi modi matabuna ta naḡonaḡona Jerusalemma, inam soinama aubainama.

⁴³ Raḡanine inam soinama ya kovikovina murine, taudi naḡo munaḡa meagaie ai karena, be gomana Yesu ya mia kwasana Jerusalemma, be na dosima taudi nam ti kataiena. ⁴⁴ Taudi ai noḡotana kabe na banagama mate ti naḡonaḡo naumeki da a naḡo ravina. Be ravie gomana wanenama ai karena na dosima be na banagama ḡesaudima ḡarodie. ⁴⁵ Be taudi gomana nam ti banavina aubainama waiwanawana a munaḡana Jerusalemma.

⁴⁶ Raḡan aniwai rabuiteḡane taudi gomana tempol nopone a banavina. Yesu tauna tauwai katakatai poudie ya mia be tauna taudi mate awai giuna be yawai beavaiedina.

47 Be banaga matabudi aitaugā gomana a vaivaiena, na kataima be na paribeama a base kauena. 48 Raḡanine na dosima a banavina, nuedima yai medi be tinanama ya riuenā, “Taukui, aba aubainama umanama kuya voia ḡaromaie? Tamamma rabuigu ma nuaboyamai kè wanewanemna.” 49 Be tauna ya riuedina, “Aba aubainama koya wanewanegu? Taumi sibo koya kataie da taugu Tamaḡomiguma na vadae yà miamiana.” 50 Be gomana aba ya riuriuena, taudi na giuma baninama nam ti kataiena.

51 Naumeki da tauna na dosima ya voteyeteyedi be taudi mate a naḡona Nasaretma, be tinanama inam giudima matabudi nuane ya taudididina. 52 Be Yesu tauna na nuayuyuyama be na suarama a moraba tenaḡana, be na wainuapaḡoma Mamaitua ḡarone be banaga ḡarodie mate.

3

Jon tauwai babataito na giuma (Mt 3:1-12; Mk 1:1-8; Jn 1:19-28)

1 Raḡanine Sisa Tiberius tauna na waibadae ya miana na modima 15, be inam raḡanine Pontis Paelat tauna Judia provins primianama, be Herod tauna Galili provins na guyauma be tasinama Pilip, tauna Ituraia be Trakontis adi guyauma, be Lisantias tauna Abilene guyaunama.

2 Be Hanas be Kaiyapas taudi pirisi dosidima.

Inam banegidima adi waibadama raḡanine, Jon tauna dobu kavakavane ya miamiana be Mamaitua na riuna ya yovona, Sakaraias natunama Jon ḡarone. 3 Jon ya naḡona upa Jodan

dianama matabuna nopodie be banaga ḡarodie ya rauguguya be ya riuriuna, “Ami gewagewama ko gosedi be ko babataito da Mamaitua ami gewagewama e noḡota poredina.”⁴ Jon yaba matabuna nema peroveta Aisaia na bukae ya girugirumidina, nama ya voiedina. Peroveta Aisaia umanama ya riuna,

“Banaga dobu kavakavane e yokoyokona,
 ‘Bada na kedama ko sepa, keda ko kawa didimanidina Bada na kaba verauma aubainama.

⁵ Gaugauba matabudi ko ḡuruvidi be oya matabudi debedima ko keru waiwapudina. Be yawasana barebaredima ko kawa didimanidi be keda pikepikedima ko keru yaḡoyaḡotidina.

⁶ Yodibe banaga* matabudi Mamaitua nema ei yawasana bakedina ta kitana.’ ”

⁷ Banaga ḡumnama a dobina Jon ḡarone babataito aubainama, be tauna ya riuedina, “Taumi maika mota sarama natunatudima! Taumi aitu ami wainua noḡonoḡotama ya voie da Mamaitua na kovoḡama ko naḡo pore, wa?”⁸ Noḡone ko munaḡa da ami yawasanama ko vitaredi be yawasana banidima veredima koi maḡataridi da banaga ta kitedina, be nam ko noḡota munaḡemi be ko riuna, “Tauda Eibraham natunatumama aubainama ḡarode nam tokare gewagewa aba e tubuḡa.’ Yā riuriuemina da Mamaitua sibo i ḡoena, tokare teneteneḡinama kaua yekudie seda yai tubuḡidina Eibraham aubainama.”⁹ Bada tamiyoko kaite kai bogane ya boruna, be ai kaiḡa

* **3:6:** Bo: Banaga be musara

nam banidima veredi matabudi e taraḡa poraḡa be e gabugorudina.”

¹⁰ Dabudine banaga ḡumnama a riuna, “Yodi aba tà voie?” ¹¹ Be Jon ya paribeedina, “Aitaḡa ḡaromie kwama rabui, tenaḡa turamma nam waikwamana kwa utena, be kani mate nama ko voiena.” ¹² Teks tautaminama mate a verauna babataito aubainama be ai taravirena, “Tauwai katakatai, tauma aba ka voie?” ¹³ Be Jon ya riuedina, “Teks a riuriuemina na ruvae nama ko ragauna be nam ko tausāḡe.” ¹⁴ Be banaga iḡeiḡeridima mate ai taravirena, “Tauma nema ka voie bako?” Be tauna ya riuedina, “Nam banaga ko raukivi gewegewedi be nam ko riu waigusudi be adi waiyabama ko paḡo avedi, taumi ami maesama inam naumeki ewai nuasubemina.”

¹⁵ Dabudine banaga matabudi Tauwai yawasana a raberabena, be awai noḡotana da kabe Jon tauna vutuna Tauwai yawasana. ¹⁶ Be tauna umanama ya riuedina, “Taugu upakavakavae yàwai babataitomina be banaga murigue e veraverauna, tauna banaga dosinama be wairewapana vavasāḡinama, be taugu nam veregu da na kaḡasumama yà kaipore. Tauna tokare Arua Babaue be kaie ei babataitomina. ¹⁷ Tauna banaga vere be gewagewa e vinevinedina maika raisi. Raisu tauna e tutu, be sive nopone e ḡini be sive mui e suve be ḡavoe e dobidobina be baninama ḡavoe e dobidobina. Muriḡa tauna banidima e ragaragaudina, be muinama kai karakaratine e gabu gorudi be ta karakara nonoḡana.” ¹⁸ Be giu ḡesaudima mate Jon na rauguguyae banaga ya

sagudi da adi yawasanama a vitaredina. Nama tauna riu verenama ya rauguguyena.

(Mt 14:3-5; Mk 6:17-20)

¹⁹ Jon patara nopodie guyau Herod ya riuvirevirena, baninama tasinama na visarama Herodias ya kwayana be na gewagewama ġesaudima mate aubainama. ²⁰ Vutuna aubainama Herod Jon dibure ya boru be you, na gewagewama ya taipotona.

Yesu na babataitoma raġaninama

(Mt 3:13-17; Mk 1:9-11; Jn 1:32-34)

²¹ Muriġa da Herod Jon dibure ya boruna, noġone Jon banaga matabudi yai babataito rovodi be Yesu mate yai babataitona. Be Yesu ya moimoiragina raġanine, mara ya nuaporaġa ²² be Arua Babau ya yovona Yesu ġarone maika kiu gabubu. Be marae bona ya dobina, “Tam taugu natuguma nuaguma kwa paġopaġona, be taugu yawai nuaverena tam ġarome.”

Yesu tamanama reresinama

(Mt 1:1-17)

²³ Yesu tauna na suarama 30 be patara nopodie na noyama yai karena. Banaga ai noġotana Yesu kabe Jousep natuna, be Jousep tauna Eli natunama, ²⁴ be Eli tauna Matat natunama, be Matat tauna Livai natunama, be Livai tauna Melki natunama, be Melki tauna Janai natunama, be Janai tauna Jousep natunama, ²⁵ be Jousep tauna Matatias natunama, be Matatias tauna Amos natunama, be Amos tauna Naum natunama, be Naum tauna Esli natunama, be Esli tauna Nagai natunama, ²⁶ be Nagai tauna Mat natunama, be Mat tauna Matatias natunama, be

Matatias tauna Simeï natunama, be Simeï tauna Josek natunama, be Josek tauna Joda natunama, ²⁷ be Joda tauna Joanan natunama, be Joanan tauna Resa natunama, be Resa tauna Serubabel natunama, be Serubabel tauna Sealtiel natunama, be Sealtiel tauna Neri natunama, ²⁸ be Neri tauna Melki natunama, be Melki tauna Adi natunama, be Adi tauna Kosam natunama, be Kosam tauna Elmadam natunama, be Elmadam tauna Er natunama, ²⁹ be Er tauna Josua natunama, be Josua tauna Elieser natunama, be Elieser tauna Jorim natunama, be Jorim tauna Matat natunama, be Matat tauna Livai natunama, ³⁰ be Livai tauna Simeon natunama, be Simeon tauna Juda natunama, be Juda tauna Jousep natunama, be Jousep tauna Jonam natunama, be Jonam tauna Elaiakim natunama, ³¹ be Elaiakim tauna Melea natunama, be Melea tauna Mena natunama, be Mena tauna Matata natunama, be Matata tauna Natan natunama, be Natan tauna Deivid natunama, ³² be Deivid tauna Jese natunama, be Jese tauna Obed natunama, be Obed tauna Boas natunama, be Boas tauna Salmon natunama, be Salmon tauna Nason natunama, ³³ be Nason tauna Aminadab natunama, be Aminadab tauna Admin natunama, be Admin tauna Arni natunama, be Arni tauna Ebron natunama, be Ebron tauna Peres natunama, be Peres tauna Juda natunama, ³⁴ be Juda tauna Jeikob natunama, be Jeikob tauna Aisik natunama, be Aisik tauna Eibraham natunama, be Eibraham tauna Tara natunama, be Tara tauna Nahor natunama, ³⁵ be Nahor tauna Seruk natunama, be Seruk tauna Ragu natunama, be Ragu tauna Palek natunama,

be Palek tauna Eber natunama, be Eber tauna Sala natunama, ³⁶ be Sala tauna Kainam natunama, be Kainam tauna Arpaksad natunama, be Arpaksad tauna Sem natunama, be Sem tauna Noa natunama, be Noa tauna Lamek natunama, ³⁷ be Lamek tauna Metusala natunama, be Metusala tauna Inok natunama, be Inok tauna Jaret natunama, be Jaret tauna Malaleel natunama, be Malaleel tauna Kainan natunama, ³⁸ be Kainan tauna Enos natunama, be Enos tauna Set natunama, be Set tauna Adam natunama, be Adam tauna Mamaitua natunama.

4

Seitan Yesu ya raurubuna (Mt 4:1-11; Mk 1:12-13)

¹ Yesu Arua Babau noponama ya moğavu be Jodan ya gose porena. Arua tauna yai doke be a nağona dobu kavakavane na rağanima 40. ² Inam dabudine Diaboro Yesu ya raurubuna.

Inam rağandie Yesu tauna nam aiyaba i kani rubuna, naumeki da rağan 40 a kovikovina, Yesu tauna kani ya karatina. ³ Be Diaboro Yesu ya riuena, “Değoda tam Mamaitua Natunama, naumeki da uma yekunama kwa riue da ei rawaburedi.” ⁴ Be Yesu ya paribee be ya riuna, “Girugiruminama poranama umanama ya riuna, ‘Banaga nam buredi gomae e mia.’ ”

⁵ Dabudine Diaboro yai doka nawena oya daudaunama debane, be dobu matabuna na waiguyauma yai kataina. ⁶ Be Diaboro Yesu ya riuena, “Uma rewapanidima be uma yabedima waimatakanikanidima matabudi Mamaitua

taugu ya uteguna. Vutuna aubainama aitau yà gōeḡoena nama yà utena. ⁷ Be deḡoda tam taugu kwa rauduneeguna, inam yabedima matabudi tam yà utemna.” ⁸ Be Yesu ya paribee be ya riuna, “Girugiruminama poranama umanama ya riuna, ‘Bada, am Mamaituama taunaḡa kwa raudunee, be ḡarone kwa noyana.’ ”

⁹ Dabudine Diaboro Yesu yai doka nawena Jerusalemma tempol daudaunama debane, be ya riuena, “Deḡoda tam riukaua Mamaitua Natunama, naumeki da uma dobudine kwa potina, ¹⁰ baninama girugiruminama poranama umanama ya riuna,

‘Mamaitua na aneama e riuporedi da tam ta rabemna.

¹¹ Be nimedie ta kaisuḡum da nam yekue kaḡamma kwai tutu.’ ”

¹² Be Yesu ya paribee, “Girugiruminama poranama mate umanama ya riuna, ‘Bada, am Mamaituama nam kwa raurubu.’ ”

¹³ Raḡanine Diaboro na raurubuma ya kovikovina, naumeki da tauna Yesu ya taugosena raḡan ḡaubonaḡa.

Yesu Galili provins nopone na noyama yai karena

(Mt 4:12-17; Mk 1:14-15)

¹⁴ Arua Babau na wairewapanae Yesu ya munaḡana Galili provins nopone, be banaga matabudi inam dabudi tauna a giugiuena. ¹⁵ Be tauna taudi sinagog nopone yai katakataidi be taudi tauna isanama a kaisuḡusuḡuna.

Yesu Nasaretma a tuaḡaiena
(Mt 13:53-58; Mk 6:1-6)

¹⁶ Be Yesu ya naḡona Nasaretma deḡo ya moramorabe. Be Sabat raḡanine ya naḡona sinagog nopone maika nema Sabat matabuna ya voivoiana nama. Be tauna ya midisuḡu da girugiruminama sievinama aubainama. ¹⁷ Peroveta Aisaia na bukama tauna a ute be ya tapa da deḡo giruma ya riuna,

¹⁸ “Bada Aruinama nopogue, baninama tauna ya vineguna da riukaua yà rarau guguyena banaga waikaruwaḡewaḡedima ḡarodie.

Be tauna ya riuporeguna da banaga panipanidima yà riuedi da ta kuvesidina. Be banaga matapotepotedima tai kita munaḡa. Taugu è yovona banaga adi banagama ta rarau kivi gewegewedina yài ḡakedina.

¹⁹ Be tauna ya riuporegu da yà giugiuna, yodi raḡan ya tavana da Bada na banagama ei yawasanidina.”

²⁰ Dabudine Yesu buka ya gudu be taunoya ya ute munaḡe da ya miana, be sinagog nopone banaga matabudi matedima Yesu ḡarone.

²¹ Dabudi Yesu giu yai kare be ya riuedina, “Manaka inam riudima koya vaivaiedina, baninama ya tubuḡana.”

²² Be banaga matabudi Yesu isanama a kaisuḡusuḡu, be taudi Yesu na giuma veredima aubainama a basena. Be taudi a riuna, “Tauna Jousep natunama! Be nemanama da umanama e giugiu?” ²³ Be Yesu ya riuedina, “Taugu è kataiena da uma riunama tokare ko riueguna, ‘Dogeta kwai yawasana munaḡem!’ Be mate

ko riueguna, ‘Tauma kè vaiem be Kapeniamma yaba kuya voivoiedina, nama uma dabudine am meagaie kwa voiedi.’ ” ²⁴ Be tauna ya riuna, “Taugu yà riuriu kauemina, peroveta na dobue banaga na giuma vaienama nam tima gōeḡoena. ²⁵ Taugu yà riukauemina, peroveta Elaija na raḡanie banaga nam ti sipisipina, baninama modi 3 ½ marakapo ya karatana. Be inam raḡanine Israel nopone kaiyababa toitoi a miamiana. ²⁶ Be Bada nam Elaija i riupore i naḡona inam kaiyababidima ḡarodie, ibewa be ya riupore ya naḡona kaiyababa ḡesau ḡarone. Inam kaiyababinama tauna Sarepama miemieninama dobu isanama Saidon nopone. ²⁷ Be peroveta Elisa na raḡanie Israel nopone banaga toitoi sida kito ragaragaudima be inam dobudine Bada nam aitau tenaḡa i yawasanina be Naeman Siriḡa tavatavanama taunaḡa yai yawasanina.”

²⁸ Sinagog nopone banaga matabudi inam riu-nama nama a vaivaiena raḡanine, taudi nuedima yai medi kauana. ²⁹ Dabudine taudi a midisuḡu da Yesu a soru dobiḡe da a nawena daki debane meagai diane. Dabudine kabe tauna dakie ta kiroḡa pore. ³⁰ Be Yesu patara nopodiḡa ya dobi be ya naḡona.

*Yesu na rewapanama yai maḡatarina
(Mk 1:21-28)*

³¹ Dabudine Yesu ya dobi ya naḡona Kapeni-am meagaina Galili provins nopone. Be Sabat raḡandie tauna banaga yawai katakataidina. ³² Be banaga na waikatakataima a basena, baninama na waikatakataima yai rewapana kauana.

³³ Be sinagog nopone banaga penama kokukokunama, tauna bonanama dosine ya yogo be ya riuna, ³⁴ “Ei! Nasaret Yesumma, tam aba ġaromaie kwa ġoeġoe? Tam kuya verauna kwa kawa gewagewamai, bo? Taugu è kataiena tam aitau. Tam Babaumma Mamaitua ġaronama.”

³⁵ Be Yesu ya riutuāġaie be ya riuna, “Kwai nuatuġu be inam baneginama kwa dobi pore!” Dabudine penama banaga ya dobi pore be ya gosena, be nam banaga i kawa gewagewana.

³⁶ Banaga matabudi a ġosoridi be adi banagama mate a giu yabayababa be a riuna, “Uma aba giudima nama? Tauna na rewapanae penama e riuedi be ta dobidobina.” ³⁷ Be inam dobumama matabuna Yesu varinama a vaiena.

*Yesu Saemon Pita rawanama yai yawasanina
(Mt 8:14-15; Mk 1:29-31)*

³⁸ Yesu tauna sinagog ya gose be ya naġona Saemon na vadae. Be inam dabudine Saemon rawanama tauna poyapoya dosinama ya paġona be taudi Yesu ai baġa da tauna e saguna.

³⁹ Dabudine tauna diane ya midi be poyapoya ya riutuāġaiena, be poyapoya visara ya gose porena. Be yai raġantenāġe da visara ya midisuġu be taudi adi kanima ya vokaukaena.

*Yesu banaga toitoi yai yawasanidina
(Mt 8:16-17; Mk 1:32-39)*

⁴⁰ Be ravi ya tavatavana raġanine, banaga toitoi adi banagama sida tabu be tabu ragara-gaudima a verauġedina Yesu ġarone, be tauna banaga tenatenaġaġa nimane ya taikonidi be yai yawasanidina. ⁴¹ Be mate penama toitoi ma

yogoyogodi banaga a dobi poredi be a riuriuna, “Tam Mamaitua Natunama!” Be Yesu taudi ya riutuagaiedina da nam ta giu, baninama taudi a kataiena da tauna Keriso. ⁴² Raḡan ya tomna da Yesu inam dobunama ya gose pore be dobu wainuatuḡune ya naḡona. Be banaga tauna a wanewanena, be a banavina raḡanine, taudi a ḡoḡoḡe da tauna nam sibo ya gose poredi. ⁴³ Be Yesu taudi ya riuedina, “Taugu meagai ḡesaudie mate yà naḡo be Mamaitua na waiguyauma yà rauguguyena. Baninama Mamaitua ya riuporeguna vutuna aubainama.” ⁴⁴ Be tauna Galili be Judia sinagog nopodiḡa ya rarau guguya naḡona.

5

Yesu na tauwai muriwatanama yokoedima yai karena

(Mt 4:18-22; Mk 1:16-20)

¹ Raḡan tenaḡa Yesu tauna Genesaretma yawawa* diane ya midimidina. Be banaga tauna a midi ḡuruvi be Mamaitua riunama a vaibeavaiena. ² Be tauna waga rabui ya kitedina gerese a midimidina, be tauwai sagida adi wagama a gosedi da adi sagidama a koḡekoḡedina. ³ Yesu Saemon na wagaе ya saḡa be yai baḡana da waga sibo ya tauriena topae, yodibe tauna ya mia yovo wagaе be banaga yai katakataidina.

⁴ Raḡanine na giuma ya kovikovina, tauna Saemon ya riuena, “Waga kwa dobiḡe topa poune be ami sagidama koi dawe dobiḡedi be iyana

* **5:1:** ‘Yawawa’ inam topa dosinama maika egasi.

ko konedi!” ⁵ Be Saemon ya paribeena, “Bada, tauma kupi daudaunama sagida kè raurubu rereḡa da nam aba ke kona rubuna, be tam am riuna aubainama da yà raurubu munaḡana.”

⁶ Raḡanine a rarau rubu munaḡana, iyana toitoi a konedi be sagida ḡaubonaḡa sibo a nuagigina.

⁷ Be taudi adi banagama waga ḡesaune a rau-mataḡuedina da taudi sibo a verau be a sagudina. Naumeki da adi banagama a verau a sagudi da iyana waga rabui ai moḡavudina, be waga ḡaubonaḡa sibo a monuna.

⁸ Be Saemon Pita uma kauinama ya kitakitana tauna tuapikane ya raupari Yesu noḡone be ya riuna, “Bada, kwa gosegu be ḡavoe kwa naḡo, baninama taugu banaga gewagewaguma!”

⁹ Tauna nama ya giuna, baninama tauna na banagama mate a base be a nairana iyana toitoi a vunuḡana aubainama. ¹⁰ Be nama Saemon na banagama Jeims be Jon, Sebedi natunatumama. Be Yesu Saemon ya riuena, “Nam kwa naira! Yodibe nokoi ya naḡona tam banaga toitoi kwa konedina.” ¹¹ Raḡanine barabarae adi wagama a sorusoru tavaitedina, taudi yaba matabuna a goseporedi be Yesu ai muriwatanina.

Yesu tauḡoma kito paḡopaḡonamayi yawasanina

(Mt 8:1-4; Mk 1:40-45)

¹² Raḡan tenaḡa Yesu tauna meagai tenaḡa nopone ya miamiana be tauḡoma tenaḡa ya verauna tuninama kito ya moḡavuna. Inam tauḡominama Yesu ya kitakitana, tauna Yesu noḡone ya raupari be yai baḡana, “Bada, tam deḡoda kwa

gōena, naumeki da kwai yawasanigu.” ¹³ Be Yesu ya riuena, “Naumeki, taugu yā gōeḡoena, kwa yawasana!” Dabudine Yesu nimanama yai yoyo be ya taukonina. Be yai raḡantenāḡe da sida kito tauḡoma ya gosena. ¹⁴ Be Yesu inam tauḡominama ya riu vavasaḡena, “Nam aitau kwa riue. Be kwa naḡo da piriḡi ḡarone be tauna e kaiviramna. Be murine Mamaitua kwa tipana Mousis na tarawatuma e riuriuna nama. Inam kedane banaga tokare ta kitam be ta kataiena da tam kuya yawasana munaḡana.” ¹⁵ Be yaḡoro da Yesu varinama ya moraba be ya daberarana. Be banaga toitoi Yesu waibeavaienama be ei yawasanidina aubainama a tavatavana. ¹⁶ Be Yesu banaga ya gosedi be ya naḡona dobu wainu-atoitoina moiragi aubainama.

Yesu tauḡoma tuera paḡopaḡonama yai yawasanina

(Mt 9:1-8; Mk 2:1-12)

¹⁷ Raḡan tenaḡa Yesu yawai katakataka be Parisi be tarawatu tauwai katakataidima[†] taudi mate a mia be awai beavaiena. Inam banegidima meagai matabudi Galili provins be Judia provins nopodiḡa be Jerusalemḡa a verau be awai beavaiena. Be Bada na rewapanama Yesu ḡarone vutuna aubainama tauna sida yawai yawasanidina. ¹⁸ Naumeki da banaga ḡesaudima tauḡoma tuera paḡopaḡonama ratiratinama a kiroḡa verauḡe da kabe vadae ta saḡe be Yesu noḡone tai kena. ¹⁹ Be taudi nam teneteneḡina da vadae sibo a saḡa, baninama patara ya moraba kauana.

[†] **5:17:** Tarawatu tauwai katakataidima taudi nam Yesu na tauwai muriwatana.

Vutuna aubainama taudi vada debane a saḡa be vada debane gaura a voie da tauḡoma ma ratiratina ai dawē dobiḡena patara poudie Yesu noḡone. ²⁰ Raḡanine Yesu adi waisumaḡama ya kitakitana, tauna ya riuna, “Tauḡoma, am gewagewama è noḡota porena.”

²¹ Dabudine Parisi be tarawatu tauwai katakataidima umanama wainua noḡonoḡota ai karena, “Uma aitu baneginama nama ewai diboḡa, wa? Tauna e ḡoeḡoena da Mamaitua gabunama e paḡo, bo? Mamaitua taunaḡa tokare gewagewa e noḡota poredina, be nam aitu ḡesau.” ²² Be Yesu taudi adi wainua noḡonoḡotama ya kataiedina aubainama yai taraviredina, “Aba aubainama taumi inam yabedima nuemie kowai nuanonoḡotedi? ²³ Aba riunama ya tekateka, ‘Am gewagewama è noḡota porena’ bo ‘Kwa midisuḡu be kwa naḡo?’ ²⁴ Be yodi yài kataimi be ko kita da Banaga Natunama doḡue rewapana ḡarone e kenakenana da gewagewa e noḡota poredina.” Naumeki da Yesu tauḡoma tuera paḡopaḡonama ya riuna, “Yà riuriuemna, kwa midisuḡu, am gunima kwa paḡo be kwa naḡona am vadae.” ²⁵ Yai raḡantenage tauḡoma noḡodie ya midisuḡu da na gunima ya paḡo be ya naḡona na vadae, Mamaitua isanama ya kaisuḡusuḡuna. ²⁶ Dabudi banaga matabudi a base be taudi mate Mamaitua isanama a kaisuḡusuḡuna. Be matabudi a ḡosoridi be a riuna, “Manaka tauda kaua dosinama tè kitana.”

*Yesu Livai ya yokoena
(Mt 9:9-13; Mk 2:13-17)*

²⁷ Uma kauinama murine Yesu ya dobi be ya naḡonaḡo da teks tautaminama isanama Livai ya kitana. Livai tauna na kaba noyae ya mi-amiana, be Yesu tauna ya riuena, “Kwai muriwatanegu!” ²⁸ Naumeki da Livai ya midisuḡu be yaba matabuna ya gosedi be Yesu yai muriwatanena.

²⁹ Dabudine Livai na vadae soi dosinama ya voiena Yesu aubaina, be teks tautamidima toitoi be banaga ḡesaudima mate dabudine a kanikanina. ³⁰ Vutuna aubainama Parisi be tarawatu tauwai katakataidima taudi Yesu na tauwai muriwatanama a riusiḡaḡayedi be a riuna, “Aba aubainama taumi teks tautamidima be gewagewa banegidima mate ko kanikani be ko tegotego?” ³¹ Dabudine Yesu ya paribeedi be ya riuna, “Banaga yawayawasanidima taudi nam dogeta tima ḡoeḡoena, be banaga sidesidedima taudi dogeta ta ḡoeḡoena. ³² Taugu nam e yovona banaga veredima aubaidi, ibewa da banaga gewegewedima ya riuedi da adi noḡotama ta vitaredina.”

*Widina waitaraviraviranama
(Mt 9:14-17; Mk 2:18-22)*

³³ Be taudi Yesu a riuena, “Jon na tauwai muriwatanama be Parisi adi tauwai muriwatanama matabudi kana raḡanie ta widiwidina be ta moimoiragina, be tam am tauwai muriwatanama taudi ta kanikani be ta tegotego yabayababana.”

³⁴ Be Yesu ya riuedina, “Naḡivau tauḡominama‡

‡ 5:34: ‘Naḡivau tauḡominama’ inam Yesu.

taumi mate ko miamiana raḡanine, taumi nam ko voie da naḡinaḡi kadi warema ta widina. ³⁵ Be raḡan e tavana da naḡivau tauḡominama ḡavoe ta nawena, inam raḡanine taudi ta widinana.”

³⁶ Yesu uma wainasinama mate ya riuedina, “Nam aitau gara vaunama e sika be e naḡo gara poranama mate e popo tenaḡe. Be deḡoda nama sibo i voiana, gara vaunama tokare e kawa gewagewana, be gara vaunama nam gara poranama mate tai rawateḡeidi be teneteneḡina.

³⁷ Be nam aitau waen§ vaunama waen poranama kougounama nopone e ḡini. Baninama deḡoda nama e voiana, inam tokare waen vaunama kougou e surasari be waen e rauḡinina. Be kougou ta gewagewana. ³⁸ Ibewa da waen vaunama kougou vaudie ko ḡinidina. ³⁹ Be aitau waen poranama ya tegotegona, waen vaunama nam ima ḡoeḡoena, baninama tauna e riuriuna, ‘Waen poranama ya vere kauana, nam waen vaunama maika.’ ”

6

Sabat waitaraviraviranama (Mt 12:1-8; Mk 2:23-3:6)

¹ Sabat tenaḡa Yesu be na tauwai muriwatanama mate a naḡona wapue yaḡoda sipine be na tauwai muriwatanama yaḡoda a raḡaudi da a vukudi be a kanikanidina. ² Be Parisi ḡesaudima nama a kitakitana taudi a riuna, “Taumi Sabat raḡanine inam yabedima nam sibo

§ 5:37: Waen vaunama tauna ya raupuropuro kauana, vutuna aubainama tokare kougou poranama e sura sarina.

koya voivoiedi, be aba aubainama taumi yodi ko voivoiedi?” ³ Be Yesu ya paribeedi be ya riuna, “Taumi koya kataie bo ibewa da boni Deivid na banagama mate kani ya karatidi be aba a voie? ⁴ Tauna ya naḡona Mamaitua na vadama nopone be buredi Mamaitua waikatainama ya ragaudi be na banagama mate ya utedi be a kanidina. Be tarawatu e riuriu da piriisi taudiḡa inam buredinama ta kanina be nam banaga ḡoma.” ⁵ Dabudine Yesu Parisi ya riuedina, “Banaga Natunama Sabat ewai badena.”

*Yesu Sabat raḡanine banaga yai yawasanina
(Mt 12:9-14; Mk 3:1-6)*

⁶ Sabat ḡesaune Yesu ya naḡona sinagog nopone be yawai katakataina. Be tauḡoma tenaḡa dabudine mate, tauna nimanama kasaunama tuera paḡopaḡonama. ⁷ Be Parisi be tarawatu tauwai katakataidima maida a tava be keda a wanewanena da aiyabae be Yesu sibo ai wavuna. Vutuna aubainama taudi Yesu a kitakita watanina da tauna Sabat raḡanine banaga sibo yai yawasani bo ibewa, yodibe taudi sibo a samanina.

⁸ Be Yesu tauna ya kataiena da taudi aba awai nuanogonogotena, be tauna tauḡoma nimanama tuera paḡopaḡonama ya riuna, “Kwa midisuḡu be patara noḡodie kwa midi!” Dabudi tauḡoma ya midisuḡu be ya midina. ⁹ Be dabudine Yesu taudi ya riuedina, “Taugu taumi yài taraviremina, dà tarawatuma aba e riuriuedana tà voie Sabat raḡanine? Yaba veredima tà voiedi bo yaba gewegewedima tà voiedi, banaga tà yawasanidi bo tà kawa gewegewedi?” ¹⁰ Be Yesu banaga matabudi ya kita vireviredi be tauḡoma patara

noḡodie midimidinama ya riuena, “Nimamma kwai yoyo!” Be tauḡoma nama ya voiena be nimanama matabuna ya vere munaḡana. ¹¹ Be taudi nuedima yai medi kua be adi banagama mate ai giuna da aba sibo a voiena Yesu ḡarone.

Yesu apasol 12 ya vinedina
(Mt 10:1-4; Mk 3:13-19; Ap 1:13)

¹² Inam kaudima muridie raḡan ḡesaune Yesu ya saḡa ya naḡona oya debane moiragi aubainama, be Mamaitua ḡarone kupi ya moiragi raḡanina. ¹³ Be raḡanboiboi tauna na tauwai muriwatanama ya riu gogonidi da ḡarone a tavana, be taudi nopodie tautauḡoma matabudi 12 ya vinedina. Be uma banegidima 12 tauna yai isedina ‘Apasol’. ¹⁴ Umanama banegidima ya vinedina:

Saemon (yai isana ‘Pita’)
be tasinama Endru,
be Jeims,
Jon,
Pilip,
Batolomiu,
¹⁵ Metiu,
Tomas
be Jeims (tauna Alpius natunama)
be Saemon ḡesau tauna awai isana ‘Selot’,
¹⁶ be Judas (tauna Jeims natunama),
be Judas Iskariot, tauna vutuna muriḡa Yesu ya
boru dobiḡena.

Yesu yawai katakatai be banaga yawai
yawasanidina
(Mt 4:23-25)

17 Yesu na apasolma mate a yovoyovo mu-naḡana raḡanine, taudi dobu wapuwapune a midina, be tauwai muriwatana toitoi be banaga toitoi Judiḡa be Jerusalemḡa a tavana, be Taia be Saidon geresinama banegidima mate 18 a tavana Yesu vaienama be adi sidama ei yawasanidina aubainama. Be banaga aitaḡa penama kokukokudima, taudi mate yai yawasanidina. 19 Be banaga matabudi a rarau rubuna da Yesu sibo a taukonina, baninama rewapana tauna ḡarone ya dobi be banaga matabudi yawai yawasanidina.

*Wainuavere be wainuatoitoi giudima
(Mt 5:1-12)*

20 Yesu na tauwai muriwatanama ya kitedi be ya riuna,

“Taumi nuemima e verena waikaruwaḡewaḡemima, baninama Mamaitua na waiguyauma inam taumi ḡaromima.

21 Taumi nuemima e verena aitaḡa yodi kani ko gurigurina, baninama tokare ko kani siauana.

Taumi nuemima e verena aitaḡa yodi ko ḡabaḡabana, baninama tokare ko kwatevana.

22 Taumi nuemima e verena deḡoda banaga ta tuaḡaiemi, ta boru dobiḡemi, ta kunuremi be isemima ta kawa gewagewana, baninama Banaga Natunama kana taiye.

23 “Inam kaudima ta tubutubuḡana raḡanine, taumi koi nuavere be ko taukaina, baninama ami maesama dosinama marae e kenakenana.

Be inam banegidima tametamedima boni nama peroveta ġarodie a voivoiana.

24 “Ko kita kauana taumi aitaugā yodi kowai guyauna, baninama taumi ami nuasubama inam naumeki koya paġona.

25 Be taumi aitaugā yodi ko kanikani siauana, ko kita kauana, baninama taumi tokare kani e karemina.

Be aitaugā yodi ko kwatekwatevana, ko kita kauana, baninama taumi tokare koi nu-aboya be ko ġabana.

26 Ko kita kauana deġoda banaga matabudi taumi isemima ta kaikai suġuna, baninama inam banegidima tametamedima nama boni peroveta kaikaiyovudima isedima a kaikai suġusuġudina.

Am ġaviama kwai nuapaġoedina

(Mt 5:38-48; 7:12a)

27 “Be taumi aitaugā ko vaivaieguna yà riuemina, ami ġaviama nuemima e paġona. Be aitaugā ta tuatuāġaiemina, ġarodie vere ko voiena.

28 Aitaugā tawai tara tautauemina, naumeki da koi aiainidina! Be aitaugā ta raukivi gewegewemina aubaidima ko moiragina!

29 Deġoda aita nevakauamma e riġana, kwa gose da nevakauamma ġesaunama mate e riġa. Deġoda aita am rupuma e kaiporena, naumeki da am kwamama mate kwa utena!

30 Aita aba yai baġena, naumeki da kwa ute! Be aita am waiyabama e paġona, nam kwa riue be e ute munāġem.

31 Taumi aba ko ġoēgoena banaga

ġaromie sibo a voiena, taumi nama taudi ġarodie ko voiena!

³² “Banaga ġesaudima tawai nuapaġoemina, be taumi deġoda taudiġa koi nuapaġoedina, inam nam i verena, tokare nam maesa ko banavi, inam banaga gewegewedima nama adi voiana. ³³ Be banaga ġesaudima vere ġaromie ta voivoie, be taumi deġoda taudiġa vere ġarodie ko voiena, inam nam i verena, tokare nam maesa ko banavi, inam banaga gewegewedima nama adi voiana. ³⁴ Be aitaugā aba koya utedi be taumi ko noġonoġotina da tai ġare munaġemina, inam naumeki be tokare nam maesa ko banavi! Baninama inam kauinama teneginama nama gewagewa banegidima ta voivoiana.

³⁵ “Be taumi ami ġaviama sibo koyai nuapaġoedina, be yaba verediġa ġarodie ko voiedina, be banaga yaba ko utedi be nam murine ko noġonoġoti da ta ute munaġemi. Deġoda nama ko voiana, tokare ami maesama dosinama ko paġona, be taumi Mamaitua saġasaġa vavasaginama natunatumama ko tubuġana. Baninama avedi da banaga kanikanitokudima be gewegewedima be Mamaitua yaġoro e rarau kiverena ġarodie. ³⁶ Vutuna aubainama taumi ko raunuatoina maika tamemima marae e rarau nuatoina nama.

Nam koi wavu
(Mt 7:1-5)

³⁷ “Nam turamma kwai wavu da tokare Mamaitua nam tam ei wavum. Be nam turamma kwai tara tautauem, da tam tokare Mamaitua nam ei tara tautauem. Ami banagama adi gewagewama ko noġota poredina, be nama taumi tokare

ami gewagewama Mamaitua e noġota porena. ³⁸ Ko pairu be Mamaitua e pairuemina. Tauna moġamoġavunama e utemina be e nuaginiginina. Vutuna aubainama ruva dosine ko rauruvana, baninama Mamaitua inam ruvanama teneġine e ruvemina.”

³⁹ Be Yesu tauna uma wainasinama mate ya riuedina, “Tauġoma matapotapotanama banaga ġesau matapotapotanama nam ei doke. Deġoda, rabuidi dome ta bekuna. ⁴⁰ Tauwai muriwatana nam aitau e saġa gurata da na tauwai katakataima ei muri, be raġanine tauna ai katakatai be ya kovina, inam raġanine tauna na tauwai katakataima maika e tubuġana.

⁴¹ “Aba aubainama turamġa matane vunavuna kwa kitakita, be tam matame kaitupo nam kuma kitakita? ⁴² Tam matame kaitupo nam kuma kitakitana, be nema turamma kwa riu bake be matane vunavuna kwa kaipore, wa? Tam banaga kaikaiyovumma! Noġone tam matame kaitupo kwa kaipore da kwai kita kaua, yodibe turamma matane vunavuna kwa kaiporena.

Kai be votanama
(Mt 7:16-20; 12:33-35)

⁴³ “Kai verenama votanama nam gewegewedi be kai gewagewanama votanama nam veredi. ⁴⁴ Kai votane kwa kita be kwa kataie da inam kai verena bo kai gewagewana. Nam aitau tokare damaya votanama yaguru bogane e ragau. Be nam aitau tokare mabeko votanama gedara nopone e ragau. ⁴⁵ Inam kauinama teneġinama nama banaga verenama, nuanama verenama aubainama, yaba veredima

ewai tubuḡidina. Be banaga gewagewanama yaba gewegewediḡa ewai tubuḡidina. Baninama banegidima nopodima noḡota ya moḡavu da mududie ta giugiuna.

Vada taukeridima rabui
(Mt 7:24-27)

⁴⁶ “Aba aubainama ko riuriueguna, ‘Bada, Bada’, be taugu yà riuriuemina ko vaivaiena be nam koma voivoie? ⁴⁷ Deḡoda aitau e verau be riuguma e vaie be e voivoiena, taugu yài kataimi da tauna umanama: ⁴⁸ Tauna maika banaga na vadama e kerikerina. Tauna dom ya keru ya yovo gurata da yeku debane tuatua yai midirina. Be raḡanine kabaita ya dobi be upa vada ya kamoḡa rereḡe be vadanama nam i dagudaguna, baninama tuatua doḡa nopone a yovo guratana, yeku debane. ⁴⁹ Be aitau riuguma ya vaie be nam i voiena, tauna maika banaga na vadama e kerikerina, be tauna tuatua doḡa debane yai midirina. Be raḡanine kabaita vada ya kamokamoḡina, yai raḡantenage da vada doḡae ya ravuse be ya gewagewana.”

7

Yesu Rom adi torima matanama na taunoyama yai yawasanina
(Mt 8:5-13; Jn 4:43-54)

¹ Raḡanine Yesu inam banegidima ḡarodie ya giugiu rovona, naumeki da tauna ya naḡona Kapeniamma. ² Dobudine Rom banegidima iḡeiḡeridima matabudi 100 be taudi adi torima matanama na taunoyama, nuanama

taupaḡonama ya sida kauana, be ḡaubonaḡa sibo ya guri. ³ Raḡanine Rom adi torima matanama Yesu varinama ya vaivaiena, dabudine tauna Jius babadidima ya riuporedina da taudi sibo Yesu ai baḡa da ya verau be na taunoyama sibo yai yawasanina. ⁴ Be taudi Yesu ḡarone a tavatavana raḡanine, tauna ai baḡa gurate be a riuna, “Tori matanama sibo kuya saguna, tauna banaga vere kaukainama, ⁵ baninama ama banagama nuedima e paḡopaḡona, be tauna taunaḡa dà sinagogma ya kerina.” ⁶ Naumeki da Yesu taudi mate a naḡona.

Yesu tauna kaiteka vada diane ya tavatava be Rom adi torima matanama na banagama ya riuporedi da Yesu sibo umanama a riuna, “Bada nakarua, nam aubaiguma kwa noya gurata, taugu nam veregu da yau vadae kwa saḡa. ⁷ Be yau banagaḡa è riuporedina, baninama taugu nam veregu da tam ḡarome sibo è verau. Riuḡa kwa riu be yau taunoyama e yawasanana. ⁸ Taugu è kataiena tam tokare riuḡa kwa riu be e tubuḡana, baninama taugu mate waibada dibune yà miamiana be ḡarogue banaga iḡeiḡeridima ta miamiana. Be raḡanine yau tauḡarama tenaḡa yà riunena, ‘Kwa naḡo’, be tauna e naḡonaḡona. Be ḡesau yà riuna, ‘Kwa verau’, be tauna e veraverauna. Be yau taunoyama yà riuna, ‘Uma kwa voie’, be tauna e voivoiena.”

⁹ Raḡanine Yesu nama ya vaivaiena, tauna Rom adi torima matanama ya basena, be dabudine yai tautinamuri da patara awai muriwatanena ya riuedina, “Yà riuriuemina da nam airaḡan Israelma aita na waisumaḡama dosi-

nama umanama maika deḡo e banavi rubuna.”
 10 Dabudine tori matanama na banagama a munaḡana vadae, be a kita da taunoya ya yawasana munaḡana.

Kaiyababa natunama tauḡominama ya gurina be Yesu ya kawa midisuḡu munaḡena

11 Naumeki da Yesu ya mia raḡan ḡaubonaḡa be ya naḡona meagai isanama Nain, be na tauwai muriwatanama be patara dosinama mate a naḡona. 12 Raḡanine taudi meagai kedanama matane a tavatavana, dabudine patara dosinama inam meagaina kaiyababa natunama tenaḡa ḡominama gurigurinama a kiroḡi be a dobina. 13 Raḡanine Bada inam kaiyababa ya kitakitana, tauna ya raunuatoie be ya riuna, “Nam kwa ḡaba!” 14 Naumeki da Yesu maida ya tava da guri kebeninama ya taukonina, be guri taukiroḡinama dabudi a midina. Be Yesu ya riuna, “Yaraga, yà riuriuemna, kwa midisuḡu!” 15 Inam raḡanine tauḡoma gurigurinama ya midisuḡu be giu yai karena. Be Yesu inam tauḡominama tinanama ya ute munaḡena. 16 Be banaga matabudi a ḡosoridi be Mamaitua isanama a kaisuḡu be a riuna, “Peroveta dosinama poude ya maḡatarana be Mamaitua ya tavana sagudama aubainama.” 17 Be Yesu varinama ya daberarana Judia provins nopone be dianama mate.

*Yesu be Jon tauwai babataito
 (Mt 11:2-19)*

18 Jon na tauwai muriwatanama inam yabed-ima matabudi a tubutubuḡana Jon ai varina. 19 Be Jon na tauwai muriwatanama rabui ya riuedi

da a tava ġarone be ya riuporedina, da taudi Yesu sibo umanama ai taravirena, “Tam vutuna Keriso a riuriuemna kuya tava bo banaga ġesau ka rabe?” ²⁰ Raġanine Yesu ġarone a tavana taudi a riuenta, “Jon tauwai babataito ya riuporemaina da uma waitaraviranama tam kai taravirem, ‘Tam vutuna Keriso a riuriuemna kuya tava bo banaga ġesau ka rabe?’ ”

²¹ Inam raġanine Yesu tauna banaga toitoi adi sidama dosidie da ġauġaubodie yai yawasanidi be penama banaga nopodie ya tavu dobiġedina be banaga matapotepotedima ai kita munaġana.

²² Be Yesu Jon na tauwai muriwatanama ya paribeedina, “Ko munaġa be aba koya kitakitana, be koya vaivaiena, vutuna Jon koi varina: Banaga matapotepotedima ai kitana, banaga tuera ragaragaudima a noġona, banaga kito ragaragaudima a verena, banaga beapotepepedima ai beavaiana, banaga guriguridima a midisuġu munaġana, be vari verenama banaga waikaruwaġewaġedima ġarodie yà rarau guguyedina. ²³ Nuavere tauna aitau nam ġarogue ima noġonoġota bekubekuna.”

²⁴ Jon na tauwai muriwatanama a naġona, be muridie Yesu patara nopone Jon na kauama ya giuena, “Boni dobu kavakavane koya naġona Jon ġarone, be aiyaba koya noġonoġotina sibo koya kita? Banaga na noġotama gwaġanama maika vagara sive ya kwadikwadiena kitanama aubainama koya naġo, bo? ²⁵ Bo aiyaba koya noġonoġotina sibo koya kita? Banaga gara verenama kotekotenama sibo koya kita, bo? Ibewa, banaga gara veredima kotekotedima be purapura

vereveredima ḡarodie, taudi guyau na vadae miemienidima. ²⁶ Bo aiyaba koya noḡonoḡotina sibo koya kita, peroveta, bo? Ee, be yà riuriuemina, taumi peroveta dosinama koya kitana, nam maika peroveta ḡesaudima. ²⁷ Inam tauna vutuna girugiruminama porane umanama e riuriuna, ‘Taugu tauwai noyanoya yà riupore dokena muriḡa tam, be tauna am kedama e sep-ana.’

²⁸ Be yà riuriuemina, Waiwaivi banaga a tiketikedina nopodie nam aitu Jon e saḡapore. Be kamai banabanaga Mamaitua na waiguyauma nopone, tauna vutuna Jon ya saḡaporena.”

²⁹ Be raḡanine banaga matabudi be teks tautaminama Jon na rauguguyama a vaivaiena, taudi matabudi a noḡotina da Mamaitua na giuma riukaua, vutuna aubainama Jon taudi yai batabaitodina. ³⁰ Be Parisi be tarawatu tauwai katakataidima taudi Mamaitua na ḡoanama na kedama a tuaḡaiena, aubainama Jon na waibatabaitoma a tuaḡaiena.

³¹ Be Yesu yaḡoro ya giugiuna, “Yodi taumi kintimima nema yài ruvaruva bakemi? Taumi aiyaba maika? ³² Taumi maika seda debadebae tawai digirina. Be taudi adi banagama mate tawai riu siḡaḡayana. ‘Tauma naḡi digirinama kèi digirie be taumi nam ko bigana, be tauma guri digirinama kèi digirie be taumi nam ko ḡabana.’ Taumi raḡan matabuna nama ko riuriu tuatuaḡaina. ³³ Be raḡanine Jon ya tavana, taumi kauinama teneḡinama koya voivoiena. Tauna ya widiwidina be waen nam i tegotegona, be taumi ko riuriuna, ‘Tauna penama ḡarone.’ ³⁴ Be

Banaga Natunama ya tava da e kanikani be e tegotegona da taumi ko riuriuna, ‘Ko kita, tauna banaga kanikani dobidobinama be waen tegotego dobidobinama. Be teks tautamina be gewagewa tauvoiedima taudi tauna na banagama.’³⁵ Mamaitua na nuauyauyama natunatunama ḡarodie, tokare tà kitana deḡo tauna riukaua. Banaga tauriu singāḡayena, bo taugu be Jon.”

Yesu waivi na gewagewama ya noḡota porena

³⁶ Parisi tenāḡa Yesu ya kokonena na vadae kani aubainama. Naumeki da Yesu Parisi na vadae ya naḡo be ya kena girigirina* kani aubainama. ³⁷ Be uma meagaine waivi na yawasanama gewagewanama ya miamiana. Be raḡanine Yesu Parisi na vadae a kanikanina, varinama tauna ya vaivaiena, naumeki da upa ḡabuḡabunama duginama maesinama dosinama ya kiroḡi verauḡena. ³⁸ Be tauna ma ḡabaḡabana Yesu kaḡanama diane ya midi be matasurune Yesu kaḡanama yai butedi, be debavuvugine Yesu kaḡanama ya ravusidina, be kaḡanama yai suruedi be upa ḡabuḡabunama kaḡane ya ḡinina.

³⁹ Be Yesu taुकokonenama uma kauinama nama ya kitakitana, tauna yai nuanogonoḡotana, “Deḡoda uma banaginama tauna riukaua peroveta, naumeki da tauna tokare sibo ya kataie da uma aba waivinama tauna e tautaukoni, be tauna sibo ya kataie da uma waivinama tauna waivi gewagewanama.”

* **7:36:** Jius adi kastamma ta kenagirigiri be ta kanikanina.

⁴⁰ Be Yesu tauna ya riuena, “Saemon, taugu yà gōeḡoena aba yà riuemna.” Be tauna ya riuna, “Naumeki, tauwai katakatai, kwa giu!”

⁴¹ “Mane taupakinama tenaḡa banaga rabui loun ya utedina. Banaga tenaḡa Denari 500 be ḡesau tauna Denari 50. ⁴² Be taudi rabuidi nam mane da mane taupakinama sibo a ute munaḡe, vutuna aubainama mane taupakinama taudi adi buk-inma ya boaporena. Yodi tam kwa noḡonoḡotina deḡo tauna nuanama ya vere kaua?”

⁴³ Be Saemon ya paribeenana, “Taugu è noḡotina agunai banaga aitau 500 Denari boaboaporenama.” Be Yesu ya riuna, “Tam kuya riukauana.”

⁴⁴ Dabudine Yesu yai tautinamuri waivi ḡarone be Saemon ya riuena, “Uma waivinama kuya kita? Taugu am vadae è saḡa be nam upa ku utegu da kaḡaguma sibo è koḡana, dà vaivaima e riuriuna nama, be tauna matasurune kaḡaguma ya koḡedi be debavuvuḡine kaḡaguma ya ravusidina. ⁴⁵ Tam nam kui suruveguna waikaiwa aubainama, dà vaivaima e riuriuna nama, be tauna raḡanine è saḡasaḡana kaḡaguma waisuruvenama yai kare be nam i gosena. ⁴⁶ Tam nam debugue oeri ku ḡinina, dà vaivaima e riuriuna nama, be tauna kaḡague upa ḡabuḡabunama ya ḡinina. ⁴⁷ Vutuna aubainama yà riuriuemna da tauna na gewagewama matabudi Mamaitua ya noḡota poredina. Vutuna aubainama taugu nuanama yà paḡopaḡo kauena. Be aitau da na gewagewama ḡaubonama Mamaitua ya noḡota porena, vutuna aubainama tauna na wainuapaḡoma ḡaubonama taugu ḡarogue.”

48 Dabudine Yesu waivi ya riuena, “Am gewage-wama è noḡota poredina.” 49 Be banaga ḡesaudima taudime ai taraviravira munaḡedi be a riuriuna, “Uma tauna aita, banaga adi gewage-wama e noḡonoḡota poredi?” 50 Be Yesu waivi ya riuena, “Am waisumaḡama yai yawasanimna. Ma nuasubam kwa naḡona.”

8

Yesu na tauwai muriwatanama waiwaividima

1 Dabudine a miana raḡan bisanama be Yesu na apasolma 12 mate a naḡona meagai dosidie be ḡauḡaubodie da Mamaitua na waiguyauma riunama verenama ya rarau guguyena. 2 Be Yesu waiwaivi ḡesaudima penama be sida ragara-gaudima yai yawasanidina. Inam waiwaividima taudi mate Yesu ai muriwatane be a naḡonaḡona. Taudi isedima Meri awai isana Megdalin,* penama matabudi 7 tauna a dobi porena, 3 be Joana, tauna Kusa na visarama, be tauna guyau Herod na bisnisma taurabenama, be Susana be waiwaivi ḡesaudima mate. Inam waiwaividima adi kanie be adi manee Yesu be na tauwai muriwatanama a sagusagudina.

Taukuma wainasinama (Mt 13:1-9; Mk 4:1-9)

4 Raḡan tenaḡa patara dosinama meagai da meagai a verau be Yesu ḡarone ai rawateḡeidina, be tauna uma wainasinama ya riuedina,

5 “Tauḡoma tenaḡa ya dobi ya naḡo da pesi yai yaraiedina. Raḡanine pesi yawai yaraiedina,

* 8:2: ‘Megdalin’ inam meagai isanama.

ġesaudima keda poune a ravusedina, be banaga a vagudeguededi be kiu a kanidina. ⁶ Be ġesaudima yeku debedie a ravusedina. Be raġanine a gogo tavana, matabudi a pokina, baninama doġa noponama nam subasubana. ⁷ Be ġesaudima gedara nopodie a ravusedi da gedara mate a gogo tenaġana be gedara pesi ya yavanidi da pesi nam ti gogona. ⁸ Be ġesaudima doġa verenama debane a ravusedi be a gogo kauana be banidima a biridina ya toi kauana, be pesi tenaġaġa banidima 100.” Be Yesu bonanama dosine ya riuna, “Deġoda beemima ta kenakenana, koi beavaia!”

⁹ Be tauwai muriwatana Yesu ai taravirena, “Bada, inam wainasinama baninama aba?” ¹⁰ Be tauna ya paribeedi be ya riuna, “Mamaitua na waiguyauma semosemodima yàwai kataimina da na waiguyauma yodi nema e veraverau bakona ko kataiena. Be banaga ġesaudima taudi wainasi taunaġa ta vaivaiena,

aubainama taudi matedie ta kitakitana be nam tima kitakita kauena,

ta vaivaiena be nam tima katakataiena.

¹¹ “Be wainasi baninama inam umanama: Pesi inam Mamaitua riunama. ¹² Pesi keda debane ravuravusedima, inam maika banaga Mamaitua riunama ta vaivaiena, be muriġa Diaboro e tava be Mamaitua riunama nopodie e kaikaiporaġana, da taudi nam tai sumaġa be ta yawasana. ¹³ Pesi yeku debane ravuravusedima, inam maika banaga raġanine Mamaitua riunama ta vaivaiena, taudi ma nuavereveredi inam riunama ta paġopaġona. Be taudi nam waramidi, vutuna aubainama raġan ġaubonaġa

tai sumaḡana, be raḡanine raurubu e tavatavana taudi adi waisumaḡe ta bekuna. ¹⁴ Be pesi gedara nopodie ravuravusedima, inam maika banaga Mamaitua riunama ta vaivaiena, be muriḡa nu-aboya be waiguyau be tubuḡa na wainuaverema adi waisumaḡama ta yavayavanidina da taudi tokare nam ta bani. ¹⁵ Be pesi doḡa verenama debane ravuravusedima, inam maika banaga nopodima veredima be didimanidima, be raḡanine taudi giu ta vaivaiena, taudi ta kaididi be ta rabe da e votavotana.”

Kodam wainasinama
(Mk 4:21-25)

¹⁶ “Nam aitau kodam e gabu be e ruputawa bo anikaba kena dibune e boru. Tauna kodam ḡavoe ei midiri da banaga ta saḡasaḡana ta kitana. ¹⁷ Deḡoda yaba matabuna yodi ko ruputawedina, be tokare ta maḡatara munaḡana. Am noḡota be am kauama semosemodima mate tokare banaga matabudi ta kataiedina. ¹⁸ Vutuna aubainama koi beavaia kauana, baninama deḡoda aitau yau giuma ya paḡopaḡona, ḡesau debane mate tokare e utena. Be deḡoda aitau yau giuma nam i paḡona be e noḡonoḡotina da ya paḡona, be ibewa da tokare matabudi e kaiporaḡana.”

Yesu tinanama be tasitasinama
(Mt 12:46-50; Mk 3:31-35)

¹⁹ Yesu tinanama be tasitasinama taudi a verauna Yesu ḡarone be nam ḡarone ti tavana, baninama patara ya morabana. ²⁰ Dabudine banaga tenaḡa Yesu ya riuena, “Tinamma be tasitasimma doḡae ta midimidi be ta ḡoeḡoena da ta kitamna.” ²¹ Be Yesu ya riuna, “Tinaguma be tasitasiguma

taudi aitaugā Mamaitua riunama ta vaivaie be ta voivoiena.”

Yesu kaibitibiti ewai badena
(Mt 8:23-27; Mk 4:35-41)

²² Raḡan tenaḡa Yesu na tauwai muriwatanama mate wagae a saḡa be ya riuedina, “Yawawa dosinama tà davu be tà naḡo noaḡo nevane.” Naumeki da a naḡona. ²³ Taudi yawawa a davu-davuna maika Yesu ya kenana, be kaibitibiti yai raḡantenāḡe da ya tavana be waga noponama upa ya moḡavu be waga ḡaubonaḡa da sibo ya monuna.

²⁴ Be tauwai muriwatana a naḡo be Yesu a taiḡosori be a riuenā, “Bada, Bada ḡaubonaḡa da tà gurina!” Be tauna ya midisuḡu be sive be rabama ya riutuāḡaiedi, da taudi ai nu-atuḡutuḡu be daumora ya kenana. ²⁵ Be Yesu na tauwai muriwatanama ya riuedina, “Taumi ami waisumaḡa bo ibewa?” Be taudi a ḡosoridi be a basena be adi banagama adi banagama a riuedina, “Uma baneginama aita? Tauna sive be upa e riuedi be ta vovo teyeteyena.”

Penama banaga a kokuna
(Mt 8:28-34; Mk 5:1-20)

²⁶ Be taudi wagae a naḡona Geresin adi dobue. Umaḡo Galili provins be noaḡo nevane. ²⁷ Be Yesu kaḡanama gerese ya boruboru dobiḡena raḡanine, meagaie tauḡoma tenaḡa ya verauna Yesu ḡarone. Be tauḡominama penama bonideḡo a kokuna, be tauna ma kovakovana ya naḡonaḡona be nam vadae i miamiana. Be tauna guri adi

gubae† ya miamiana. ²⁸⁻²⁹ Be inam tauḡoma Yesu ya kitakitana raḡanine, tauna ya yogo be Yesu noḡone ya bekuna. Dabudine Yesu penama ya riue da tauḡoma ya dobi porena. Be tauna bonanama dosine ya riuna, “Yesu, Mamaitua saḡasaḡa vavasāḡinama Natunama, aba ḡarogue kwa ḡoeḡoe? Yàwai baḡamna da nam gewagewa ḡarogue kwa voie.”

Raḡan toitoi penama tauḡoma yai babari be na ḡoane nama ya nawenawena. Be banaga tauna nimanama be kaḡanama a rauseini be a raber-abena. Be yaḡoro tauna ya rakedi be penama tauḡoma ya nawena dobu wainuatoitoine.

³⁰ Yesu yai taravirena, “Tam isamma nema?” Be tauna ya paribeena, “Taugu isaguma Patara”, baninama penama toitoi nopone a saḡana. ³¹ Be penama awai baḡana da Yesu nam taudi sibo ya riuedi da dom nam dibuboruborune sibo a naḡo.

³² Inam dabudine bawa netarinama oya bane a yabayabana. Be penama Yesu ai baḡa da tauna sibo yai aninedi da bawa nopodie sibo a naḡona. Be Yesu yai aininedina. ³³ Dabudine penama banaga a dobi pore be bawa nopodie a naḡona da bawa netarinama dere boganaḡa a manini yovo da a naḡona yawawa dosine be a tonedina.

³⁴ Bawa tauyosidima inam kauinama nama a kitakitana, taudi a manini a naḡona. Be taudi banaga matabudi ai varidina adi meagaie be meagai diane mate.

† **8:27:** Israel taudi nam guri ti dobodobodina, be taudi gubae a sivusivudina, maika Yesu.

³⁵ Dabudine banaga a dobi a naḡo da kaua aba ya tubutubuḡana sibo a kitana. Be raḡanine Yesu ḡarone a tavatavana, taudi tauḡoma penama dobidobi porenama Yesu kaḡane ya miamiana a kitana. Be tauḡoma yai gara kaua be na noḡotama verene ya miamiana, be taudi nama a kitakitana a nairana. ³⁶ Be banaga aitaḡa kauinama a kitakitana, taudi banaga ḡesaudima ai varidina da tauḡoma penama kokukokunama ya yawasana munaḡana. ³⁷ Dabudine Geresin banegidima Yesu ai baḡana da tauna sibo inam dobonama ya gose be ya naḡo poredina, baninama taudi a naira da a naira kauana. Naumeki da Yesu waga nopone ya saḡa be ya munaḡana.

³⁸ Tauḡoma penama dobidobi porenama Yesu yawai baḡana da mate sibo a naḡona. Be Yesu ya riupore be umanama ya riuena, ³⁹ “Kwa munaḡa am vadae da Mamaitua aba ḡarome ya voivoiena banaga kwai varidina!” Dabudine tauḡoma ya naḡo be meagai nopone banaga matabudi ya riuedina da Yesu aba tauna ḡarone ya voiena.

Jaeras natunama waivinama

(Mt 9:18-26; Mk 5:21-43)

⁴⁰ Be Yesu ya tavatava munaḡana raḡanine, banaga patara tauna ai kaiwena, baninama taudi matabudi tauna a raberabena. ⁴¹ Dabudine tauḡoma isanama Jaeras, tauna sinagog tau-rabenama. Tauna ya tava be Yesu noḡone tu-apikane ya raupari be yai baḡa guratena da sibo na vadae ya saḡana, ⁴² baninama natunama waivinama tenaḡa ḡominama na suarama 12 be tauna ḡaubonaḡa da e gurina.

Be Yesu ya naḡonaḡona raḡanine, patara tauna a midimidi ḡuruḡuruvina. ⁴³⁻⁴⁴ Dabudine waivi tenaḡa Yesu murine ya tava be na garama isunama ya taukonina, baninama tauna waikosina vutuvutu ya paḡona modi 12 a kovina. Be tauna bonika na purapurama matabudi dogeta ḡarodie yawai yakaredina, be nam aitau i yawasanina. Be raḡanine Yesu na garama isunama ya tautaukonina, yai raḡantenage da waikosina vutuvutu yai kavena.

⁴⁵ Dabudine Yesu yai taravirana, “Aitau ya taukonigu?” Be matabudi a bovina, vutuna aubainama Pita ya riuna, “Bada, banaga a midi ḡuruvim be ta biubiu suriḡimna. Be nemanama da kwa riuriuna ‘Aitau ya taukonigu?’ ” ⁴⁶ Be Yesu ya riuna, “Taugu è kataiena da aitau ya taukoniguna, baninama rewapana ya dobi poreguna.” ⁴⁷ Raḡanine waivi mayanama ya paḡo da nam teneteneḡina da sibo yai moisiri, vutuna aubainama tauna ma tunigusugusuna Yesu noḡone ya bekuna. Be patara noḡodie waivi Yesu ya riuna da aba aubainama Yesu ya taukoni, yodi tauna ya yawasanana munaḡana. ⁴⁸ Be Yesu tauna ya riuna, “Moumou, am waisumaḡama yai yawasanimna. Ma nuasubam kwa naḡona.”

⁴⁹ Yesu yaḡoro ya giugiu be sinagog tau-rabenama na vadae banaga miemieninama ya tava da Jaeras ya riuna, “Natumma ya gurina, tauwai katakatai nam kwai sinasina.” ⁵⁰ Be Yesu nama ya vaivaiena, tauna Jaeras ya riuna, “Nam kwai nuaboya, kwai sumaḡa be tauna tokare e yawasanana.”

⁵¹ Be taudi Jaeras na vadae a tavana raḡanine, Yesu banaga ya riuedina da nam aita tauna mate vadae ta saḡa. Pita, Jon, Jeims be gomana na dosima taudiḡa Yesu mate vadae a saḡana. ⁵² Be banaga matabudi gomana ai nuaboye be a ḡabeḡabena. Be Yesu ya riuedina, “Nam ko ḡaba, tauna nam i gurina, e kenakena ḡomana.” ⁵³ Dabudine banaga matabudi Yesu ai kwatekwatevena, baninama taudi a kataie da gomana ya gurina. ⁵⁴ Raḡanine ya tavutavu dobiḡedina, tauna gomana nimane ya kaididi be ya riuna, “Gomana, kwa midisuḡu!” ⁵⁵ Dabudine gomana aruinama ya tava munaga be ya midisuḡuna. Be Yesu taudi ya riuedina, “Yodi kani ko ute be e kani!” ⁵⁶ Be tauna na dosima nuedima ya mosari kauana. Be aba ya tubutubuḡana Yesu taudi ya riuedina da nam aita sibo a riue.

9

Yesu apasol 12 ya riuporaḡana (Mt 10:5-15; Mk 6:7-13)

¹ Yesu apasol 12 ya riuedi da a rawateḡeidi be tauna rewapana be waibada ya utedina, da taudi penama ta tavu dobiḡedi be banaga sidesidedima tai yawasanidina. ² Yodibe ya riuporedina da taudi Mamaitua na waiguyauma ta rauguguye, be banaga sidesidedima tai yawasanidina. ³ Be tauna ya riuedina, “Ami naḡoe nam aba ko paḡo. Nam diḡona, nam tana, nam kani, nam mane be nam kwama ḡesaunama mate ko paḡo. ⁴ Be raḡanine ai meagaie ko saḡasaḡana taumi vada tenaḡa nopone ko miana, naumeki da ami kaba

naḡoma raḡanine inam meagainama ko gosena. ⁵ Be deḡoda banaga taumi nam tai aninemi, naumeki da kaḡemima popokaudima ko rawakurukuruvidi be inam meagainama ko goseporena. Dabudine taudi ta kataie da taudi tokare Mamaitua matane inam wavunama taudime ta paḡo munaḡena.”

⁶ Naumeki da tauwai muriwatana meagai da meagai nopodiḡa a naḡo be vari verenama a rarau guguye, be banaga dobu matabuna awai yawasanidina.

Herod na nuababaḡama
(Mt 14:1-12; Mk 6:14-29)

⁷ Inam raḡanine Herod, tauna Galili provins guyaunama, be uma kaudima nama a tubu-tubuḡana, tauna ya vaiedi be ya nuababaḡana, baninama banaga ḡesaudima a riuriuna da Jon tauwai babataito ya guri be ya midisuḡu munaḡana. ⁸ Be banaga ḡesaudima a riuriuna da peroveta Elaija ya maḡatara munaḡana, be banaga ḡesaudima a riuriuna da bonideḡo perovetedima tenaḡa ya guri be ya midisuḡu munaḡana. ⁹ Be Herod ya riuna, “Jon gadonama è tomna, be inam yodi aitau baneginama varinama ya vaivaie?” Be tauna ya ḡoeḡoena da sibo Yesu ya kitana.

Yesu tautauḡoma 5 tausand yai kanidina
(Mt 14:13-21; Mk 6:30-44; Jn 6:1-14)

¹⁰ Be apasol a tavatava munaḡana raḡanine, taudi yaba matabuna a voivoiedina Yesu ai varina. Tauna wainuatugune yai dokedi be a naḡona meagai isanama Betsaidama. ¹¹ Raḡanine

patara nama a vaivaiena taudi ai muriwatanedina. Be Yesu taudi yai aninedina, be Mamaitua na waiguyauma taudi ya giuedina, be aitauga yawasana a goegoena naumeki da yai yawasandina.

¹² Raviravi Yesu na apasolma 12 a tava be a riuena, “Banaga kwa riuporağa da ta nağo meagaiğa be meagai murisairine da taudi kani be ġaravu ta banavidina, baninama uma dobunama wainuatoitoinama.” ¹³ Be Yesu ya riuedina, “Taumi koi kanidi!” Be taudi a paribeena, “Nema kai kani bakedi? Tauma buredi 5 kavakava be iyana rabui ġaromaie, bo nema kwa noğonoğota bake? Tauma ka nağo be kani ka gimara uma banegidima aubaidima, bo?”

¹⁴ Dabudine tautauğoma a kitaruvedi da 5 tausand. Be Yesu na tauwai muriwatanama ya riuedina, “Banaga ko dariğedi da 50 50 ta miana.”

¹⁵ Naumeki da taudi nama a voia be banaga matabudi a miana. ¹⁶ Yesu buredi 5 be iyana rabui ya ragaudi da gunume yai kitasağa be Mamaitua yai kaiwe da ya givedi be na tauwai muriwatanama ya utedina, be taudi a soiedi da banaga a utedina. ¹⁷ Be banaga matabudi a kani da a kani siauana. Be tauwai muriwatanama kani kanikanigosedima a tama da posa 12 ai moğavudina.

Pita yai mağatarana da Yesu tauna Tauwai yawasana

(Mt 16:13-21; Mk 8:27-31)

¹⁸ Rağan tenağa Yesu taunağa ya moimoiragi be na tauwai muriwatanama taudi tauna mate.

Be tauna taudi yai taraviredina, “Banaga ta riuriu da taugu aita?” ¹⁹ Be taudi a paribeena, “Banaga ġesaudima ta riuriuna da tam kabe Jon tauwai babataito, be ġesaudima ta riuriuna da tam kabe peroveta Elaija, be banaga ġesaudima ta riuriuna da tam bonideġo perovetedima gurig-uridima tenaġa kabe i midimidisuġu munaġa.” ²⁰ Be tauna ya riuedina, “Be taumi nema kowai noġota bako, taugu aita?” Be Pita ya paribeena, “Tam Tauwai yawasana, Mamaitua ya riupore yovoġemna.”

²¹ Dabudine Yesu na tauwai muriwatanama ya riu vavasagedina da nam aita sibo a riue. ²² Be ya riuna, “Banaga Natunama tokare ei nuatoitoina yaba toitoi ġarodie be babada dosidima be pirisi adi babadama be tarawatu tauwai katakataidima, taudi matabudi Banaga Natunama tokare ta tuaġaie be tai gurina. Be raġan wairabuiteġane Mamaitua e kawa midisuġu munaġena.”

Yesu waimuriwatanenama ya giuena
(Mt 16:24-28; Mk 8:27-31)

²³ Be Yesu banaga matabudi ya riuedina, “Deġoda aita waimuriwataneguma e ġoen, naumeki da na ġoanama matabudi e gosedi, be raġan matabuna na korosima e kiroġi* be ei muriwataneguna. ²⁴ Tam aita tame am yawasanama kwa kaididi be kwa raberabena, tam tokare am yawasanama kwa kawa gewagewana, be tam aita da taugu kautaiye am yawasanama kuyai

* **9:23:** Korosi kiroġinama inam kwai nuatoitoina, maika Yesu korosie yai nuatoitoina.

utaena, am yawasanama tokare kwa banavina. ²⁵ Değoda aitaŭ dobu yabedima matabudi e ra-garagaudina be yağoro tauna na yawasanama e gewagewana, inam yabedima tauna tokare nam tai yawasani. ²⁶ Değoda aitaŭ, taugu e tunimayağegu bo riuguma e tunimayağena, naumeki da tokare Banaga Natunama tauna Tamanama neneğarine be anea babau neneğaridie e dobina, tauna mate inam baneginama e tunimayağena. ²⁷ Be taugu riukaua yà riuriuemina, ġesaumima yodi uma ko midimidina, taumi tokare nam ko guri, naumeki da Mamaitua na waiguyauma ko kitana.”†

Yesu kitanama ya boru vitarena

(Mt 17:1-8; Mk 9:2-10)

²⁸ Naumeki da inam giudima a kovikovina murine, rağan aniwai 8 ne Yesu tauna Pita, Jon be Jeims yai dokedi be a nağona oya debane moiragi aubainama.

²⁹ Be Yesu ya moimoiragina maika, tauna noğonama kitanama ya boru vitare be na garama ya ġavora be ya rawakeyekeyemina. ³⁰⁻³¹ Yai rağantenage da tautauğoma rabui, Mousis be Elaija ma neneğaridi a mağatara be Yesu mate a giugiuna. Taudi Yesu nema Jerusalemma e guri bako be uma dobunama e nağo porena, vutuna a giugiuenta. ³² Be Pita na banagama mate a yadoyadona. Be a ġosoğosoridina rağanine, taudi Yesu ma neneğarina be tautauğoma rabui, tauna mate a midimidina a kitekitedina. ³³ Be rağanine tautauğomidima Yesu a gosegosena, dabudine Pita

† 9:27: Inam pentekost.

ya riuna, “Bada, ya vere kauana da tauma yodi uma dobudine. Agunai kape rabuiteḡa ka keridina, tenaḡa tam aubaimma be tenaḡa Mousis aubainama be tenaḡa Elaija aubainama.” Be Pita tauna nam i kataiena aba ya giugiuena, be tauna ya giugiu yabayababana.

³⁴ Be Pita yaḡoro ya giugiuna maika, giyou ya dobi da vagurune ya rupu tawedina. Be raḡanine giyou ya sumasuma tawedina, taudi a naira kauana, ³⁵ be giyou nopone bona ya dobi be ya riuna, “Uma tauna taugu natuguma be taugu è vinena, aubainama tauna bonanama ko vaiena!” ³⁶ Bona yaḡoro ya giugiuna maika, taudi ta kitana be Yesu taunaḡa ya midimidina. Be tauwai muriwatana inam raḡanine aba taudi a kitakitana, a nuevina be nam aïtau ti riuedina.

*Penama gomana tauḡominama ya kokuna
(Mt 17:14-18; Mk 9:14-27)*

³⁷ Pomainama taudi oya debane be a yovoyovo munaḡana raḡanine, patara dosinama taudi ḡarodie a tavana. ³⁸ Patara nopodie tauḡoma tenaḡa tauna ya rasa be ya riuna, “Tauwai katakatai, yàwai baḡamna da yau gomanama uma kwa kita, taugu natuguma tauḡominama tenaḡa ḡominama. ³⁹ Penama kana raḡanie yau gomanama e vunugi be e kawakawa rasarasa be e kawakawa kokerina, be tauna gayane kasampuropuro ta dobidobina. Inam peneminama natuguma nam airaḡan ima gosegosena, be natuguma tuninama e kawakawa gewagewana. ⁴⁰ Be taugu am tauwai muriwatanama èi

baḡedina da taudi sibo penama a tavu dobiḡena, taudi a raurubu be nam teneteneḡina.”

⁴¹ Be Yesu ya paribeena, “Taumi banegimima beapoteptomema, nam waisumegimi, taumi mate tà mia ḡaḡa be ami vitama yà kiroḡa ḡaḡae? Natumma kwa verauḡe uma dabudine!”

⁴² Be gomana ya veraverauna raḡanine, penama tauna yai beku doḡae be ya kawa kokerina. Dabudine Yesu penama ya riutuaḡaie be gomana yai yawasanina, yodibe tamanama ya ute munaḡena. ⁴³ Be banaga matabudi Mamaitua na rewapanama dosinama aubainama a basena.

Yesu e gurina ya giu munaḡena
(Mt 17:22-23; Mk 9:30-32)

Yesu yaba matabuna ya voivoiedina banaga yaḡoro a basebasena maika, Yesu na tauwai muriwatanama ya riuedina, ⁴⁴ “Koi beavaia kua da aba yodi yà riuemina. Banaga Natunama ta boru dobiḡena banaga nimedie raukivigewegewenama aubainama.” ⁴⁵ Be na tauwai muriwatanama inam giunama, baninama nam ti kataiena. Giu baninama semosemonama da taudi nam sibo a kataie. Be inam giunama aubainama taudi Yesu sibo ai taravirena, be a nairana.

Aitau ya saḡa gurata?
(Mt 18:1-5; Mk 9:33-37)

⁴⁶ Raḡan tenaḡa Yesu na tauwai muriwatanama ai saḡasaḡana da poudie aitau ya saḡa gurata. ⁴⁷ Be Yesu adi wainua noḡonoḡotama ya kataiena, vutuna aubainama gomana ḡaubonama ya riue da diane ya midi ⁴⁸ be taudi ya riuedina, “Aitau

uma gomeninama ḡaubonama taugu isague ewai turanena, naumeki da tauna ewai turaneguna, be aitau taugu ewai turaneguna, naumeki da tauna tauriuporeguma mate ewai turanena. Vutuna aubainama aitau taumi poumie na yawasanama ya yovona, tauna ya saḡa guratana.”

⁴⁹ Be Jon ya riuna, “Bada, tauma tauḡoma kè kitana, tauna isame penama ya tavutavu dobiḡedina, be tauma kè riutuaḡaiena, bani-nama tauna nam tauda mate tama noyanoya tenaḡana.” ⁵⁰ Be Yesu ya riuna, “Nam ko riu-tuaḡaie, baninama tauna deḡoda taumi nam ami ḡavia, naumeki da tauna taumi turemima.”

Samaria banegidima Yesu a tuaḡaiena

⁵¹ Naumeki da Yesu na raḡanima maida ya tavatavana da tauna sibo ya munaḡana marae, vutuna aubainama na noḡotama ya vitare da Jerusalem naḡonama ya noḡota didina. ⁵² Be tauna tauwai noyanoya ya riupore dokedina, da taudi a naḡona Samaria meagaine da Yesu na kaba verauma aubainama sibo a vokaukauana. ⁵³ Be banaga dabudine nam ti aninena, bani-nama tauna ya naḡonaḡona Jerusalemma.† ⁵⁴ Be raḡanine na tauwai muriwatanama Jeims be Jon nama a kitakitana, taudi a riuna, “Bada, naumeki bo ibewa da tauma sibo kai marae kè riue be ya yovo da uma banegidima sibo ya kara gorudi, Elaija ya voiana maika?” ⁵⁵ Be Yesu yai tauvitara be ya riutuaḡaienedina. ⁵⁶ Naumeki da taudi a naḡona meagai ḡesaune.

† 9:53: Jius adi ḡaviama Samaria banegidima.

*Yesu waimuriwatanenama na piripirima
(Mt 8:18-22)*

⁵⁷ Raḡanine taudi kedaḡa a naḡonaḡona, be tauḡoma tenaḡa Yesu ya riuena, “Tam deḡo kwa naḡona, taugu yaì muriwatanemna.” ⁵⁸ Be Yesu ya paribee be ya riuna, “Inam naumeki be uma kwa noḡoti, kiudobo§ taudi adi gaure adi kaba miama, be kiu adi noḡie adi kaba miama, be Banaga Natunama nam deḡo na gabu kaua da tauna e sipere.”

⁵⁹ Be Yesu tauḡoma ḡesaunama ya riuena, “Kwai muriwatanegu!” Be tauna ya riuna, “Bada, noḡone kwa gosegu da ya naḡo be tamaguma ya dobona.” ⁶⁰ Be Yesu ya paribeenana, “Banaga guriguridima kwa gosedi da taudiḡa adi gurima ta dobo munagedina, be tam kwa naḡo be Mamaitua na waiguyauma e veraverauna, vutuna kwa rauguguyena!”

⁶¹ Be banaga ḡesau Yesu ya riuena, “Bada, taugu yaì muriwatanemna, be noḡone kwa gosegu da ya naḡo be yau dosima yaì kaiwedina.” ⁶² Be Yesu ya riuena, “Deḡoda aita yabiyabi** e paḡopaḡo be ei tautinamurina, tauna nam teneteneḡina da Mamaitua na waiguyauma nopone e noya.”

10

§ 9:58: Yesu ya riuna: ‘Fox’. Tauna doбира muserinama be gaure ta miamiana maika kiudobo. ** 9:62: Yesu ya riuna: ‘Plow’, baninama kuya waiplow be kuyai tautinamurine, tokare am noyama e barabarana, maika yabiyabi taupaḡonama, deḡoda ei tautinamurine, waga naḡonama baraḡa e naḡona, be am ḡonama dobone nam kwa tava.

Yesu na tauwai muriwatanama 72 ya riuporaḡana*

¹ Uma kauinama murine Bada banaga ḡesaudima matabudi 72 ya vinedina, be tauna deḡo meagaidiḡa naḡonama ya noḡonoḡotina, nama inam banegidima ma turana ma turana ya riupore nawe dokedina inam meagaidiḡa. ² Be tauna umanama ya riuedina, “Sipi taupakinama koi baḡa da tauna taunoya ḡesaudima e riuporaḡa da taumi ta sagumina, baninama inam dabudine maura ya morabana be taunoya a raubisaḡana. ³ Naumeki, ko naḡo! Taugu yà riuriuporemina sipu natunatudima maika musara ḡasiḡasidima nopodie. ⁴ Nam pausi ko ragau, nam tana, nam kaḡasuma ḡesaudima mate, be nam kedae banaga mate koi boruboru!

⁵ “Raḡanine vada nopone ko saḡana, noḡone ko riuna, ‘Suba uma vadane.’ ⁶ Be deḡoda inam dabudine suba baneginama e mianana, naumeki da ami subama tauna ḡarone e kena, be deḡoda tauna nam suba banegina, naumeki da ami subama e verau munaḡana ḡaromie. ⁷ Raḡanine deḡo meagaina koya tava be deḡo vadane koya saḡana, naumeki da vadane ko miana, be dabudi ko kani be ko tego gogonana, baninama taunoya sibo adi maesama a paḡo. Be taumi nam koi vadasaḡa!

⁸ “Taumi deḡo meagaie ko tava be banegidima tai aninemina, naumeki da aba ta uteutemina, vutudiḡa ko kanina! ⁹ Be banaga sidesidedima koi yawasanidi be ko riuedina da Mamaitua na

* **10:** Giruma ḡesaudima ta riuriuna da 70.

waiguyauma raḡaninama e tavatavana. ¹⁰ Be taumi deḡo meagaine ko tava, be inam meagainama banegidima nam tai aninemi, naumeki da ko naḡo kedae be ko riuna, ¹¹ ‘Tauma ami meagaima popokaunama kaḡamaima ya patipatina ḡaromie ka vava yasayasaina, be ko noḡoti da taumi tokare nam ko yawasana, baninama Mamaitua na waiguyauma raḡaninama ya tavatava be taumi koya tuaḡaiena.’ ¹² Taugu ya riuriuemi da etara raḡanine Mamaitua inam meagainama e kovoḡa guratena, nam maika Sodom.

¹³ “Korasin be Betsaida meagaimima, ko kita kava! Baninama deḡoda taugu sibo meagai Taiya be Saidon nopodie voia dosidima sibo è voiedina maika taumi ḡaromie è voiedina nama, naumeki da taudi bonika sibo noḡota viravira a paḡo, be adi gewagewama nuaboyanama a mogurena. ¹⁴ Etara raḡanine Mamaitua taumi e kovoḡa guratemina, nam maika Taiya be Saidon. ¹⁵ Be taumi Kapeniam banagimima, kowai noḡotana tokare ko naḡo marae, bo? Ibewa, Mamaitua taumi tokare banaga guriguridima adi gabue e kidipore nawemina.”

¹⁶ Be Yesu na tauwai muriwatanama umanama ya riuedina, “Aitau da taumi ami giuma e vaivaiena, naumeki da tauna taugu yau giuma e vaivaiena. Be aitau da e tuatuaḡaiemina, naumeki da tauna taugu e tuatuaḡaieguna, be aitau da taugu e tuatuaḡaieguna, naumeki da tauna tauriuporeguma e tuatuaḡaiena.”

*Yesu na tauwai muriwatanama 72 a tava munaḡa be Yesu yai nuaverena
(Mt 11:25-27; 13:16-17)*

¹⁷ Be raḡanine banegidima taudi 72 a tavatava munaḡana, taudi ai nuavere kaua be a riuna, “Bada, tam isame penama mate tauma a voteyeteyemaina.”

¹⁸ Be Yesu ya riuedina, “Taugu Seitan è kitana marae ya beku be ya yovona maika keama.

¹⁹ Taugu rewapana è utemina da ḡavia na rewapanama matabuna ko vaisubana, be mota be rikarikau debedie koi vutuḡa be ko vamutudina. Be nam aba tokare e kawa gewegewemi. ²⁰ Be nam penama ta vovo teyeteyemina aubainama koi nuavere, avedi. Be taumi koi nuaverena, baninama isemima marae girugirumidima ta kenakenana aubainama.”

²¹ Inam raḡanine Yesu noponama Arua Babaue nuavere ya moḡavu be ya riuna, “Mamai, tam mara be dobu Badanama, ya kaisuḡumna, baninama uma kaudima kuya semodina da nuauyauya be katai banegidima ḡarodie nam kui maḡataridina. Be tam banaga koekoedima ḡarodie kuyai maḡataridina. Mamai, inam naumeki, tam am ḡoanama ruvane.”

²² “Tamaguma yaba matabuna taugu ya uteguna. Be nam aitau i kataiena da Natunama aitau, Tamanama taunaḡa ya kataiena. Be nam aitau i kataiena da Tamanama aitau, Natunama taunaḡa ya kataiena, be Natunama aitaḡa ya vinevinedina ḡarodie ewai maḡataridina da tauna Tamanama aitau.” ²³ Be Yesu na tauwai muriwatanama ḡarodie yai tauvitare be taudiḡa ya

riuedina, “Taumi uma kauinama koya kitakitana, nama banaga ta kitana, naumeki da nuedima e verena, ²⁴ baninama boni peroveta toitoi be guyaguyau a goeḡoena da sibo uma kauinama a kitana, maika taumi yodi ko kitakitana nama, be nam ti kitana. Taudi a goeḡoena da sibo uma giunama a vaiena, maika taumi yodi ko vaivaiena nama, be nam ti vaiena.”

Samaria baneginama verenama wainasinama

²⁵ Raḡan tenaḡa tarawatu tauwai katakatinama ya verau da Yesu ya raurubu be ya riuna, “Tauwai katakatai, aba yà voie be yawasana kenakena nonoḡinama yà paḡo?”

²⁶ Yesu ya riuena, “Tarawatu nema e riuriu bako? Tam nema kwa katakatai bake?” ²⁷ Be tauḡoma ya paribeena, “Bada, am Mamaituama nuanuamma e paḡona, nuanuamma tabutabune, aruimma tabutabune, am noḡotama tabutabune be am rewapanama tabutabune. Be turamma nuanuamma e paḡona maika nema tam kwa goeḡoe munaḡemna nama.” ²⁸ Yesu ya riuena, “Tam kuya riu kauana, inam vutuna raḡan matabuna kwa voie be yawasana kwa paḡona.” ²⁹ Be tauname ya gudutara munaḡe be Yesu ya riuena, “Naumeki, be yau banagama aitaḡa?”

³⁰ Yesu gututue tauna ya paribeena, “Raḡan tenaḡa tauḡoma Jerusalemma be ya dobi ya naḡonaḡona Jerikoma. Be kedae banaga danedanenedima inam tauḡominama a vunugi da na garama a kaiporaḡa be a riḡa da ya raugurere be a gose da a naḡo porenna. ³¹ Naumeki da pirisi inam kedanaḡa ya dobi ya naḡonaḡona.

Be raḡanine tauna e kitana be tauḡominama ya kenakenana, naumeki da keda dianaḡa ya dobi be ya naḡo ḡomana. ³² Be murine Livait dobudine ya dobina. Be kauinama teneginama ya kita be tauna mate keda dianaḡa ya dobi be ya naḡo ḡomana. ³³ Be Samaria tauḡominama kedanaḡa ya dobi be ya naḡonaḡo da tauḡominama ḡarone ya dobina. Be raḡanine tauḡominama nama e kitana, be ya raunuatoiena. ³⁴ Naumeki da ya naḡo ḡarone ya tava be oeri be waen kerone ya ḡinidi be garae keronama ya panidina. Yodibe ya kiroḡi da na donkima ragane yai geru da yai doka nawena barekie, be dabudi ya rabena. ³⁵ Naumeki da pomainama Samaria tauḡominama Denari rabui ya ragaudi be bareki taurabenama ya ute be ya riuena da inam tauḡominama sibo rabe kauena, be deḡoda mane nam tenegina, naumeki da taugu ya tava munaḡana raḡanine tam yaì maesimna.”

³⁶ Be Yesu tauḡoma yai taravirena, “Be yodi nema kwa noḡonoḡota bake, uma banegidima rabuiteḡa be deḡo baneginama taudanedanene a vunuvunuḡina ewai turane?” ³⁷ Dabudine tarawatu tauwai katakatainama ya paribee be ya riuna, “Aitau da inam tauḡominama ya sagusa-guna, inam tauna vutuna turanama.” Be Yesu ya riuena, “Tam kwa naḡo be nama kwa voia watanana!”

Mata be Meri

³⁸ Yesu na tauwai muriwatanama mate a naḡonaḡona Jerusalemma be kedae meagaie a tavatavana, dabudine waivi isanama Mata, tauna Yesu ya kokone da taudi vadae a saḡana. ³⁹ Be

tauna tasinama isanama Meri, tauna Yesu kaḡane ya mia be na giuma yawai beavaiena. ⁴⁰ Be Mata taunaḡa ya youyouvoa guratana, vutuna aubainama tauna Yesu ḡarone ya verau be ya riuna, “Bada, tam kuya kataie bo ibewa da tasiguma ya gosegu be tauguḡa yà youyouvoana. Kwa riue be e kaisagugu.”

⁴¹ Be Bada ya paribee be ya riuna, “O Mata, tam yaba matabudi kwawai nuaboyedi be taudi ta kawakawa nuaraḡaraḡamna. ⁴² Be yaba tenaḡa yodi Meri ya vinena, tauna vutuna ya vere kauana, be nam aitau tauna ḡarone e kaipore.”

11

Moiragi waikatakatainama

(Mt 6:9-13; 7:7-11)

¹ Raḡan tenaḡa Yesu gabu ḡesaune ya moimoiragina. Be ya moimoiragi kovina murine, na tauwai muriwatanama tenaḡa ya riuna, “Bada, moiragi kwai kataimai da tauma nama sibo kè moiragina, maika Jon na tauwai muriwatanama yai katakataidina nama.” ² Yesu ya riuedina, “Raḡanine ko moiragina, umanama ko riu:

Mamai, dobu matabuna isamma babaunama sibo a vivirena. Tam am waibadama sibo ya verau.

³ Ama kanima raḡan patapatanama sibo kuya utemai.

⁴ “Bada, ama gewagewama kwa noḡota poredi maika tauma ama banagama ḡaromaie gewagewa a voivoiedina ka noḡonoḡota poredina nama.

Be nam raurubue kwai dokemai.

⁵ Dabudine Yesu ya riuedina, “Deḡoda tam aitau turamma risine kupi poune ku naḡo be ku riuena, ‘Yau tura, buredi rabuiteḡa kwa utegu, ⁶ baninama turaguma yodi vaḡaie ya tava be taugu nam ḡarogue aba da sibo è ute.’ ⁷ Be turamma vada nopone i paribeem be i riuna, ‘Nam kwa taiḡosoḡosorigu, taugu yau sedama mate matakeda kè gudu be ka kenakenana, tokare nam aiyaba yà utem.’” ⁸ Dabudine Yesu ya riuna, “Taugu yà riuriuemina da turamma nam i ḡoena da sibo ya midisuḡu be kani ya utem. Be am waibaḡa dobidobima aubainama tauna tokare e midisuḡu da kani e utemna.

⁹ “Vutuna aubainama yà riuriuemina, koi baḡa be e utemina, ko wane be ko banavina, ko rau-pewapewa be ḡaromie e kaiporena. ¹⁰ Baninama aitau ewai baḡana, tokare e paḡona, be aitau e wanewanena, tokare e banavina, be aitau e rarau pewapewana, tokare ḡarone e kaiporena.

¹¹ “Nam ai gomana kani* i ḡabeḡabe be tamanama yeku i utena, ibewa. ¹² Be nam ai gomana pou i ḡabeḡabe be tamanama rikarikau i utena, ibewa. ¹³ Yodi uma ko noḡoti, avedi da taumi banaga gewegewemima be yaḡoro yaba veredima natunatumima ko uteutedina. Vutuna aubainama Tamemima marae tauna teneteneginama da aitaḡa Arua Babau tawai baḡena, tokare e utedina.”

* **11:11:** Gurik bonane ya riuna: Buredi. Buredi inam Jius adi kanima, maika tauda dà kanima kaire.

*Yesu be penama adi guyauma
(Mt 12:22-30; Mk 3:20-27)*

¹⁴ Yesu penama ya tavu dobiġena. Be uma peneminama banaga ya koku be ya miamiana tauna gumgum. Be inam penama tauġoma ya gosegosena raġanine, tauġoma giu yai kare munaġena, be banaga matabudi a basena. ¹⁵ Dabudine banaga ġesaudima a riuna, “Yesu tauna Belsebul isane penama e tavutavu dobiġedina. Be Belsebul tauna penama adi guyauma.” ¹⁶ Be banaga ġesaudima taudi Yesu raurubunama aubainama awai baġana da sibo mara matairinama ya voie be taudi sibo a kita be ai kawa riukaue da tauna naumeki Mamaitua ġaronama.

¹⁷ Be Yesu ya kataie da taudi aba awai nu-anogonogotena, aubainama tauna umanama ya riuedina, “Deġo dobunama tenaġa e dariġa munaġena, tokare taunaġa e kawa gewagewa munaġena. Be deġo vadanama ei mia ġinanana, tokare taunaġa ei yamona munaġena. ¹⁸ Deġoda Seitan na banagama mate tai ġinana munaġedina, tauna tokare na waiguyauma e kawa gewagewa be nam ei rewapana. Umanama ya riuriuna, baninama taumi ko riuriuna da taugu kabe Belsebul isane penama e tavutavu dobiġedi. ¹⁹ Be deġoda taugu Belsebul isane, penama e tavutavu dobiġedina, naumeki da yodi taumi Parisi ami tauwai muriwatanama taudi aitaui isane penama ta tavutavu dobiġedi? Taumi ami tauwai muriwatanama tauwai maġatarana da taumi ko kaikaiyovuna! ²⁰ Be deġoda taugu Mamaitua ni-

marakurakune† penama yà tavutavu dobiğedina, inam anikitanama Mamaitua na waiguyauma ġaromie ya tavana. ²¹ Değoda banaga wairewapaninama ma madana na gabuma e bodabodamena, naumeki da na purapurama tokare ta kena kauana. ²² Be değoda banaga wairewapanana vavasaginama e tava be inam baneginama e vunugi be na madama na kaba waisumağedima e ragaudina, inam rağanine banaga wairewapanana vavasaginama taubodama na purapurama e ragaudi be na banagama e soiedina.

²³ “Değoda tauna aitu nam taugu mate, tauna inam taugu ewai ġavieguna. Be mate tauna aitu nam taugu mate kama noyanoya tenağana, tauna inam yau noyama e kawakawa gewagewana.

Penama na kaba tava munağama
(Mt 12:43-45)

²⁴ “Be penama banaga e dobidobi porenarağanine, tauna dobu pokine e nağo be na kaba siperema gabunama e wanena. Be değoda gabu nam e banavi, tauna tokare e riuna, ‘Taugu yà munağana yau vadae, değo e veraveraue dabudi.’ ²⁵ Rağanine tauna e tava munağa da vada kavakavanama, kawakawa verenama be waiwaisianama e kenakenana e kitana, ²⁶ inam rağanine tauna e munağa be penama ġesaudima, matabudi 7 ei dokedina. Be inam penemidima a gewagewa vavasagana, nam maika noğone. Be taudi matabudi inam vadanama nopone ta sağa

† **11:20:** ‘Mamaitua nimirakurakunama’, baninama inam Arua Babau. Metiu 12:28 ko kitana.

be banaga nopone ta miana. Inam raḡanine banaga na yawasanama e gewagewa vavasaḡana, nam maika noḡone.”

Riukaua na wainuaverema

²⁷ Raḡanine Yesu inam nama ya giugiuna maika, waivi patara nopodie bonanama dosine Yesu ya riuna, “Nuavere tauna aitau tam ya tikam be yai susumna.” ²⁸ Be Yesu inam waivinama ya paribee be ya riuna, “Naumeki aba kuya riuna, be nuavere dosinama taudi aitaḡa Mamaitua riunama ta vaivaie be ta voivoiena.”

Jona na matairama

(Mt 12:38-42; Mk 8:12)

²⁹ Be patara ya moramorabana raḡanine, Yesu ya riuna, “Taumi uma kintimima kimta gewegewemima. Taumi matairaḡa kitanama ko ḡoeḡoena, be nam tokare mataira ko kita da Jona na matairama taunaḡa tokare ko kitana. ³⁰ Jona taunaḡa yai matairana Ninive aubaidima, teneginama nama Banaga Natunama tokare ei matairana taumi kintimima aubaimima.

³¹ “Etara raḡanine dobu Saba guyaunama waivinama taumi kintimima mate ko midisuḡu munaḡana raḡanine, tauna tokare e riuna da taumi kintimima sibo gienae koya naḡona, baninama boni Saba guyaunama tauna dobu damone, be ya tavana, Solomon na nuauyauyama vaienama aubainama, be yodi uma dobudine banaga tenaḡa Solomon ya saḡa porena be tauna na giuma nam komawai beavaiena. ³² Etara raḡanine Ninive meagainama banegidima taumi kintimima mate ko midisuḡu

munaḡana raḡanine, taudi ta riuna da taumi kintimima sibo gienae koya naḡona, baninama boni Jona ya rarau guguyana, be Ninive banegidima a vaie be taudi noḡota vitara a paḡona, be yodi uma dobudine banaga tenaḡa Jona ya saḡa porena, be tauna na giuma nam komawai beavaiena.

Tubuḡa na kodamma

(Mt 5:15; 6:22-23)

³³ “Nam aitau kodam e gabu be e semo, bo tebo dibune e boru. Ibewa, tauna kodam ḡavoe ei midiri da banaga ta saḡasaḡana ta kitanana. ³⁴ Matamma inam tunimma na kodamma. Deḡoda matamma verenama, naumeki da tunimma matabuna yanayanama, be deḡoda matamma e gewagewana, naumeki da tunimma matabuna ei kupikupina. ³⁵ Be yodi kwa kita kaua da yana ḡarome nam ei kupikupi. ³⁶ Deḡoda tam tunimma matabuna yanayanama, be nam tunimma aiyabinama ei kupikupi, naumeki da tunimma matabuna e yanana maika kabe kodam neneḡarinama ḡarome i yanayanana.”

Waisumaḡa kaikaiyovudima

(Mt 23:1-36; Mk 12:38-40; Lk 20:45-47)

³⁷ Raḡanine Yesu na giuma yawai kovina, Parisi tenaḡa tauna ya kokonena na vadae kani aubaina. Naumeki da Yesu ya saḡa da ya mia be ya kanikanina. ³⁸ Be Parisi tauna ya basena, baninama Yesu tauna nimanama nam i koḡa be ya kanikanina. ³⁹ Be Yesu Parisi ya riuena, “Taumi Parisi raḡan matabuna ami raudunema mataira

kitekitedima kowai sumagēdi be kowai muri-watanedina,‡ be taumi nopomima gewagewa ya moḡavuna. Taumi maika keaka be tebo tauridima ko koḡekoḡedina be nopodie mira yaḡoro ta kenakenana. ⁴⁰ Taumi koya bua kauana! Koya kataie bo ibewa da Mamaitua ḡavoe be nopoe raudunedima tauna ya voiedina? ⁴¹ Taumi nopomima ko koḡedi be ami yawasanama ko kawa didimanidina, yodibe yaba matabuna inam e verena.

⁴² “Taumi Parisi ko kita kaua! Baninama yaba matabuna koi rawadamdamdi da matabudi 10 be dam tenaḡa Mamaitua ko uteutena, be kani anitai dinidima mate. § Be taumi banaga ḡesaudima ḡarodie nam komawai rabaraba kauana be Mamaitua nuemima nam ima paḡopaḡona. Taumi yaba matabudi sibo koya voiedina!

⁴³ “Taumi Parisi, ko kita kauana! Baninama sinagog nopone gabu verediḡa ko ḡoēḡoedina, be taumi ko ḡoēḡoena da debae banaga tai kaiwemina banaga dosidima maika.” ⁴⁴ Be Yesu uma wainasinama ya riuedina, “Taumi Parisi, gewagewa ḡaromie! Baninama taumi maika kokoaga nam waimatairidi banaga nam ti kataie be debanaḡa ta naḡo yababa be adi yawasanama ta kawakawa gewegewedina.”

⁴⁵ Dabudine tarawatu tauwai katakatinama tenaḡa Yesu ya riuena, “Tauwai katakatai, uma yabedima kwa giugiuedina, tauma mate kwa biribiri dobiḡemaini.” ⁴⁶ Be Yesu ya paribee be ya

‡ **11:39:** Mataira ḡavoe inam ‘religious signs’, maika raḡan matabuna tà saḡa be taparoroe tà voivoiana. § **11:42:** Jius adi kanima anitai dinidima inam yaba ḡauḡaubodima maika buta.

riuna, “Taumi tarawatu tauwai katakataidima, taumi mate ko kita kauana! Baninama taumi banaga vita koi kirogidi be ta kirokiroga reregedina, be taumi nam airagan koma sagusagu rubudina. ⁴⁷ Ko kita kauana! Baninama boni taumi wagewagemima peroveta ai guridina, be taumi kowai aninedina. ⁴⁸ Taumi ko noḡonoḡotina da aba wagewagemima a voivoiedina, inam naumeki, baninama taudi peroveta a vunuḡidi be taumi yodi adi kokoagama koi kitedi be kowai nuaverena. ⁴⁹ Vutuna aubainama Mamaitua na nuauyauyae ya riuna, “Taugu peroveta be apasol ya riuporaḡana be ḡesaudima tai guridina, be ḡesaudima ta raukivigewegewedina.’

⁵⁰ “Raḡan pakane da yodi banaga peroveta ai guridina be kosinidima a darorona aubainama, taumi kintimima tokare kovoḡa ko paḡona. ⁵¹ Peroveta matabudi Eibol ya naḡo da Sakaraias, tauna olta be tempol poudie ai guridina. Inam banegidima awai guridina kadi taiye naumeki da taumi tokare Mamaitua e kovoḡimina, baninama peroveta awai guridina taumi kowai aninedina aubainama.

⁵² “Taumi tarawatu tauwai katakataidima, ko kita kauana! Baninama taumi riukaua kiḡinama koya paḡo be ko semosemona, vutuna aubainama taumi nam tokare marae ko naḡo. Be banaga ḡesaudima taudi marae naḡonama ta ḡoeḡoena, be taumi ko gudugududina.”

⁵³ Dobudine Parisi be tarawatu tauwai katakataidima nuedima yai medi be bonedima bagibagine awai sinasinana, ⁵⁴ da Yesu aba

giunama gewagewanama sibo ya vato be a vunugina.

12

Yesu na tauwai muriwatanama ya riu wainogotidi be ya dugudina

(Mt 10:26-31)

¹ Raḡan ḡaubonaḡa be patara ya morabana tausand bisanama be adi banagama mate awai vaguda munaḡana. Be Yesu na tauwai muriwatanama ḡarodie giu yai kare da ya dugudi be ya riu wainogotidina, “Ko rabe munaḡemi be nam Parisi adi kauama ko ruvedi. Taudi ta voivoiana kabe banaga veredi, be ibewa. Baninama taudi adi waikaikaiyovuma maika sida* ewai raudavudavuna. ² Be raḡan e veraverauna e tavana, inam raḡanine uma yabedima rupurupudima tokare ta maḡatarana, be yaba semosemodima tokare banaga matabudi ta kataiedina. ³ Be aiyaba kupie ko giuedina, tokare banaga matabudi yanae ta vaiedina, be aiyaba turemima mate waimoisirie koi kasavena, tokare patare ta giue be banaga matabudi ta vaiena.

⁴ “Yau bana, taugu ya riuriuemina, banaga tubuḡa taunaḡa tauwai gurinama nam ko nairedi, tokare nam aba ḡesau ta voie. ⁵ Taugu ya riuriuemina da aitu ko nairena. Mamaitua ko nairena, baninama ko gurina murine, tauna deḡoda e ḡoena, tauna rewapana ḡarone da tokare gienae e poraḡa nawemina. Vutuna

* **12:1:** Gurik nopone inam ‘leaven’. ‘Leaven’ maika sida, baninama ewai raudavudavu be e moramorabana.

aubainama yà riuriuemina da tauna taunaḡa ko naire!

⁶ “Kiu ḡauḡaubodima matabudi 5 maesidima 20 Toea. Be nam ai kiu tenaḡa Mamaitua nuanama i koana. ⁷ Avedi debavuvuḡimima be inam matabudi Mamaitua ya sievidina. Vutuna aubainama nam ko naira, taumi noḡotimima ya moraba kauana, nam kiu ḡauḡaubodima maika.

Yesu na matamatama
(Mt 10:19-20, 32-33; 12:32)

⁸ “Be yà riuriuemina da aitau taugu ei maḡatariguna banaga matedie, naumeki da taugu tauna Mamaitua na aneama matedie yai maḡatarina. ⁹ Be aitau taugu e bovioguna banaga matedie, naumeki taugu tauna Mamaitua na aneama matedie yà bovioguna. ¹⁰ Deḡoda aitau Banaga Natunama ḡarone e riu viravirana, naumeki da taugu tokare yà noḡota porena, deḡoda tauna noḡotaporaḡa e ḡoena. Be deḡoda aitau Arua Babau ḡarone ei diboḡana, avedi da tauna noḡotaporaḡa e ḡoēḡoena, be taugu tokare nam yà noḡota pore.

¹¹ “Taumi taugu kowai sumaḡeguna aubainama, deḡoda banaga ta verauḡemina sinagog nopone etaremima aubainama, nam ko naira bo ko riuna, ‘Nema tà gudutara bako?’ ¹² baninama inam raḡanine tokare Arua Babau tauna giu e utemi be nama ko giuna.”

Waiguyau baneginama buabuanama wainasi-
nama

¹³ Banaga tenaḡa patara nopodie Yesu ya ri-uena, “Tauwai katakatai, tuaḡaguma kwa riue

da tauna dosi gagasidima e soiedi da tauna be taugu.” ¹⁴ Be Yesu ya riuena, “Badam, tam aitau ya riuem da taugu ami purapurama soienama yà tarapiriedi?” ¹⁵ Be Yesu taudi ya riuedina, “Ko kita kua da ġaromie nam purapura matabudi koi gogo, baninama taumi nam teneteneġina da inam purepuredie yawasana ko banavi!”

¹⁶ Dabudine Yesu uma wainasinama ya riuedina, “Raġan tenaġa purapura baneginama na sipima ya maurana. ¹⁷ Be inam baneginama tauna ya noġota munaġena, ‘Taugu yodi aba yà voie? Taugu yau gabuma nam teneteneġina da yau maurama yà damdi.’ ¹⁸ Dabudine tauna ya riuna, ‘Taugu è kataiena yodi aba yà voiena. Yau kanima vadedima yà kati weidi be vada dosidiġa yà keridi. Be dabudine yau maurama be yau purapura matabudi yà damdina. ¹⁹ Be dabudine taugu yà riu munaġeguna, Ya vere kauana, yodi aba yà nuaboye? Taugu yabedima veredima matabudi è ġoēġoedina yodi è ragaudina modi toitoi ruvedima. Yodi taugu yà sipere, yà kani, yà tego be yà nuaverena.’

²⁰ “Be Mamaitua ya riuena, ‘Tam bua! Man-aka kupine am yawasanama yà kaiporena, be aubaimma kuya vovo kaukauana tokare aitau e ragaudi?’

²¹ “Inam kauinama teneġinama nama tauna aitau dobue maurama ewai damna ġarone e tubuġana, be tauna nam Mamaitua ġarone na maurama imawai damna, ibewa.”

Nam koi nuaboya
(Mt 6:19-21, 25-34)

²² Be Yesu na tauwai muriwatanama ya riuedina, “Taugu yà riuriuemina da nam tubugimima na yawasanama aubainama koi nuaboya, aba sibo koya kani bo aba sibo koya kote tunimima aubainama. ²³ Baninama yawasananoḡotinama inam ya moraba vavasāḡana, nam maika kani, be tunimima noḡotinama inam ya moraba vavasāḡana, nam maika gara. ²⁴ Kiu gayogayo ko kitedi! Taudi nam tima sipisipina, be nam kani timawai damna. Be yaḡoro Mamaitua ewai kanidina. Be taumi noḡotimima inam ya moraba vavasāḡana, nam maika kiu. ²⁵ Tam aitau da inam yabedima kwawai nuaboyedina, tokare kwa mia watana, bo? ²⁶ Be taumi deḡoda inam yabedima ḡauḡaubodima nam tenetenēina da ko voiedi, naumeki da yaba ḡesaudima mate nam koi nuaboyedi!

²⁷ “Nanari dobire ta gogogogona ko kitedi. Taudi nam tima noyanoyana be gara nam tima voivoiedina. Be yà riuriuemina, avedi da guyau Solomon na garama veredima waimatakanikandima, be nam ai gara tenaḡa i vere vavasāḡana nanari maika. ²⁸ Be yodi berana ta gogo be Mamaitua ewai garedina ko kitekitedina, be pomai kaie ta gabu gorudina. Teneḡinama nama Mamaitua tokare tenetenēinama da taumi ei garemina! Taumi ami waisumaḡama ya ḡaubo kauana! ²⁹ Be mate kani be tego nam koi nuaboyedi! ³⁰ Dobu banegidima nam waiwaisumeḡidi inam yabedima tawai nuaboyedina. Taumi Tamemima marae ya kataie da inam yabedima ko ḡoeḡoedina. ³¹ Be taumi noḡone Ma-

maitua na waiguyauma ko wane dokena. Yodibe tauna inam yabedima matabudi e utemina.

³² “Taumi inam taugu yau yosima damnama ḡaubonama, nam koi nuaboya, baninama Tamemima tokare na waiguyauma e utemina.

³³ Ami purapurama ko raugimaredi be mane banaga waikaruwaḡewawḡedima ko utedina. Deḡoda nama ko voiana, tokare marae ami waiguyauma verevavasagīnama ko paḡona, be inam waiguyaunama nam airaḡan e kovi. Be nam aitu ami waiguyauma e danene bo kwarikwari ta kanidi. ³⁴ Baninama taumi ami waiguyauma vere vavasagīdima deḡo ta kenakenana, taumi ami noḡotama be nuemima tabutabunama inam dabudine ta kenakenana.

*Ko vokaukaua be koi rabana Yesu aubainama
(Mt 24:45-51)*

³⁵ “Raḡan matabuna ko vokaukaua wainonoḡa da ami kodamma ko gabudi be koi rabana, ³⁶ maika taunoya adi badama soie† ya naḡo be ta raberabena da e verau munaḡana, be raḡanine e tava munaḡa be e raupewapewana taudi waigapa ta dobi be matakeda ta kaiporena. ³⁷ Raḡanine Bada e verau munaḡa be na taunoyama a vokaukaua be tauna a raberabena e kitedina, inam raḡanine nuavere dosinama taunoya ḡarodie. Taugu yà riuriu kauemina inam raḡanine Bada na taunoyama e riuedi da taudi ta mia be tauna na taunoyama adi

† **12:36:** Yesu ya riuna: ‘Wainaḡi soinama’, baninama Israel nopone wainaḡi soinama ya dau kauana, be nam aitu I kataiena da airaḡan soi e kovi.

kanima e soiena. ³⁸ Inam raḡanine, taunoya avedi da kenavauvaue bo nobautuae, taudi yaḡoro a vokaukaua be tawai rabana. Be Bada e verau munaḡa da e kitana be na taunoyama a vokaukauana be awai rabana, inam raḡanine naumeki da nuavere dosinama taudi ḡarodie.

³⁹ “Uma ko noḡoti, deḡoda vada taupakinama sibo taudanene na kaba tavama raḡaninama i kataiena, naumeki da tauna tokare na gaburama ya bodame be baneginama nam na vadae ya saḡa be ya danene. ⁴⁰ Be taumi mate nama ko vokaukauana, baninama Banaga Natunama na verauma raḡaninama taumi nam koma noḡonoḡotina da tauna e tava, inam raḡanine tauna e tavana.”

⁴¹ Be Pita yai taravira be ya riuna, “Bada, uma wainasinama taumaḡa aubaimaima kuya giue bo banaga ḡesaudima mate?” ⁴² Be Yesu ya paribeenā, “Aba è riuriuemina, yodi nema ko noḡonoḡota bake? Aba taunoyanama waisumēḡina be nuauyauyanama, da bada inam taunoyanama e vine be tauna na banagama ei badedi be adi kanima e soiena? ⁴³ Raḡanine Bada e verau munaḡa be na taunoyama inam noyanama e voivoiena e kitana, naumeki da nuavere dosinama inam taunoyanama ḡarone. ⁴⁴ Yà riuriu kauemina da tokare Bada inam taunoyanama e vine da Bada na purapurama matabudi ei badedina. ⁴⁵ Be deḡoda taunoya tauname e riu munaḡe be e riuna, ‘Yau Badama bonika deḡo ya naḡona be nam ima veraverau munaḡana.’ Inam raḡanine tauna na banagama ḡesaudima riḡedima ei karena, dabudine tauna e

kanikani be e tegotego koakoa be e tego buana.
⁴⁶ Inam raġanine taunoya e miamia nuababaġa be Bada e verauna raġanine, tauna e dourakaraka be banaga nam waiwaisumegidi ġarodie e boru nawena. ⁴⁷ Be taunoya Bada na ġoanama ya kataiena, be nam i vokaukauana bo Bada na ġoanama nam i voivoiena, naumeki da tauna tokare kovoġa dosinama e paġona.

⁴⁸ “Be deġoda taunoya aitau Bada na ġoanama nam i kataiena be aba ya voia waigewana, tauna tokare kovoġa ġaubonama e paġona. Deġoda Mamaitua banaga yaba toitoi ya uteutena, tauna tokare inam baneginama ġarone yaba toitoi e ragaudina. Be Mamaitua banaga aitau yaba toitoi nimane ya biridi be e raberabedina, naumeki da inam baneginama yaba toitoi Mamaitua e ute munaġena.

Yesu kana taiye dariġa e tubuġana
(Mt 10:34-36)

⁴⁹ “Taugu è yovona kai karakaratina do buè è yovoġena, be yà noġonoġotina da kainama kaiteka e karatina. ⁵⁰ Taugu tokare babataito‡ bagibaginama yà paġona, be ma nuaboyagu naumeki da yà raudamoena. ⁵¹ Taumi ko noġonoġoti da taugu do buè è yovona suba è yovoġe, bo? Ibewa, nam suba be dariġa. ⁵² Yodi be nokoi e naġona vada tenaġa nopone banaga 5 tai kawa dariġa munaġana. Banaga rabuiteġa rabui mate tai saġasaġana, be banaga rabui rabuiteġa

‡ **12:50:** Uma babataitonama, baninama Yesu ya gurigurina ya giuena.

mate tai saḡasaḡana. ⁵³ Tametamedima, natunatudima tautauḡomidima mate tai saḡasaḡana, be natunatudima tautauḡomidima, tametamedima mate tai saḡasaḡana, be tinetinedima, natunatudima waiwaividima mate tai saḡasaḡana, be natunatudima waiwaividima, tinetinedima mate tai saḡasaḡana. Be rawanama visara mate tai saḡasaḡana, be visara rawanama mate tai saḡasaḡana.”

*Yodi raḡanine matairidima
(Mt 16:2-3)*

⁵⁴ Be Yesu banaga ya riuedina, “Taumi giyou ko kita be egasiḡa e naḡonaḡona, inam raḡanine ko riuriuna, ‘Yodi kusana e ḡoḡona’, be nama e tubu-tubuḡana. ⁵⁵ Be deḡoda sive oyaḡa e yovoyovona, inam ko riuriuna, ‘Yodi komra e tomna’, be nama e tubutubuḡana. ⁵⁶ Taumi banaga kaikaiy-ovumima! Taumi mataira gunume be doḡue kitawairuvedima koya kataiena. Be aba aubaina yodi raḡandima matairidima kitawairuvedima nam koma siasiava kauedi?

*Am gewagewama kwa kawa didimani dokena
(Mt 5:25-26)*

⁵⁷ “Taumi koi tarapiri munaḡemi da deḡo tauna didimana be riukaua. ⁵⁸ Deḡoda banaga tam e panim be e nawemna etara aubainama, naumeki da kedae kwa raurubu da am gewagewama kwa kawa didimana dokena. Inam raḡanine nam etara tauwai badenama e riuem be dibure kwa naḡo. ⁵⁹ Taugu ya riuriuemna da tam tokare nam dibura kwa doḡi pore naumeki da Toea damonama kwa kaiḡavutina.”

13

Nuenuemima nam ko vitaredi, tokare ko gurina

¹ Inam raḡanine banaga aitauga dabudi a tavatavana, taudi Yesu ḡarone ai maḡatarana da Galili provins banegidima ḡesaudima taudi musare Mamaitua ḡarone a rarau puyona maika, Paelat na tauḡarama inam banegidima ai guridina. ² Be Yesu ya riuedina, “Taumi ko noḡonoḡotina da inam banegidima nama ai nuatoitoi be a gurina adi gewagewama ya moraba kaua, nam banaga ḡesaudima maika, bo? ³ Ibewa, nam nama. Yà riuriuemina da nuemima nam ko vitaredi, taumi matabumi tokare nama ko gurina. ⁴ Bo banaga matabudi 18 ko noḡotidi, taudi raḡanine Siloamma be vada debedie ya beku be yai guridina. Taumi ko noḡonoḡotina da noa banegidima nama a gurina adi gewagewama ya moraba kaua, nam maika banaga ḡesaudima Jerusalemma nama, bo? ⁵ Ibewa, nam nama. Yà riuriuemina da nuemima nam ko vitaredi, taumi matabumi tokare nama ko gurina.”

Damaya nam votavotana wainasinama

⁶ Dabudine Yesu uma wainasinama ya riuedina, “Tauḡoma tenaḡa na sipie damaya ya midimidina. Be inam tauḡominama ya naḡona damaya banidima aubaidima, be nam i banavidina. ⁷ Vutuna aubainama tauna sipi taurabenama ya riuenā, “Taugu modi rabuiteḡa nopodie èi veraverauna damaya banidima wanedima aubainama, be nam airaḡan banidima e banavidina. Vutuna aubainama kwa taraḡa pore! Aba aubainama doḡa ewai yakare?”

⁸ “Be sipi taurabenama ya riuna, ‘Bada, kwa gosepore da modi tenaḡa nopone taugu yà kerì dobona. ⁹ Be degoda modi ḡesau nopone e banina, inam naumeki. Be ibewa, naumeki da kwa taraḡa porenà.’”

Yesu Sabat raḡanine waivi yai yawasanina

¹⁰ Sabat raḡanine Yesu sinagog tenaḡa nopone yawai katakaina. ¹¹ Be inam dabudine waivi tenaḡa nopone penama ya saḡa be ya voie da tauna ya sida kauana modi 18 a kovina, be nam teneteneḡina da sibo ya didimana munaḡa. ¹² Raḡanine Yesu inam waivinama ya kitakitana, tauna ya riue da ḡarone ya tava be ya riuenà, “Waivi, yodi am sidama ya kovina.” ¹³ Naumeki da Yesu nimanama waivi debane ya boru be yai raḡantenḡe da waivi ya didimana munaḡa be Mamaitua isanama ya kaisuḡuna.

¹⁴ Be sinagog taurabenama nuanama yai medi kauana, baninama Yesu tauna Sabat raḡanine banaga yai yawasanina. Dabudine sinagog taurabenama banaga ya riuedina, “Raḡan matabudi 6 ta kenakenana, inam noya na raḡanima. Inam raḡandie ko verauna waiyawasana aubainama be nam Sabat raḡanine!”

¹⁵ Be Yesu tauna ya paribee be ya riuna, “Taumi kaikaiyovumima! Matabumi Sabat raḡandie ami yosima nam komawai kanidi, bo?*” ¹⁶ Be uma waivinama Eibraham natunama, be Seitan ya pani be ya rabena modi 18 a kovina. Be yodi aba aubainama Sabat raḡanine nam

* **13:15:** Bo: Taumi matabumi Sabat raḡandie ami oks bo donki ko kuvesidi be upae ko nawedi be kowai tegodina.

sibo èi yawasani?” ¹⁷ Inam nama ya riuriuna raḡanine, na ḡaviama banegidima debedima ya suba kauana. Be banaga ḡesaudima nuedima ya vere kauana, baninama tauna yaba matabudi veredima ya voivoiedina aubainama.

Yauḡana pesinama be yist wainasinama
(Mt 13:31-32; Mk 4:30-32)

¹⁸ Yesu ya riuna, “Mamaitua na waiguyauma nema maika kitana? Nema yài tarapata bake da taumi ko kataie? ¹⁹ Inam maika pesi ḡaubonama† banaga ya paḡo be na sipie ya kuma be ya gogo ya moraba da kai dosinama ya tubuḡana. Be kiu a verau be ragane a rarau noḡina.”

²⁰ Be Yesu ya riu munaḡana, “Mamaitua na waiguyauma nema maika kitana? Nema yài tarapata bake da taumi ko kataie? ²¹ Inam maika yist waivi ya paḡo, parawa toitoi nopodie ya biridi, da ya gwada be parawa ya sasanana.”

Matakeda ḡuririnama
(Mt 7:13-14, 21-23)

²² Yesu tauna Jerusalemma ya naḡonaḡona, be kedae meagaiḡa banaga yawai katakataidina. ²³ Be banaga tenaḡa Yesu yai taravirena, “Bada, inam riukaua da banaga raubisaḡa tokare ta yawasana, bo?”

Be Bada ya riuedina, ²⁴ “Ko kaivavasaḡe da matakeda ḡuririne ko sonaḡana, baninama banaga toitoi ta rarau rubuna da ta sonaḡana, be tokare nam tenetenegina. ²⁵ Baninama raḡanine vada taupakinama e midisuḡu be matakeda

† 13:19: Gurik bonane ya riuna: Gaga pesinama. Be inam gaga ḡesau, tauna kai, nam taitai.

e guduna, dabudine taumi doḡae ko midī be matakedae ko raupewapewa be ko riuna, ‘Bada, matakeda aubaimaima kwa kaipore.’ Be tauna tokare umanama e paribeemina, ‘Taugu nam taumi e kataiemina. Taumi aikedae be koya tava?’ ²⁶ Dabudine taumi ko riuna, ‘Bada, tauma tam mate tē kanikani be tē tegotegona, be ama meagaiḡa kuyawai katakatai naḡona.’ ²⁷ Be tauna e riu munagēmīna, ‘Kaite naumeki è riuemina. Taugu nam taumi e kataiemina. Taumi aikedae be koya tava? Ko naḡo ḡavoe! Taumi nam uma dabudine ko saḡa, gewagewa tauvoienama.’

²⁸ “Dabudine taumi ko ḡaba gurata be gadi-gadimima ko sanadididina. Be dabudine taumi tokare Eibraham, Aisik, Jeikob be peroveta matabudi Mamaitua na waiguyauma nopone ta soisoina ko kitedina, be taumi tokare Mamaitua ei poraḡa dobigēmīna. ²⁹ Be Banaga dobu matabuna nopone tokare ta verauna, Mamaitua na waiguyauma nopone ta mia be Mamaitua na soima ta kanina. ³⁰ Naumeki da yodi ko kita, aitaḡa yodi ta dokadokana, taudi tokare tai murina, be aitaḡa yodi tawai murina, taudi tokare ta dokana.”

Yesu Jerusalem ewai nuaboyena
(Mt 23:37-39)

³¹ Inam raḡaninama tenegīne Parisi a verau Yesu ḡarone be a riuena, “Tam uma dobonama kwa dobi pore be kwa naḡona wari kedae, baninama guyau Herod e ḡoeḡoena ei gurimna.” ³² Be Yesu umanama ya paribeemina, “Ko naḡo be inam dakonama ko riuena, taugu manaka be

pomai penama banaga nopodie yai dobidina, be banaga sidesidedima yai yawasanidina, be mainokom̄go yau raḡanima e kovina. ³³ Be yodi taugu naumeki da yau noyama yà voiedina, manaka, pomai, be mainokom̄go mate, baninama nam i verena da peroveta wari kedae e guri, ibewa da Jerusalem̄ga nopone.

³⁴ “O Jerusalem, Jerusalem! Taumi peroveta kowai guridina. Mamaitua banaga e riuriu poraḡana ḡaromie, be taumi ko rarau yekudina! Raḡan ya toi kauana taugu è raurubu da è rawateḡeteḡeimina kamkam natunatunama mapenama dibune e rawarawa teḡeidina maika, be taumi nam ko ḡoena. ³⁵ Vutuna aubainama Mamaitua ami tempolma e gosena. Be taugu yà riuriuemina taumi nam ko kita munaḡegu, naumeki da raḡan e veraverauna e tavana, inam raḡanine taumi tokare umanama ko riuna, ‘Isanama tà kaisuḡu, tauna vutuna Bada isane e veraverauna!’ ”

14

Yesu Parisi na vadae tauḡoma yai yawasanina

¹ Sabat tenaḡa Yesu ya naḡona Parisi dosinama na vadae kani aubainama, be banaga tauna a kitakita watanina, ² baninama Yesu noḡonama yauwanine tauḡoma kaḡanama be nimanama sasasanidima ya miamiana. ³ Be Yesu Parisi be tarawatu tauwai katakataidima yai taraviredina, “Inam naumeki bo ibewa da Sabat raḡanine banaga tà yawasanina?” ⁴ Be taudi nam aba ti riuna. Naumeki da Yesu inam tauḡominama ya

taukoni da yai yawasani be ya riupore nawena. ⁵ Dabudine Yesu inam banegidima ya riuedina, “Tam aitauna tenaḡa natum bo am kauma kaikaivainama Sabat raḡanine dome i kuruvana, tam Sabat raḡanine aubainama tokare nam kuya soru tavaite, bo?” ⁶ Be taudi nam teneteneḡina da tauna sibo a paribee.

Ḡaubomunaḡa waikatakatainama

⁷ Raḡanine Yesu e kitana be ware gabu verediḡa a vinevinedina, tauna uma wainasinama ya riuedina, ⁸ “Raḡanine aitauna soie e kokonemna, nam kwa naḡo be guni poune kwa mia! Baninama deḡoda banaga ḡesaunama ya kokonena ya saḡa vavasagaḡana nam maika tam e veraverauna e tavana. ⁹ Inam raḡanine taupaka tokare tam e riuemna, ‘Kwa naḡo ḡavoe, inam banaga dosinama na gabuma.’ Dabudine tam kwa tunimayaḡa be doḡae kwa dobina.

¹⁰ “Vutuna aubainama raḡanine aitauna soie e kokonemna, naumeki da kwa naḡo be doḡae kwa miana! Be taupokonemma e riuemna, ‘Yau tura, kwa saḡa guni poune kwa mia!’ Inam raḡanine tam tokare ta kawa saḡemna. ¹¹ Baninama aitauna ta kawakawa saḡe munaḡedina, taudi tokare e biri dobiḡedina. Be aitauna ta biribiri dobiḡa munaḡedina, taudi tokare e kawa saḡedina.”

¹² Dabudine Yesu taupaka ya riuena, “Tam kani kwa vokaukauena raḡanine, nam am banagama bo tuatuaḡamma, am damma bo am banagama waiguyaudima kwa kokonedi, avedi, baninama taudi tokare tam ta kokonaḡaremna.

¹³ Be tam kani kwa vokaukauena raḡanine, banaga waikaruwaḡewaḡedima be nuakududima be tuera ragaragaudima be matapotepotedima, taudi kwa kokonedina. ¹⁴ Inam raḡanine tam nuavere dosinama kwa paḡona, baninama taudi nam aba ḡarodie da ta kokonaḡarem. Be didimana banegidima guriguridima ta midimidisuḡu mu-naḡana raḡanine, Mamaitua tam ei maesimna.”

*Soi dosinama wainasinama
(Mt 22:1-10)*

¹⁵ Dabudine tauḡoma tenaḡa Yesu mate a mia da a kanikanina, nama giunama e vaiena be tauna Yesu ya riuena, “Nuavere taudi aitaḡa Mamaitua na waiguyauma nopone ta mia tenaḡa be ta kanina.”

¹⁶ Be Yesu tauna ya riuena, “Raḡan tenaḡa banaga tenaḡa ya soisoina, be soinama nopone banaga toitoi ya kokonedina. ¹⁷ Raḡanine soi ya vokaukaue ya kovina, da na taunoyama ya riupore da na warema riuedima aubainama. Be taunoya ware ya riuedina, ‘Ko verau! Yaba matabudi kè vokaukua rovodina.’ ¹⁸ Be ware matabudi a raugudutaraga da kabe adi noyama ti kenakena. Ware dokadokanama ya riuna, ‘O ebom, taugu yodi ḡoma yau doḡama è gimeri be ya naḡonaḡona kitanama aubainama. Tokare nam ya verau!’ ¹⁹ Be ḡesaunama ya riuna, ‘O ebom, taugu yau kauma kaikaivaidima 10 è gimara be yodi ya naḡonaḡona ya raurubudina, aubainama da nam ya verau.’ ²⁰ Be waḡesaunama ya riuna, ‘O ebom, taugu yodi ḡoma èi naḡina, vutuna aubainama da nam ya verau.’

21 “Dabudine taunoya ya munaḡa be riudima matabudi na badama ḡarone yai maḡataridina. Naumeki be na badama nuanama yai medi kaua be na taunoyama ya riuena, ‘Kwa naḡo makai meagai dosinama nopone keda dosidie be kedoraga be banaga waikaruwaḡewaḡedima be banaga tunidima nuakududima be tuera raragaudima be matapotepotedima taudi kwai doka verauḡedina.’ 22 Naumeki da, taunoya yaba matabudi ya voia kovidu be ya riuna, ‘Bada yaba matabuna kuya riuriueguna è voidina, be yaḡoro gabu e kenakenana.’ 23 Be bada na taunoyama ya riuena, ‘Kwa naḡo diadiaḡa be banaga kwa segeridi be ta verau da yau vadama tai moḡavuna!’ 24 Taugu ya riuriuemina da taudi aitaḡa noḡone è kokonedi be a gudugudu tarana nam aitaḡa tenaḡa yau soima kaninama e sanarubu.”

*Yesu waimuriwatanenama na giuma
(Mt 10:37-38)*

25 Inam raḡanine patara dosinama Yesu mate a naḡonaḡona. Be tauna yai tautinamuri ḡarodie be ya riuedina, 26 “Deḡoda aitaḡa waimuriwataneguma e ḡoena, inam naumeki, be deḡoda tamanama, tinanama, na waivima, natunatumama, tuatuaḡanama, tasitasinama, nuvunuvunama bo tauname na yawasanama ei nupaḡo guratedina, nam maika taugu, tauna nam teneteneḡina da taugu yau tauwai muriwatana. 27 Be deḡoda aitaḡa nam na korosima e kiroḡi* be ei

* **14:27:** Korosi kiroḡinama inam kwai nuatoitoina, maika Yesu korosie yai nuatoitoina.

muriwatanegu, tauna nam teneteneḡina da taugu yau tauwai muriwatana.

²⁸ “Deḡoda tam aitau vada dosinama kerinama kwai nuanogonogotena, noḡone tam kwa mia be kwa kita da mane teneteneḡinama, naumeki da vada kwa kerina. ²⁹ Baninama deḡoda vada pakanama kerinama kwai karena be nam teneteneḡina da kwai kovi, inam raḡanine banaga matabuna tokare vada ta kita be ta kwatevem ³⁰ be ta riuna, ‘Uma baneginama vada kerinama yai karena, be nam teneteneḡina da ei kovi.’

³¹ “Bo deḡoda guyau tenaḡa, na tauḡarama 10 tausand mate muriḡa da ta naḡona iḡara aubainama, tauna noḡone e mia be ei nuanogonogota da tauna teneteneḡina bo ibewa da guyau ḡesau na tauḡarama 20 tausand mate tai iḡara. ³² Be deḡoda e noḡoti be nam teneteneḡina, naumeki da taudi madanie be banaga e riu-poredina guyau ḡesau ḡarone suba waibaḡenama aubainama. ³³ Inam kauinama teneḡinama nama tam aitau am ḡoanama matabudi nam kwa gosaḡa, tam nam teneteneḡim da yau tauwai muriwatana.

(Mt 5:13; Mk 9:50)

³⁴ “Buta inam yaba verenama. Be deḡoda buta dininama e gewagewana,† tokare nema kwa voia bake da e dini munaḡa? ³⁵ Inam butanama nam sipi bo mui waidamnama mate tai rawateḡei be

† **14:34:** Anikunee banaga ḡesaudima mane dosinama paḡonama a ḡoena aubainama, buta gimori mate ai rawateḡeidina, vutuna aubainama buta ya gewagewana. Deḡoda tauda tà ḡoena maika buta verenama, naumeki da tauda dà yawasanama nam tàì mira.

tenetenegina,‡ ibewa, inam butanama nam na noyama aba, tokare banaga ta pore kaiyatina. Değoda beemima ta kenakenana, naumeki da koi beavaia kauana.”

15

Sipu kwakokwakonama wainasinama (Mt 18:12-14)

¹ Dabudine teks tautamina be gewagewa banegidima ġesaudima mate Yesu wai-beavaiena ama a tavana. ² Be Parisi be tarawatu tauwai katakataidima momodu ai kare be a riuna, “Uma baneginama ko kita, tauna banaga gewegewedima ei aninedi be mate ta kanikanina.”

³ Vutuna aubainama Yesu uma wainasinama ya riuedina, ⁴ “Değoda tam aitau am sipuma 100 be tenaġa i kwakona, tam tokare aba sibo kuya voie? Tam tokare sipu 99 gabu verene kwa gosaġa be kwa naġo da tenaġa kwa wanena, be kwa banavi da naumeki. ⁵ Be kwa banavina raġanine, tam ma nuavereverem ragame kwa boru ⁶ be kwa kiroġa nawe munaġena am vadae. Be dabudine am banagama kwa riu gogonidi be kwa riuedina, “Tài nuavere tenaġana, baninama yau sipuma ya kwako be è banavi munaġena.’

⁷ Yà riuriuemina da uma kauinama tenegina nama marae, deġoda banaga gewagewanama tenaġa na noġotama e vitarena, tauna debane tokare nuavere dosinama e tubuġana. Be nam

‡ **14:35:** Jius banegidima buta sipie ta boruboruna, sipie ta gogo kauana aubainama. Be mui waidamne mate ta boruboruna da mui e bova kua da muriġa sipie ta boruna aubainama.

banaga 99 maika, taudi noḡota vitara nam tima ḡoeḡoena, baninama taudi ta noḡonoḡotina da kabe banaga didimanidi.

Sirin taitaikuruvinama wainasinama

⁸ “Bo waivi tenaḡa ḡarone sirin matabudi 10. Be deḡoda tenaḡa i taikuruvina, tauna tokare aba sibo ya voie? Tauna kodam ya gabu, be vada ya rauḡiriḡiri be yai wanawana kauana, ya banavi da naumeki. ⁹ Be ya banavina raḡanine, na banagama ya riu gogonidi be ya riuedina, ‘Tài nu-avere tenaḡana, baninama yau sirinma taitaikuruvinama è banava munaḡena.’ ¹⁰ Yà riuriuemina da uma kauinama teneginama nama deḡoda gewagewa baneginama tenaḡa na noḡotama e vitaredina, tokare Mamaitua na aneama tai nu-avere kauana.”

Tauḡoma kwakokwakonama wainasinama

¹¹ Yesu na giuma ya kaiwatani be ya riuna, “Tauḡoma tenaḡa be natunatumama tau-tauḡomidima rabui. ¹² Be tauḡoma natunama tautasinama tauna tamanama ya riuena, ‘Mamai, taugu yau sikerema kwa utegu.’ Naumeki da tamanama mane ya sikeredi da tauna na sikerema ya utena.

¹³ “Naumeki da raḡan ḡaubonaḡa be gomana tautasinama na sikerema ya ragaudi be ya naḡona wari dobue. Be dabudine bua na miae ya mia be na sikerema matabuna yai yakaredina.

¹⁴ Raḡanine na sikerema matabuna yai kovina murine, inam dobunama meḡara raḡaninama ya tavana, be tauna wainuatoitoyai karena.

¹⁵ Vutuna aubainama tauna ya naḡona inam

dobunama baneginama ġarone noya aubainama. Naumeki da dobunama baneginama tauna ya riupore nawena na bawama rabedima aubainama. ¹⁶ Dabudine tauġoma kani ya karati be bawa adi kanima sibo ya kanina, be yosi taupakinama nam i aninena.

¹⁷ “Inam raġanine tauġoma noġota debane ya saġasaġana, be tauna ya riuna, ‘Tamaguma ġarone taunoya toitoi be taudi ġarodie kani ya toi vavasāġana, be nam tima kanikani rovodina, be taugu uma dabudi yà miamia kanigurina. ¹⁸ Taugu yà midisuġu be yà munaġana tamaguma ġarone be yà riuena: Mamai, taugu gewagewa è voiena Mamaitua ġarone be tam ġarome. ¹⁹ Taugu nam teneteneġigu da ta riueguna tam natum; be kwa voiegu da maika am taunoyama tenaġa.’

²⁰ “Dabudine tauġoma ya midisuġu be ya munaġana tamanama ġarone. Tauna yaġoro madanie be tamanama yawai kita da gomana ya kita be nuanama yai poya kauana. Naumeki da tauna ya manini natunama ġarone da natunama ya tika be yai suruvena. ²¹ Be natunama tamanama ya riuena, ‘Mamai, taugu gewagewa è voiena Mamaitua ġarone, be tam ġarome. Taugu nam teneteneġigu da ta riueguna tam natum.’

²² “Be tamanama na taunoyama ya riuedina, ‘Waiġapa ko naġo be gara verenama ko paġo be natuguma koi garana. Be rin nimane ko boru be kaġasuma kaġane ko boruna. ²³ Kau natunama momomoninama koi guri da tà soi be tà nuaverena. ²⁴ Baninama uma natuguma tauna ya gurina, be yodi ya yawasana munaġana,

tauna ya kwakona, be yodi è banavi munaḡena.’ Naumeki da soi ai karena.

²⁵ “Inam raḡanine gomana tautuaḡa tauna yaḡoro sipie. Be tauna ya munamunaḡana vadae. Be tauna vada diane ya tava da e vaiena be banaga a saresare be a bigabigana.

²⁶ Naumeki da taunoya tenaḡa ya yokoe be yai taravirena, ‘Aba e tubutubuḡa?’ ²⁷ Be taunoya ya riuna, ‘Tasimma ya tava munaḡana, aubainama tamamma kau natunama momomoninama yai gurina. Baninama natunama ya banavi munaḡena aubainama, be nam aba gewagewanama i banavina.’

²⁸ “Dabudine gomana tautuaḡa nuanama yai medi kaua be nam vadae naḡonama i ḡoena. Vutuna aubainama tamanama ya dobi be ya riuwai nuabigabigana. ²⁹ Be tauna tamanama ya riuna, ‘Kwa kita, taugu suara toitoi aubaimma è noya guratana be nam airaḡan, am riuna è rawaḡaiḡaiena. Be taugu nam airaḡan musara ḡaubonama* ku ute rubugu da yau banagama mate kei nuaverena, ³⁰ be natumma inam am mane be yaba matabuna yai yakaredina toretore waiwaividima ḡarodie. Be yodi ya tavatava munaḡana tam kau natunama momomoninama tauna aubainama kuyai gurina.’

³¹ “Be tamanama ya riuna, ‘Taukui, tam raḡan matabuna taugu mate tà miamiana, be yaba matabuna taugu ḡaroguma, inam tam ḡaromma. ³² Be yodi inam ya verena da tauda tà soi be tà nuaverena, baninama tasimma ya guri, be yodi

* **15:29:** Gurik bonane ya riuna: ‘Goat ḡaubonama’

ya yawasana munaḡana. Tauna ya kwakona, be yodi è banava munaḡena.”

16

Stoa taurabenama kaikaiyovunama wainasi-nama

¹ Yesu na tauwai muriwatanama ya riuedina, “Stoa taupakinama ḡarone stoa taurabenama ya miamiana. Be banaga stoa taupakinama a ri-uena da tauna na stoama taurabenama mane ya danedanenedina. ² Dabudine stoa taupakinama yodi stoa taurabenama ya yokoe be ya riuenta, ‘Inam aba giunama ḡarome è vaie? Am noyama kuya voivoiena yà kita. Tam nam airaḡan yau stoama kwa rabe munaḡe.’

³ “Be stoa taurabenama taunaḡa ya riu munaḡena, ‘Aba yodi yà voie, bada yau noyama ya kaiporena aubainama? Taugu nam waire-wapanigu da noya dosinama yà voidi, be banaga kiḡiedima taugu è tunimayaḡana. ⁴ Yodi è kataiena aba yà voie da banaga ḡesaudima ta rabeguna yau noyama e kovikovina raḡanine.’

⁵ “Naumeki da stoa taurabenama banaga aitaḡa stoe awai bukinna banegidima ya riuedi da ḡarone a tavana. Be dokadokanama ya ri-uena, ‘Am bukinma bisa yau badama ḡarone?’ ⁶ Be tauna ya paribeena, ‘Oeri duramdima 100.’ Be stoa taurabenama ya riuenta, ‘Am bukinma pepanama kwa paḡo, be kwa girumina 50.’ ⁷ Be murine ḡesau ya riuenta, ‘Tam, am bukinma bisa yau badama ḡarone?’ Be tauna ya riuna, ‘Wit begidima 1 tausand.’ Be stoa taurabenama ya

riuenā, ‘Am bukinma pepanama kwa paḡo be kwa girumina 800.’

8 “Be stoa taupakinama tauna na stoama taurabenama kaikaiyovunama ya basena, baninama stoa taurabenama na nuauyauyae na yawasanama kedanama ya voivoiena aubainama.” Be Yesu ya riuna, “Uma dobunama natunatumana mane mate waitureninama a katai kauena, nam yana natunatumana maika, ⁹ vutuna aubainama yà riuriuemina, banaga ḡesaudima manee gewagewa ta voivoiedina, be taumi ami manee banaga ko sagudi da bada ta banavina. Inam taudi taumi ami banagama, be tokare mane e kovina raḡanine, taumi marae tai aninemina.

10 “Deḡoda tam yaba ḡauḡaubodie be vere kwa voiedina, naumeki da tam tenetenegina tokare yaba dosidie vere kwa voiedina. Be deḡoda tam yaba ḡauḡaubodie nam vere kwa voiedi, naumeki da tam tokare nam tenetenegina da yaba dosidie vere kwa voiedi. ¹¹ Deḡoda taumi dobu yabedima nam ko rabe kauedi, naumeki da taumi tokare Mamaitua nam ei sumaḡemi be mara yabedima e utemi. ¹² Be deḡoda taumi banaga ḡesaudima adi purapurama nam ko rabe kauedi, naumeki da taumi tokare Mamaitua nam ei sumaḡemi be purapura e utemi.

13 “Nam ai taunoya tenetenegina da babada rabui ḡarodie ei yaraga. Deḡoda e ḡoena, naumeki da noḡone badanama e tuaḡaie be murine badanama e ḡoena, bo noḡone badanama e ḡoena, murine badanama e tuaḡaiena. Taumi

nam mane be Mamaitua ġarodie koi yaraga tenaġa!”

*Mousis na tarawatuma be Yesu riunama
(Mt 11:12-13; 5:18, 31-32; Mk 10:11-12)*

¹⁴ Raġanine Parisi uma riudima a vaivaiedina, taudi Yesu ai kwatekwatevena, baninama mane nuedima ya paġona aubainama. ¹⁵ Be Yesu taudi ya riuedina, “Taumi banaga matedie ko voivoia munaġemina da kabe veremi, be Mamaitua taumi nuemima noponama ya kataiena. Yaba banaga e noġonoġotina da kabe yaba dosidi, be inam yabedima Mamaitua matane a gewagewa vavasagana.

¹⁶ “Noġone taumi Mousis na tarawatuma be peroveta adi girumama ġaromie a kenakenana. Raġanine Jon tauwai babataito ya tavatavana, dabudine taudi adi raġanima ya kovina. Be dabudine vari verenama Mamaitua na waiguyauma riunama ya rarau guguyena. Be banaga matabudi ta rarau rubuna da Mamaitua na waiguyauma nopone sibo a saġana. ¹⁷ Mara be dobu teneteneginama da ta samoana, be Mamaitua na tarawatuma, avedi da ġauboġominama be tokare nam e samoa.

¹⁸ “Aitau na visarama e gose be waivi ġesaunama e naġina, tauna na waivima debane mui e poreporena. Be deġo tauġominama na waivima e tuaġaie be e gosena, be wari tauġoma inam waivinama e naġina, tauna turanama debane mui e poreporena.”

Purapura baneginama be Lasares

19 Be Yesu ya riuna, “Raḡan tenaḡa purapura baneginama tauna na garama waimatakanikani-dima ya kotekotedina maesidima dosidima. Be vada maesadonanama nopone ya miamiana. Be dabudine na purapurama damnama a kenakenana. Be tauna raḡan matabuna yawai nuaverena. 20 Be na vadama matakedane taukiḡikiḡi wainuatoitoinama ya kenakenana, tauna isanama Lasares. Be tauna tuninama kero-kero ya moḡavuna. 21 Be Lasares tauna ya kena be yawai noḡotana da purapura baneginama na kanima kurekuredima sibo ya kanidina. Be daḡadaḡasi a tavana da keronama a remoremodina. 22 Naumeki da raḡan tenaḡa Lasares ya guri be anea a kiroḡa nawe da Eibraham diane ya miana. Murine purapura baneginama ya guri be a dobona. 23 Be banaga guriguridima aruidima adi gabue tauna ma tunimuyana ya miamiana. Be ei kitasaḡana be madanie Eibraham be diane Lasares ya miamiana ya kitedina.

24 “Dabudine ya yokona, ‘Mamai Eibraham, kwa raunuatoiegu be Lasares kwa riupore da upa nimarakurakune ei buta be e yovo da menaguma ei subana, baninama taugu yàwai nuatoitoina uma kai menamenane.’

25 “Be Eibraham ya riuna, ‘Natuguma, tam am raḡanie kwa noḡoti! Yaba matabudi vereveredima tam ḡarome, be Lasares tauna yaba matabuna ya marumaruabiedina. Vutuna aubainama yodi Lasares nuanuanama e subasubana, be tam kwawai nuatoitoina. 26 Be yaba ḡesaudima mate inam, tam be tauma poude siḡuḡu dosinama e kenakenana. Vutuna

aubainama banaga ġarome veraunama ta ġoēgoena be nam tenetenēina. Be kauinama tenēinama nama banaga tauma ġaromaie veraunama ta ġoēgoena be nam tenetenēina.’

²⁷ “Naumeki da purapura baneginama ya riuna, ‘Inam naumeki mamai, be yāwai baġamna da Lasares kwa riupore nawena tamagama na vadae ²⁸ da tasitasiguma 5 nuedima e boru da taudi nam uma tunimuya dosi kaukauinama gabune ta verau, maika taugu.’

²⁹ “Be Eibraham ya riuna, ‘Tasitasimma taudi Mousis be peroveta riudima ġarodie da tai beavaiedina.’

³⁰ “Be purapura baneginama ya riuna, ‘Ibewa mamai Eibraham, inam nam tenetenēina, be deġoda banaga gurigurinama sibo i midisuġu munaġa be i naġona ġarodie, inam raġanine taudi tokare adi noġotama a vitaredina.’

³¹ “Be Eibraham ya riuna, ‘Deġoda taudi Mousis be peroveta adi giuma nam tai beavaiedi, naumeki da tokare banaga gurigurinama sibo i midisuġu munaġana, taudi yaġoro nam ai sumaġe.’”

17

Gewagewa be waisumaġa (Mt 18:6-7, 21-22; Mk 9:42)

¹ Yesu na tauwai muriwatanama ya riuedina: “Raġan matabuna yaba ġesaudima banaga ta raurubudi da gewagewa ta voivoiedina. Be taumi aitauġa ami banagama raurubue ko biridi be gewagewa ta voivoiedina, ko kita kauana.

² Deḡoda tam aitaŋ yau banagama bo yau sedama gewagewae kwa biri nawedina, ya verena da tam gadome sibo yeku dosinama a pani be egasie sibo a pore nawemna. Be nam i verena da Mamaitua tokare kovoḡa dosinama e utem. ³ Vutuna aubainama aba ko voivoiena, ko kita kauana. Deḡoda tauwai sumaḡa ḡesau gewagewa e voivoiena, naumeki da kwa riutuagāiena. Be deḡoda tauna na noḡotama e vitarena, naumeki da na gewagewama kwa noḡota porena. ⁴ Be deḡoda ḡarome gewagewa 7 ya voiedina raḡan tenaḡa nopone, be e noḡota vitara be raḡan 7 e verau ḡarome be e riuna, ‘Ehom, taugu gewagewa ḡarome è voiedina’, naumeki da na gewagewama kwa noḡota poredina.”

⁵ Be apasol Bada a riuna, “Ama waisumaḡama kwai morebi!” ⁶ Be Bada ya paribeedi be ya riuna, “Deḡoda taumi ami waisumaḡama ḡaubonama yauḡana pesinama maika, inam teneteneḡinama da tokare uma kainama mobiri ko riuna, ‘Kwa nuakamoḡa ma waramim be egasie kwa pore nawem!’ Be tauna tokare e voteyeteyemina.

Taunoya adi noyama

⁷ “Deḡoda tam aitaŋ sibo ḡarome taunoya be tauna ya suasuata bo sipu ya raberabedina. Be raḡanine na noyama yai kovi be ya tavana vadae, tam tokare umanama kuya riu bo ibewa, ‘Yodi kwa mia be kwa kani?’ ⁸ Ibewa, tam agunai tokare umanama kuya riuna, ‘Taunoya, yau kanima kwa raubuka’, be muriḡa sibo kuya riuna, ‘Yau kanima kwa vokaukaue be ya kanina. Be raḡanine taugu ya kani be ya tego rovona,

murine tam kwa mia da kwa kani be kwa tegona.’
 9 Inam raḡanine bada bonanama na taunoyama ya voteyeteyena aubainama, tokare ei kaiwe bo ibewa? Ibewa! 10 Inam nama taumi, raḡanine yaba matabuna Mamaitua e riuriuemi be ko voivoiedina, naumeki da taumi umanama ko riuna, ‘Tauma taunoya yababa. Naumeki da ama noyama kè voiena.’ ”

Yesu tautauḡoma 10 yai yawasanidina

11 Yesu ya nanaḡona Jerusalemma maika, tauna Samaria be Galili provins poudiḡa ya naḡonaḡona. 12 Be raḡanine meagaie ya tavatavana, dabudi tautauḡoma kito ragaragaudima matabudi 10 Yesu ḡarone a tavana da ḡavoe a midi be bonedima dosine a yokona, 13 “Yesu, Bada, kwa raunuatoiemai!”

14 Yesu ya kitedi be ya riuedina, “Ko naḡo pirisi ḡarodie be koi kataiemina!”* Naumeki da taudi pirisi ḡarodie a naḡonaḡona maika, taudi kedae a vere munaḡana. 15 Dabudine tauḡoma tenaḡa ya kita munaḡe da tauna ya yawasanana, naumeki da ya munaḡa be bonanama dosine Mamaitua isanama ya kaisuḡusuḡuna. 16 Be inam tauḡominama Yesu kaḡapakane noḡone ya beku da ya raudunee be yai kaiwena. Be inam tauḡominama, tauna Samaria baneginama.

17 Be dabudine Yesu ya riuna, “Banaga matabudi 10 a yawasanana, be banaga ḡesaudima

* **17:14:** Raḡanine uma sidanama banaga ya paḡona, tauna nam teneteneḡina da banaga ḡesaudima mate ta mia. Be raḡanine sida a verena, noḡone pirisi e kita dokedi be ei aninedina da taudi banaga mate ta miana.

9 deḡo? 18 Aba aubainama uma madani baneginama taunaḡa Mamaitua waikaiwenama ya tava, be ḡesaudima ibewa?” 19 Be Yesu inam tauḡominama ya riuena, “Kwa midisuḡu be kwa naḡo, am waisumaḡama yai yawasanimna.”

Mamaitua na waiguyauma be Banaga Natunama na raḡanima†

(Mt 24:23-28, 37-41)

20 Be Parisi Yesu ai taravirena, “Airaḡan Mamaitua na waiguyauma e verau?” Be Yesu umanama ya paribeedina, “Mamaitua na waiguyauma nam aiyaba maika e verau be tokare ko kita, 21 be nam aitau e riuna, ‘Ko kita, umanema’ bo ‘Ko kita noanema.’ Baninama Mamaitua na waiguyauma inam nopomie.”‡

22 Dabudine na tauwai muriwatanama ya riuedina, “Raḡan e veraverauna e tavana raḡanine, taumi koya ḡoḡoḡe guratena da Banaga Natunama na raḡanima sibo koya kitana, be tokare nam ko kita. 23 Inam raḡandie banaga tokare ta riuemina, ‘Ko kita, Keriso umanema!’ bo ‘Ko kita, Keriso noanema!’ Be nam ko naḡo bo koi muriwatanedi! 24 Banaga Natunama na raḡanima ei raḡantenāḡe be keama maika e kidi be gunuma matabuna e yana porena. 25 Be noḡone tauna ei nuatoitoi guratana be uma kimtinama banegidima tauna ta tuaḡaiena.

26 “Banaga Natunama na raḡanima inam Noa na raḡanie maika: 27 Banaga a kanikani, a

† 17:19: ‘Banaga Natunama na raḡanima’ inam raḡanine Bada Yesu e verau munāḡana. ‡ 17:21: ‘Mamaitua na waiguyauma nopomie’ bo ‘poumie’.

tegotego, awai naḡi be awai naḡidina. Nama a voivoia be Noa waga ak nopone ya saḡana, be kabaita ya tubuḡa da banaga matabudi yai guridina.

²⁸ “Bo Banaga Natunama na raḡanima inam Lot na raḡanie maika: Banaga a kanikani, a tegotego, a gimagimara, awai kawa gimagimara, a kumakuma be a vadavada kerina. ²⁹ Inam raḡanine Lot Sodom ya gosena, be kai menanama be yeku monamonaunidima isedima salfa marae a kuruva dobi be banaga matabudi ai guri rovodina. ³⁰ Inam kaudima tenegidima nama banaga tokare ta voivoiedi be Banaga Natunama e maḡatarana. ³¹ Inam raḡanine aita da vada debane kuya miamia be am purapurama vada nopone, nam kwa naḡo be kwa ragau. Be aita da sipie, nam vadae yaba kuya gosagosagaḡana kwa noḡotidi! ³² Lot na visarama ḡarone aba ya tubuḡana ko noḡoti! ³³ Aita na yawasanama dobue e raberabena, tokare na yawasanama ḡarogue e kawa gewagewana. Be aita na yawasanama ewai utaena, naumeki da yawasanama ḡarogue ya banavina. ³⁴ Ya riuriuemina, inam kupine gunie banaga rabui ta kenakena be tenaḡa tokare ta nawena, be ḡesau e kena kwasana. ³⁵ Banaga rabui ta rarau riti be tenaḡa e kaiporena be ḡesau e mia kwasana.” ³⁶ (-)§

³⁷ Be na tauwai muriwatanama ai taravirena, “Bada, uma kaudima deḡo dabudi ta tubuḡa?”

§ 17:36: Vers 36 inam banaga muriḡa baibol nopone a boru saḡana, noḡone nam i kenakenana. Vers 36 inam umanama: Banaga rabui sipie, be tenaḡa ya kaipore be ḡesau e mia kwasana.

Be tauna ya riuedina, “Deḡo musara gurinama e kenakenana, dabudine naboduba** ta rawa-teḡeidina.”

18

Kaiyababa be tauwai tarapiri wainasinama

¹ Naumeki be Yesu na tauwai muriwatanama wainasi ya riuedi be yai katakataidi da taudi raḡan matabuna sibo a moimoiragina, be nam a tunituaḡai. ² Tauna uma wainasinama ya riuedina, “Meagai tenaḡa nopone tauwai tarapiri ya miamiana. Tauna Mamaitua nam i nainaire be banaga nam i viviviredina. ³ Be inam meagaina kaiyababa mate ya miamiana. Tauna tauwai tarapiri ḡarone ya verau be yawai baḡana, ‘Kwa kaisagugu, baninama tauwai wavuguma raḡan matabuna ewai ḡavieguna.’ ⁴ Be kaiyababa raḡan bisanama tauwai tarapiri yai baḡana be nam i sagu rubuna. Be raḡan tenaḡa tauwai tarapiri tauname ya riu munāḡena, ‘Avedi taugu Mamaitua nam ama nainairena bo banaga nam ama viviviredina, ⁵ be uma kaiyababinama e riuriu ḡasakirieguna, vutuna aubainama naumeki da yà kaisaguna, muriḡa be waiveraverau e kawa nuāḡaroguna.’ ”

⁶ Be Bada ya riuna, “Tauwai tarapiri gewagewanama nema ya riu bakona, taumi koya vaie? ⁷ Taumi ko noḡonoḡotina Mamaitua na vinevinema banegidima kupi da suara sagu ta

** **17:37:** ‘Naboduba’ inam maika kiu isanama ‘vulture’. Taudi musara deḡo e gurina be waigapa ta tavana. Be matabudi a kataiena da musara deḡo dabudi e kenakenana.

gābeḡabena, nam adi nuaboyae e sagudi, bo? Bo tokare nuatauḡa e sagudi, bo? ⁸ Ibewa! Tauna waiḡapa adi nuaboyae e sagudina. Be raḡanine Banaga Natunama e tava munaḡana doḡue, tauna tokare banaga waisumeḡidima e banavidi bo ibewa?”

Parisi be teks tautaminama wainasinama

⁹ Banaga aitaḡa ta noḡonoḡotina da taudi kabe banaga veredi, be banaga ḡesaudima ta kitakita tuaḡaiedina. Vutuna aubainama Yesu uma wainasinama inam banegidima ya riuedina: ¹⁰ “Raḡan tenaḡa banaga rabui a saḡa a naḡona tempol nopone moiragi aubainama, tenaḡa Parisi be ḡesau teks tautaminama. ¹¹ Be Parisi taunaḡa ya miditeḡa be tauname aubainama ya moiragi be ya riuna, ‘O Mamaitua, yàwai kaiwemna da taugu nam ama noḡonoḡota munaḡegu be ama danedanenena, be taugu yau visarama debane nam mui ama poreporena, banaga ḡesaudima maika. Yàwai kaiwemna da taugu nam noa baneginama teks tautaminama maika. ¹² Taugu wiki tenaḡa nopone raḡan rabui yà widiwidina be yau purapurama yà rawadamdamdi da matabudi 10 be tenaḡa tam yà uteutemna.’

¹³ “Be teks tautaminama tauna noa madanie ya midimidina nam ḡaubonaḡa noḡonama i tausuḡuna marae. Tauna nimane nuakadanama ya rauriḡa be ya riuna, ‘O Mamaitua, kwa raunuatoiegu, taugu gewagewa banegiguma.’ ¹⁴ Taugu yà riuriuemina, Mamaitua teks tautaminama ya kawa didimani be ya naḡona na vadae, be Parisi ibewa. Baninama banaga aitaḡa

tauname e kawakawa saḡe munaḡena, tokare Mamaitua tauna e boru dobiḡena. Be banaga aitau tauname e boruboru dobiḡa munaḡena, tokare Mamaitua tauna e kawa saḡena.”

*Yesu be seda ḡauḡaubodima
(Mt 19:13-15; Mk 10:13-16)*

¹⁵ Banaga ḡesaudima Yesu ḡarone adi sedama a veraverauḡedina da sibo yai aiainidina. Be na tauwai muriwatanama nama a kitekitedina, taudi a riutuḡaiedina. ¹⁶ Be Yesu seda ya riuedi da ḡarone be ya riuna, “Seda ko gosedi da ḡarogue ta verauna, be nam koi ḡakedi, bani-nama Mamaitua na waiguyauma inam banaga maika umanama sededima aubaidima. ¹⁷ Uma ko noḡoti, aitau da nam Mamaitua na waiguyauma e paḡo gomana ḡaubonama maika, naumeki da tauna inam waiguyaunama nopone nam e saḡa.”

*Purapura baneginama
(Mt 19:16-30; Mk 10:17-31)*

¹⁸ Jius adi badama tenaḡa Yesu yai taravirena, “Tauwai katakatai veremma, aba yà voie da yawasana kenakena nonoḡinama yà paḡo?” ¹⁹ Be Yesu ya riuena, “Aba aubainama kwawai isaguna vere? Nam aitau verena be Mamaitua taunaḡa. ²⁰ Tam riuvavasaga kuya kataiedi bo ibewa? Nam monaḡemma debane mui kwa pore, nam kwa vunuga, nam kwa danene, nam kwa kaiyovu, tamam be tinamma kwa viviredi!”

²¹ Be tauḡoma ya paribee be ya riuna, “Raḡanine taugu vaugue da yodi uma riudima matabudi è vovo teyetedina.” ²² Be Yesu nama riu-nama ya vaivaiena, tauna ya riuna, “Yaḡoro

yaba tenaḡa tam kwa gosegosena. Tam yaba matabudi ḡarome kwa gimaredi be mane banaga waikaruwaḡewaḡedima kwa utedina, be tam marae kwai purapurana. Yodibe tam taugu kwai muriwataneguna!” ²³ Be raḡanine tauḡoma uma riunama ya vaivaiena, tauna yai nuaboya kauana, baninama tauna yai purapura kauana aubainama.

²⁴ Yesu inam tauḡominama ya kita be ya riuna, “Purapura banegidima taudi Mamaitua na waiguyauma nopone saḡanama ḡarodie ya piripiri kauana. ²⁵ Kamel ya bagibagi kauana da seyau gavogavone e sonaḡana, be nama purapura baneginama tauna Mamaitua na waiguyauma nopone saḡanama ya bagibagi da bagibagi kauana.”

²⁶ Be banaga aitaḡa nama a vaivaiena ai taravirana, “Tauma kè noḡoti da purapura banegidima kabe ta naḡona marae. Be yodi deḡoda purapura banegidima nam ta yawasana, naumeki da nam aitaḡ tokare e yawasana, bo?”

²⁷ Be Yesu ya paribeedina, “Aiyaba banaga ḡarodie nam tenetenegina, Mamaitua ḡarone inam teneteneginama.” ²⁸ Dabudine Pita ya riuna, “Aiyo! Tauma yaba matabudi kè gosedina tam waimuriwatanemma aubainama.”

²⁹ Dabudine Yesu ya riuedina, “Yà riuriu kauemina, aitaḡ da na meagaima bo na dosima bo tuatuaḡanama bo na visarama bo na sedama ya gosedina Mamaitua na waiguyauma aubainama, ³⁰ naumeki da tauna yawasana veredima toitoi yodi raḡandie e banavidina. Be

mate tokare yawasana kenakena nonoginama e veraverauna e pagona.”

Yesu nema ya guri bakona raḡan wairabuiteḡanama ya giu munaḡena

(Mt 20:17-19; Mk 10:32-34; Lk 9:22, 44)

³¹ Yesu na tauwai muriwatanama 12 yai doka nawedi ḡavoe be ya riuedina, “Tauda tà saḡa tà naḡonaḡona Jerusalemma be dabudine yaba matabudi Banaga Natunama ḡarone ta tubuḡana, nema boni peroveta a girugirumina nama: ³² Jius taudi Banaga Natunama eteni banegidima nime-die ta boruna. Be taudi tai varevare, ta ḡasie, ta kaviso ³³ be dabudine ta kwapu be tai gurina. Be raḡan wairabuiteḡane tauna e midisuḡu mu-naḡana.”

³⁴ Be tauwai muriwatana uma yabedima Yesu ya giugiuuedina banidima taudi nam ti kataiedina. Be uma riudima semosemodima, vutuna aubainama taudi nam ti kataiedina.

Yesu banaga matapotapotanama yai yawasanina

(Mt 20:29-34; Mk 10:46-52)

³⁵ Raḡanine Yesu Jeriko meagainama diane ya tavatavana, dabudine tauḡoma matapotapotanama keda diane ya mia be mane ya kiḡikiḡiena. ³⁶ Be raḡanine e vaiena be banaga patara dianāḡa a naḡonaḡona, naumeki da tauna yai taravirana, “Aba e tubutubuḡa?”

³⁷ Taudi a riuena, “Yesu Nasaretma ya verau be e naḡonaḡona.” ³⁸ Dabudine tauna ya yoko be ya riuna, “Yesu, Deivid natunama, kwa raunuatoiegu!” ³⁹ Be aitaḡa a dokadokana a

riutuagāie be a riuna, “Kwai nuatuḡu!” Be tauna ya rasa guratana, “Yesu, Deivid natunama, kwa raunuatoiegu!”

⁴⁰ Dabudine Yesu ya midi kwasa be banaga ya riuedi da tauḡoma matapotapotanama sibo a verauḡena ḡarone. Be raḡanine tauḡoma maida ya tavatavana, Yesu tauna yai taravirena, ⁴¹ “Aba kwa ḡoeḡoena yà voie aubaimma?” Be tauna ya riuna, “Bada, taugu yà ḡoeḡoena sibo èi kitana.” ⁴² Be Yesu ya riuena, “Kwai kita! Am waisumaḡama yai yawasanimna.” ⁴³ Be yai raḡantenaḡe da tauḡoma matanama yai kitana. Dabudine tauna Yesu yai muriwatane be Mamaitua isanama ya kaisuḡuna. Inam raḡanine banaga matabudi nama a kitakitana, taudi mate Mamaitua isanama a kaisuḡusuḡuna.

19

Yesu be Sakias

¹ Be Yesu Jerikoma ya tava be ya naḡonaḡona. ² Be dabudi banaga tenaḡa isanama Sakias, tauna teks tautaminama banegidima adi badama, be tauna purapura baneginama. ³ Tauna ya ḡoeḡoena Yesu sibo ya kitana, tauna nema maika kitana, be nam Yesu i kitana, baninama tauna banaga tuponama be patara ya moraba kauana aubainama. ⁴ Vutuna aubainama tauna ya manini doka be kai damaya ya saḡaina Yesu kitanama aubainama, baninama Yesu inam kedanaḡa ya veraverauna aubainama.

⁵ Raḡanine Yesu deḡo Sakias ya miamiae dabudi ya tavatavana, tauna ya midī kwasa da ya kitasaḡe be ya riuna, “Sakias, kwa yovo makai! Taugu manaka tam am vadae yà miana.”

⁶ Naumeki da Sakias ya dobi makai be ma nuavereverena Yesu yai kaiwena. ⁷ Banaga matabudi umanama kauinama a kitakitana raḡanine, taudi a momodu be a riuna, “Uma baneginama yodi gewagewa baneginama ḡarone e miana.”

⁸ Dabudine Sakias ya midisuḡu be Bada ya ri-uena, “Bada, yau purapurama nevedima banaga waikaruwaḡewaḡedima ya utedina. Be deḡoda aitaḡ ḡarone kaiyovue yaba tenaḡa è paḡopaḡona, naumeki da debane rabui be rabui yà taipoto be yà ute munaḡena.” ⁹ Naumeki da Yesu tauna ya ri-uena, “Manaka kuvesa uma vadane ya saḡana, baninama Sakias tauna yodi ewai maḡatara munaḡena da tauna Eibraham natunama. ¹⁰ Banaga Natunama ya verauna, baninama tauna banaga kwakokwakodima e wanedi be ei yawasanidina.”

*Taunoya mane a ragaudina wainasinama
(Mt 25:14-30)*

¹¹ Dabudine banaga awai beavaia be awai noḡotana da Mamaitua na waiguyauma kabe vutuna i tavatava, baninama Yesu kaiteka Jerusalem diane ya tavana aubainama. Vutuna aubainama Yesu wainasi ḡesaunama ya riuedina adi noḡotama kawa didimaninama aubainama. ¹² Naumeki da Yesu ya riuna, “Guyau tenaḡa natunama ya naḡo wari doḡue be waiguyau ya paḡona, yodibe ya munaḡana. ¹³ Vutuna

aubainama guyau na taunoyama matabudi 10 ya riuedi be mane isanama Mina* matabudi 10 ya utedi be ya riuedina, ‘Mane ko noyedi da ta toina, muriḡa da yà tava munāḡana.’¹⁴ Be na dobuma banegidima tauna a tuaḡaie be riu murine a riupore be Sisa a riuena, ‘Tauma inam baneginama nam kama ḡoeḡoena ḡaromaie ei bada.’

¹⁵ “Be tauna yaḡoro na waibadama ya paḡo be ya munāḡana na dohue. Dabudine na taunoyama aitaḡa mane ya uteutedina ya riuedi da ḡarone a tavana, baninama tauna ya ḡoeḡoena da sibo ya kataiena, da tenaḡaḡa mane bisa a voidi. ¹⁶ Naumeki da taunoya dokadokanama ya tava be ya riuna, ‘Bada, mane kuya uteuteguna anitai potonama mate debane matabudi 10.’¹⁷ Be na Badama ya paribeena, ‘Ya vere kauana, tam taunoya veremma. Baninama tam mane ḡaubonama be kuya noya kauena, vutuna aubainama rewapana yà uteutemna da tam meagai 10 kwai badedina.’

¹⁸ “Naumeki da taunoya wairabuina ya verau be ya riuna, ‘Bada, mane kuya uteuteguna anitai potonama mate debane matabudi 5.’¹⁹ Be na badama ya paribeena, ‘Tam yodi rewapana yà uteutemna da meagai 5 kwai badedina.’

²⁰ “Naumeki da taunoya ḡesau ya verau be ya riuna, ‘Bada, am manema garae è suma be è semosemona umanema,²¹ baninama tam banna ḡasiḡasimma aubainama è nairemna. Yaba

* **19:13:** Mina inam Gurik banegidima adi manema isanama.

nam tam ḡarom be kwa ragaragaudina, tam nam kusipina be kwa ragaragaudina.’

²² “Bada na taunoyama ya riuena, ‘Tam taunoya gewagewamma, tam aba kuya riuriueguna, nama tam yà etaremna. Tam kwa noḡonoḡotina da taugu kabe banaga gewagewagu be yaba taugu nam ḡarogu be yà ragaragaudina, be taugu nam e sipina be yà ragaragaudina. ²³ Be aba aubainama yau manema nam banike ku boru? Taugu yodi è tava munaḡana, yau manema anitai potonama mate sibo è paḡona.’

²⁴ “Dabudine tauna banaga aitaugā diane a midimidina ya riuedina, ‘Inam taunoyanama gewagewanama ḡarone mane ko paḡo be ko naḡo da taunoya aitaugā ḡarone mane 10, tauna ko utena!’ ²⁵ Be banaga Bada a riuena, ‘Bada, tauna kaite mane 10 ya ragaudina!’

²⁶ “Be tauna ya paribeedina, ‘Yà riuriuemina, aitaugā yaba† ḡarone e taipotona, naumeki tauna yaba ḡesaudima mate yà utena, be aitaugā da ḡarone yaba nam i taipotona, naumeki da tauna avedi da ḡaubonama ḡarone, be taugu yaḡoro yà kaiporedina. ²⁷ Be yodi aitaugā yau ḡaviama nam ti ḡoēḡoena da taugu sibo ḡarodie èi bada, ko ver-augēdi uma dabudi be noḡogue koi guridina!’ ”

Yesu Jerusalem nopone e saḡana

(Mt 21:1-11; Mk 11:1-11; Jn 12:12-19)

²⁸ Be Yesu nama ya giugiuna murine, tauna ya doka ḡome be ya saḡa ya naḡona Jerusalemma.

† **19:26:** ‘Yaba’ inam puyo Mamaitua ya uteutedana.

²⁹ Tauna oya Olip, diane meagai Betpage be Betanima ya tavatavana, dabudine na tauwai muriwatanama rabui ya riuporedi ³⁰ be ya riuna, “Ko naḡo noḡomie meagaina. Be raḡanine meagaie ko saḡasaḡa, dabudi ko kitana donki natunama a nigorina. Inam donkinama natunama nam aitaui geru rubuena, vutuna ko kuvesi be ko verauḡena! ³¹ Be deḡoda aitaui ei taraviremina, ‘Aba aubainama ko kuvekuvesi?’, naumeki da ko riuna, ‘Bada e ḡoeḡoena.’ ”

³² Naumeki da taudi a naḡo be aba Yesu ya riuriuedina, nama a banavidina. ³³ Raḡanine taudi donki natunama a kuvekuvesina, taupaka ya riuedina, “Aba aubainama ko kuvekuvesi?” ³⁴ Be taudi a riuna, “Bada e ḡoeḡoena.” ³⁵ Taudi ai doka nawe Yesu ḡarone be adi garama donki debane a yesidi be Yesu a boru tavaitena donki debane.

³⁶ Be raḡanine tauna kedaḡa ya naḡonaḡona, banaga adi garama kedaḡa a yesidina. ³⁷ Raḡanine tauna oya Olip isune ya tavatavana, na tauwai muriwatanama matabudi bonedima dosine Mamaitua isanama kaisuḡusuḡunama ai karena, baninama mataira matabudi a kitekitedina aubainama. ³⁸ Be taudi a riuna, “Guyau isanama ta kaisuḡu, tauna Bada isane e veraverauna!”

³⁹ Dabudine Parisi ḡesaudima patara nopone Yesu a riuna, “Tauwai katakatai, am tauwai muriwatanama kwa riutuaḡaiedi!” ⁴⁰ Be Yesu ya riuna, “Ya riuriuemina, deḡoda taudi tai nu-atuḡuna, naumeki da yeku tokare ta yogona.”

Yesu ya ḡabana Jerusalem aubainama

⁴¹ Be raḡanine Jerusalem diane ya tava be meagainama ya kitakitana, Yesu ya ḡabana Jerusalem aubainama ⁴² be ya riuna, “Taumi manaka sibo suba koya paḡona, be yodi ya semona aubainama, taumi nam ko kita. ⁴³ Tokare raḡan e tavana da ami ḡaviama ta verau be ta babavivirimi be ta vaḡuruvimina. ⁴⁴ Be taudi tokare taumi be ami sedama mate tai miagudemina. Be ami ḡaviama tokare nam aiyaba ta taugose. Uma yabedima ḡaromie ta voiedina, baninama taumi Mamaitua na kaba verauma mayanama nam ko paḡona.”

*Yesu taukune tempol nopone ya tavu do-
biḡedina*

(Mt 21:12-17; Mk 11:15-19; Jn 2:13-22)

⁴⁵ Dabudine Yesu ya naḡona tempol nopone be banaga a kunekunena ya tavu dobiḡedi ⁴⁶ be ya riuedina, “Girugiruminama porane umanama ya riuna, ‘Taugu yau vadama inam moiragi kana vadama’ be taumi ko voivoiena da kabe anidanene gabuna.

⁴⁷ Be raḡan matabuna tauna tempol nopone yawai katakataina. Be pirisi adi babadama be tarawatu tauwai katakataidima be babada ḡesaudima mate a rawateḡeidi be a rarau rubuna da sibo Yesu ai gurina. ⁴⁸ Be taudi nam deḡo aniwai gurinama kedanama ti banavina da sibo ai guri, baninama banaga matabudi tauna na giuma nuedima ya paḡo be yaḡoro awai beavaiena.

20

Aitau waibada Yesu ya ute?

(Mt 21:23-27; Mk 11:27-33)

¹ Raḡan tenaḡa Yesu tempol nopone banaga yawai katakataidi be vari verenama ya rarau guguyena, be pirisi adi babadama be tarawatu tauwai katakataidima be babada ḡesaudima mate a rawateḡeidi be a saḡana Yesu ḡarone, ² be a riuena, “Kwa riuemai, tam aba waibadana be uma yabedima kwa voivoiedi,* bo aitau uma waibadanama ya utem?”

³ Yesu ya paribeedina, “Be taugu mate taumi yai taraviremina, ko riuegu, ⁴ Jon na waibadama aitau ya ute be yawai babataito, Mamaitua bo banaga?”

⁵ Dabudine taudiḡa ai saḡasaḡa be a riuna, “Deḡoda tà riuna, ‘Mamaitua ḡarone’, tauna tokare ei taraviredana, Be aba aubainama nam Jon koi sumaḡe? ⁶ Be deḡoda tà riuna, ‘Banage’, tokare banaga matabudi yekue ta kati gabadana, baninama banaga matabudi ta noḡonoḡotina da Jon tauna Mamaitua na perovetama.” ⁷ Vutuna aubainama taudi a riuna, “Tauma nam ke kataiena Jon waibada aikedae ya paḡo.” ⁸ Be Yesu ya riuedina, “Naumeki, taugu mate nam yà riuemi da taugu aba waibadane uma yabedima yà voivoiedi.”

Gureipi sipinama taurabenama wainasinama

(Mt 21:33-46; Mk 12:1-12)

* **20:2:** Pirisi nuedima yai medina, baninama Yesu tempol nopone banaga a kunekune be ya tavu dobiḡedina aubainama.

⁹ Yesu banaga uma wainasinama ya riuedina, “Raḡan tenaḡa banaga sipi ya voie be gureipi ya kumedina. Be banaga ḡesaudima ḡarodie sipi ya gosepore da taudi a rabena, be tauna ya naḡona wari kedae be ya mia guratana. ¹⁰ Be gureipi tam-inama na raḡanie, tauna na taunoyama tenaḡa ya riuporena sipi taurabenama ḡarodie da na badama na dariḡama sibo ya paḡona. Be sipi taurabenama taunoya a riḡa be nimakavakanama a riupore munaḡena. ¹¹ Dabudine bada na taunoyama ḡesau ya riuporena, be sipi taurabenama inam taunoyanama mate a riḡa be yaba ḡesaudima mate a voie da tauna a kawa tunimayaḡi be nimakavakanama a riupore munaḡena. ¹² Naumeki be bada na taunoyama wairabuiteḡanama ya riuporena. Be tauna mate a vunugi da ai kero be a rubu dobiḡena.

¹³ “Dabudine gureipi sipinama taupakinama ya riuna, ‘Yodi aba ya voie? Agunai natuguma taugominama, nuaguma e paḡopaḡo kauena, tauna ya riupore be taudi ta kita be dabudine ta vivirena.’ ¹⁴ Be raḡanine sipi taurabedima tauna a kitakitana, ai giu vivivirana, ‘Tauna tokare tamanama na buderima e paḡona, aubainama ta vunugi be tauda ta buderiena.’ ¹⁵ Naumeki da tauna sipie be a pore dobiḡe be ai gurina.

“Be yodi taumi aba ko noḡonoḡoti, sipi taupakinama aba e voie sipi taurabedima ḡarodie? ¹⁶ Tauna tokare e yovo be sipi taurabedima ei guridi be gureipi sipinama waria e utedina.”

Be raḡanine banaga Yesu nama ya riuriuna a vaivaiana, taudi a riuna, “Uma riunama tokare

nam e tubuḡa!”¹⁷ Be Yesu ya kitadididi be yai taraviredina, “Deḡoda taugu ama kaikaiyovu, naumeki girugiruminama poranama nopone riu uma ya girugirumina, baninama aba,

‘Vada taukerinama taudi yekue vada a kerikerina,

be yeku tenaḡa a pore kaiyatina, baninama taudi ai noḡotana kabe inam yeku gewagewana.

Be Mamaitua inam yekunama porepore kaiyatina ya paḡo be ya voie da na vadama yasinama ya tubuḡana.’

¹⁸ Be banaga matabudi ta beku be uma yekunama debane ta ravusedina, taudi tokare tai mia gorugorudina. Be yekunama banaga aitou debedie e ravusena, taudi tokare ei mia mutumutudina.”†

¹⁹ Dabudine pirisi adi babadama be tarawatu tauwai katakataidima a ḡoeḡoena waigapa sibo Yesu a vunuḡina, baninama mayedima a paḡo da tauna taudi yawai nasiedina. Be taudi banaga a nairedina.

Teks waitaraviranama

(Mt 22:15-22; Mk 12:13-17)

²⁰ Be taudi Yesu a kitakita watanina, be taukita wataninama banegidima a riuporaḡana. Taudi a voivoiana da maika kabe banaga veredi be a raurubuna da sibo Yesu a kaiyovue da aba sibo ya vato waigewana, yodibe babada dosidima ḡarodie a nawena etarenama aubainama.

²¹ Dabudine taukita wataninama Yesu ai taravirena, “Tauwai katakatai, tauma kè kataiena

† **20:18:** Yeku tauna Yesu. Be aitou Yesu e tuaḡaiena, taunaḡa tokare e vunuḡa munaḡena, be guri murine Yesu tokare aruinama e doumutuna.

da tam raḡan matabuna kwa giugiu be kwawai katakataina matabuna riukaua. Be tam banaga nam kuma nainairedi, be Mamaitua na kauama matabuna kwa giugiuena inam riukaua. ²² Kwa riuemai, inam naumeki bo ibewa da tauma Sisa ḡarone kai teks?”

²³ Be Yesu ya kataiena da taudi a ḡoeḡoena da sibo a kaiyovuena, be Yesu ya riuedina, ²⁴ “Sirin koi kataigu! Aitau noḡona be isanama sirin bogane ta kenakena?” Be taudi a paribeena, “Sisa noḡonama be isanama ta kenakenana.”

²⁵ Dabudine Yesu ya riuedina, “Naumeki da Sisa ḡaronama Sisa ko utena, be Mamaitua ḡaronama Mamaitua ko utena!” ²⁶ Inam raḡanine taudi nam teneteneḡina da Yesu sibo a kaiyovue be aba ya vato waigewa. Be taudi dabudine na giuma a base be ai nuatuḡutuḡuna.

Midisuḡu munaḡa waitaraviranama
(Mt 22:23-33; Mk 12:18-27)

²⁷ Jius nopodie dam ḡaubonama isanama Sadisi. Taudi a riuriuna da banaga e guri be nam tokare e midisuḡu munaḡa. Taudi a verau Yesu ḡarone be ai taravirena, ²⁸ “Tauwai katakatai, Mousis ya giruma be ya riuna, deḡoda tauḡoma ya guri be na visarama e goseporena nam waisedasedana, naumeki da tasinama tuaḡanama kaiyababinama sibo ya naḡi be seda yai tubuḡana tuaḡanama aubainama. ²⁹ Deḡoda tautauḡoma 7 dam tenaḡa nopone be dokadokanama waivi ya naḡi da nam ti natuna be tauḡoma ya gurina, ³⁰ naumeki da tauḡoma wairabuina ³¹ inam kaiyababinama ya naḡina. Be namaḡa da tauḡoma aniwai 7-nama

g̃arone ya dobina. Be yaḡoro nam ti natunana. ³² Muriḡa waivinama mate ya gurina. ³³ Yodi nemanama? Midisuḡu munaḡa na raḡanie uma waivinama tautauḡoma 7 a naḡinaḡina, tokare aita u na waivi?”

³⁴ Be Yesu ya riuedina, “Banaga uma raḡandie ta miamiana, naumeki taudi tawai naḡina. ³⁵ Be Mamaitua na banagama gurie ta midisuḡu munaḡana raḡanine, taudi Mamaitua na dobuma ḡesaune ta mia nonoḡana, be inam raḡanine taudi nam tai naḡi. ³⁶ Be nam ta guri munaḡa, ibewa, be taudi ta miana maika anea. Taudi Mamaitua na sedama, baninama taudi gurie be a midisuḡu munaḡana aubainama.

³⁷ “Be taumi Mosis na gututuma gedara kodekoderinama ko noḡoti. Inam dabudine Mosis mate yai kataidana da banaga gurie be ta midisuḡu munaḡana, baninama Mamaitua umanama Mosis ya riuena, ‘Taugu Eibraham, Aisik be Jeikob adi Mamaituama.’‡

³⁸ Dabudine t̃a kataie da Mamaitua nam banaga guriguridima adi Mamaitua, ibewa da tauna banaga yawayawasanidima adi Mamaituama. Baninama taune yaba matabudi ta yawayawasanana.”

³⁹ Dabudi tarawatu tauwai katakataidima ḡesaudima Yesu a riunena, “Tauwai katakatai, tam kuya giu kauana.” ⁴⁰ Inam raḡanine nam aita u teneteneḡina da sibo ai taravira munaḡe, matabudi a nairana.

‡ **20:37:** (Exodus 3:6) Eibraham, Aisik be Jeikob taudi a gurina, be aruidima yawayawasanidima marae.

Keriso tauna aita natuna?
(Mt 22:41-46; Mk 12:35-37)

⁴¹ Be yodi Yesu yai taraviredina, “Nemanama da tarawatu tauwai katakataidima ta riuriuna da Keriso tauna kabe guyau Deivid natuna? ⁴² Be buka Salamo nopone Deivid tauna ya riuna, ‘Bada yau Badama ya riuena, Kasaugue kwa mia.

⁴³ Be taugu am ḡaviama yà vaḡaḡaridi be kaḡamma dibune yà biridina maika guni.’

⁴⁴ Be yodi tà kita da Deivid Keriso ya riuena ‘Yau Badama’, be yodi nemanama da Keriso Deivid natuna?”

Yesu tarawatu tauwai katakataidima nuedima ya boruna

(Mt 23:1-36; Mk 12:38-40)

⁴⁵ Dabudine banaga matabudi awai beavaia be Yesu na tauwai muriwatanama ya riuedina, ⁴⁶ “Koi kita kauana tarawatu tauwai katakataidima ḡarodie. Taudi gara veredima ta kotedi be ta rarau guyaguyau naḡona, be adi ḡoanama banaga debae taudi tai kaiwedina, be sinagog nopodie bo soi nopodie taudi gabu verediḡa ragaudima ta ḡoeḡoedina. ⁴⁷ Be taudi kaiyababa waikaruwaḡewaḡedima adi vadama ta danedanenedi be moiragi daudaudima kaikaiyovudima ta voivoiedina da banaga kabe ta kitedi be ta basedi. Inam nama banegidima taudi tokare kovoḡa dosinama ta banavina.”

21

Kaiyababa na puyoma
(Mk 12:41-44)

¹ Be Yesu yawai kita be mane banegidima ya kitekitedina tempol nopone mane a boruboruna.
² Be tauna kaiyababa waikaruwaḡawaḡanama mate ya kitana, penipeni dubedima rabui ya biridina. ³ Dabudine Yesu ya riuna, “Yà riuriuemina da uma kaiyababinama waikaruwaḡawaḡanama tauna na puyoma ya moraba kauana, nam maika banaga ḡesaudima nama. ⁴ Baninama taudi ḡesaudima mane ai maurena, be tautaugosedima a raupuyoedina. Be kaiyababa tauna na manema ḡaubonama sibo na kanima ya gimarana, be matabuna ya raupuyoena.”

Yesu tempol kawa gewagewanama be raḡan damodima adi matairama ya giuedina
(Mt 24:1-14; Mk 13:1-13)

⁵ Yesu na tauwai muriwatanama ḡesaudima a riuna da tempol kitanama ya vere vavasāḡana, baninama banaga tempol yeku waimatakanikanidie ai siana, be puyo veredima mate a raupuyoedina Mamaitua ḡarone. Be Yesu ya riuna, ⁶ “Yodi uma yabedima matabudi ko kitekitedina, be raḡan e tavana uma yabedima matabudi tai kavena. Nam ai yeku tenaḡa tokare na gabue e kena.”

⁷ Be taudi ai taravirena, “Tauwai katakatai, airaḡan uma kaudima ta tubuḡa be aba matairidima ka kitedi be ka kataie?” ⁸ Be Yesu ya riuna, “Ko kita kua da nam aitau ei kedadoka waigewemi, baninama banaga toitoi tokare isague ta tava be ta riuna, ‘Taugu vutuna Keriso, be raḡan damonama ya tavana.’ Be

nam koi muriwatanedi! ⁹ Be raḡanine ḡavia bo iḡara riudima ko vaiedina, nam ko naira! Inam yabedima matabudi ta tubuḡa dokana, be raḡan damonama tokare nam e tava makai.” ¹⁰ Be na giuma ya kaiwatani be ya riuna, “Tokare dobu turanama dobu mate, be waiguyau turanama waiguyau mate tai kawa ḡasiḡasina. ¹¹ Be dobu ḡesaudie yoyo dosidima ta tubuḡana, be meḡara be guriguri raḡandima ta tavana. Be yaba wainua nainairidima be mataira dosidima gunume ta tubuḡana.

¹² “Muriḡa da uma kaudima ta tubuḡana noḡone, banaga taumi ta vunuḡimi be ta raukivi gewegewemina. Be etare ta biri nawemina, sinagog banegidima be guyaguyau be babada dosidima noḡodie, da taumiḡa ko gudutarāḡa munaḡemina. Be dabudine taumi dibure ta biri nawemina, baninama taumi taugu kowai sumaḡeguna aubainama. ¹³ Inam kaudima ta tubutubuḡana raḡanine, taumi taugu aubaiguma koi matamatana. ¹⁴ Be taumi nema sibo koya giu bakona, nam yodi koi nuaboye. ¹⁵ Baninama taugu tokare giu be nuauyauya yà utemi da ami ḡaviana nam tenetenēina da ami giuma ta riḡa bo ta mediemi. ¹⁶ Taumi ami dosiḡomama, tuatuaḡemima, ami damma be ami banagama taudi tokare ta biri dobiḡemina. Be ḡesaumima tokare taudi tai gurimina. ¹⁷ Be banaga matabudi ta tuaḡaiemina, baninama taumi taugu kowai sumaḡeguna aubainama. ¹⁸ Be taumi deba vu-vuḡimima nam tenaḡa tokare e beku waiyakare, vutuna aubainama nam koi nuaboya. ¹⁹ Ko midi bagibaginaḡa da aruimima koi yawasanina.

Yesu Jerusalem nema e gewagewa bakona ya giuena

(Mt 24:15-21; Mk 13:14-19)

²⁰ “Taumi ko kitakita be iğara banegidima Jerusalem ta midi kwa vivirona, inam rağanine ko kataie da ġaubonağā Jerusalem ta kawa gewagewana. ²¹ Dabudine aitaūğā Judياما, taudi sibo a nağona oyae. Be aitaūğā Jerusalem nopone, taudi sibo a dobi a nağona. Be aitaūğā Jerusalem diane miemienidima, taudi nam sibo a sağā Jerusalem nopone. ²² Baninama inam biwa rağaninama e tavana, boni peroveta a girugirumina, ruvane nama e tubuğana. ²³ Inam rağandie tokare waiwaivi bogebogedima be waitatau vaudima ġarodie e gewagewa kauana, baninama inam rağanine tokare wainuatoitoi dosinama e tubuğana dabudine, baninama Mamaitua nuanama yai medi kauana banegidima ġarodie aubainama. ²⁴ Dabudine banaga ġesaudima tai guridina, be ġesaudima ta ragaudi be dobu matabuna nopodie dibure ta biri nawedina. Be eteni banegidima taudi Jerusalem ta vagudagudana, naumeki da adi rağanima boruborune e kovina.

Yesu na kaba yovoma rağaninama

(Mt 24:29-31; Mk 13:24-27)

²⁵ “Be inam rağandie mataira ta tubuğana suara, nawaravi be kipora bogedie. Be dobu matabuna tokare wainuatoitoi dosinama ta bnavina, be banaga matabudi egasi* gavasinama

* **21:25:** Baibol nopone rağanine ġesaudie riu ‘egasi’ inam nam egasi ġoma, be inam banaga dobu matabuna.

be rabaminama e rawanapedina. ²⁶ Inam raḡanine banaga tokare naira e kawa raugur-eredina, baninama taudi ta nainaira kauana da aiyabaḡa ḡesaudima gewegewedima dobie ta tubuḡana. Be rewapana matabudi gunume ta rawadaberaridina. ²⁷ Yodibe Banaga Natunama ma giyouna e yovona, rewapana be neneraḡinama dosinama mate, be banaga matabudi tokare ta kitana. ²⁸ Be inam yabedima matabudi ta tubuḡana raḡanine nam ko naira, be taumi ko tausuḡumi be koi nuaverena, baninama raḡan ya tavana, da taugu yà yovoyovona yài yawasanimina aubainama.”

Damaya kainama na waikatakataima

(Mt 24:32-35; Mk 13:28-31)

²⁹ Dabudine Yesu uma wainasinama ya riuedina, “Damaya kainama be kai ḡesaudima mate ko noḡotidi! ³⁰ Taumi kai ta kinikina raḡanine ko kitedi be ko kataikataiena da inam bodu raḡaninama e tavatavana. ³¹ Be inam kauinama tenegaḡinama nama raḡanine inam kauidima ta tubutubuḡana ko kitekitedina, dabudine ko kataie da Mamaitua na waiguyauma raḡaninama e tavatavana. ³² Taugu yà riuriu kauemina, da uma kimtinama nam ei kave be inam kauidima matabudi Jerusalem ta tubuḡana. ³³ Mara be dobu tokare tai kavena be taugu riuguma nam airaḡan ei kave!

Nam ko mia nuababaḡa!

³⁴ “Ko kita kauemi da kanidobidobi be tegobua bo dobu yawasanidima nuaboyedima nam ta taimatakoekoemi, deḡoda raḡan damonama ei

raḡantenāḡe be ei ḡosorimina. ³⁵ Baninama inam raḡaninama tokare banaga matabudi doḡue e kamotidina maika kwaro! ³⁶ Vutuna aubainama taumi koi nenēḡana be raḡan matabuna ko moiragi da taumi tokare tenetenēḡinama da uma kaidima ta tubutubuḡana, nopodiḡa ko naḡo be Banaga Natunama noḡone ko midina, be nam tokare ko tunimayaḡa.”

³⁷ Yesu suare tempol nopone yawai katakataka, be kupie ya doḡi be ya naḡonaḡona oya Olip debane, kena aubainama. ³⁸ Be banaga matabudi raḡantomtoma a naḡona tempol nopone tauna waibeavaienama aubainama.

22

Judas Yesu kana ḡaviama nimedie ya boru doḡiḡena

(Mt 26:1-5; Mk 14:1-2; Jn 11:45-53)

¹ Buredi-Nam-Sasasanina soinama raḡaninama ya tavatavana, isanama ‘Naḡopore soinama’.

² Pirisi adi babadama be tarawatu tauwai katakataidima, taudi Yesu waigurinama kedanama a wanewanena nema sibo ai guri bakena, be taudi banaga a nairedina.

³ Be Judas, tawai isana ‘Iskariot’, tauna nopone Seitan ya saḡana. Tauna tenaḡa tauwai muriwatana 12 nopodie. ⁴ Vutuna aubainama tauna ya naḡona pirisi adi babadama be babada ḡesaudima mate ai tarapiri da nema sibo tauna Yesu ya boru doḡiḡa bakena ḡarodie. ⁵ Be taudi nuedima ya vere kua be ai aninana da Judas sibo mane a utena. ⁶ Naumeki da Judas mate yai aninana da tauna inam noyanama e voiena. Be

keda ya wanewanena da patara matakoedie sibo Yesu ya boru dobiḡena.

Naḡopore soinama

(Mt 26:17-25; Mk 14:12-21; Jn 13:21-30)

⁷ Buredi-Nam-Sasasanina soinama raḡaninama ya tavana. Be inam raḡanine dam matabudi adi sipuma tenaḡaḡa ai guridina Naḡopore soinama aubainama.

⁸ Dabudine Yesu tauna Pita be Jon ya riuporedi be ya riuna, “Ko naḡo be Naḡopore soinama ko vokaukaue be tà kanina.” ⁹ Be taudi ai tar-avirena, “Deḡo dabudi kwa ḡoḡoemaina soi ka vokaukaue?” ¹⁰ Be tauna ya riuedina, “Taumi ko naḡo be raḡanine meagaie ko tavatavana, dabudine banaga ko banavina upa duginama e kirokiroḡina. Inam baneginama koi muriwatane da na vadae ko tavana. ¹¹ Be vada taupakinama ko riuenta, “Tauwai katakatai umanama ya riuemna: Deḡo ware adi gabu da taugu be yau tauwai muriwatanama mate Naḡopore soinama ka kani?” ¹² Be tauna vada vatavatara rabui nopone be debane vatarine dabudine gabu dosinama be yaba matabuna kawakawa nonoḡidima tauna ei kataimina. Be inam dobudine kani ko vokaukauena.” ¹³ Dabudine taudi a naḡo be Yesu ya riuriuedina yabedima nama a banavidina, naumeki da Naḡopore soinama taudi a vokaukauena.

Bada na soima

(Mt 26:26-30; Mk 14:22-26; 1Ko 11:23-25)

¹⁴ Naumeki da soi na raḡanima ya tavatavana, Yesu na apasolma mate a miana kani aubainama.

¹⁵ Dabudine tauna ya riuedina, “Nuaguma ya

poypoya vavasagēna da uma Naḡopore soinama taumi mate sibo tè kanina, be muriḡa da taugu yài nuatoitoina. ¹⁶ Baninama yà riuriuemina da taugu Naḡopore soinama nam airaḡan yà kani munaḡe naumeki da uma soinama baninama e maḡatarana Mamaitua na waiguyauma nopone.”

¹⁷ Be ya giugiuna murine Yesu keyaka ya paḡo, yai kaiwa be ya riuna, “Uma ko paḡo be ko soiena! ¹⁸ Baninama yà riuriuemina da yodi be nokoi ya naḡona taugu nam waen yà tego munaḡe naumeki da Mamaitua na waiguyauma e tavana.”

¹⁹ Be tauna buredi ya paḡo, yai kaiwa, ya giva da ya utedi be ya riuna, “Uma taugu tubuḡiguma yà uteutemina. Yodi be nokoi e naḡona uma ko voiena taugu aninoḡotiguma aubainama.” ²⁰ Be kani murine keyaka ya paḡo be ya riuna, “Uma keyekinama inam waianina vaunama, baninama kosiniguma e rauḡinina taumi aubaimima.

²¹ “Be banaga aitau tokare e boru dobiḡeguna, be tauborudobiḡeguma tauna mate yodi uma dabudine tà miamiana. ²² Banaga Natunama tokare e gurina, inam naumeki. Be aitau da ya boruboru dobiḡena, tauna tokare gewagewa dosinama e banavina.” ²³ Dabudine apasol taudiḡa ai taraviravira munagedina, da aitau uma kauinama e voie.

Aitau ya saḡa gurata?

²⁴ Dabudine apasol waisaḡasaḡa ai karena, da aitau poudie ya saḡa gurata. ²⁵ Be Yesu ya riuedina, “Dobu guyaguyaudima adi banagama ḡarodie awai badabadana, be banaga a riuedi

be taudi awai isedina ‘Raukivivere banegimima’.
²⁶ Be taumi nam sibo nama! Banaga dosinama
 nopomie tauna sibo maika gomana, be ami
 badama tauna sibo maika taunoya. ²⁷ Aba taumi
 ko noḡonoḡoti, aitau ya saḡa gurata? Banaga
 e mia be e kanikanina, bo kani tausoiename?
 Banaga e mia be e kanikanina, tauna ya saḡa
 guratana! Be taugu poumie maika taunoya.
²⁸ Taumi banagimima taugu yau wainuatoitoie
 koya riu vaivaiteguna. ²⁹ Vutuna aubainama
 taugu rewapana yà uteutemina da taumi koi
 badana, taugu yau waiguyauma, Tamaguma ya
 uteuteguna nopone. ³⁰ Dabudine taumi tokare ko
 kani be ko tegona yau waiguyauma nopone. Be
 taumi waibadae ko mia be Israel damnama 12
 taumi tokare ko etaredina.”

Yesu ya riuna da tokare Pita tauna e bovienna
 (Mt 26:31-35; Mk 14:27-31; Jn 13:36-38)

³¹ Be Bada ya riuna, “O Saemon! Seitan Ma-
 maitua yai baḡana da matabumi e raurubumi
 be e dariḡemina maika banaga raisi banidima be
 muidima ta daridariḡedina nama, taumi verree be
 e nawemina gewagewae. ³² Be taugu aubaimma
 è moiragina da am waisumaḡama nam e beku,
 be raḡanine am noḡotama e verau munagāna
 ḡarogue, naumeki da tam am banagama kwa
 voiedi da tai rewapanana.”

³³ Be Pita ya riuna, “Bada, taugu è vokaukauana
 da tam mate tà naḡona dibure be tam mate tà
 gurina.” ³⁴ Be Yesu ya riuna, “Yà riuriuemna Pita,
 tam manaka raḡan rabuiteḡa kwa bovienna da

tam nam ku kataieguna, muriḡa da kamkam e riuna.”

³⁵ Dabudine Yesu yai taraviredina, “Boni taugu è riuporemina, be nam mane, nam tana be nam kaḡasuma mate, inam raḡanine taumi aba koya maruabie bo ibewa?” Be taudi a riuna, “Ibewa!”

³⁶ Dabudine ya riuedina, “Be yodi na tabu, aitau ḡarone mane bo tana da e paḡona. Be aitau ḡarone kwatikwati ibewa, naumeki da tauna na rupue kwatikwati e gimerina, ³⁷ baninama giru-giruminama poranama nopone a girumina taugu aubaiguma, “Taudi tauna a voiena maika kabe tauvunuvunuḡa.”

³⁸ Be apasol a riuna, “Bada, uma kwa kita, kwatikwati rabui.” Be tauna ya riuna, “Inam nakarua!”

*Yesu oya Olip debane ya moimoiragina
(Mt 26:36-46; Mk 14:32-42)*

³⁹ Yesu vada ya dobi pore be na kaba naḡoe ya naḡona oya Olip debane. Be na tauwai muriwatanama mate ai muriwatanena. ⁴⁰ Be raḡanine taudi Yesu ḡarone a tavatavana, tauna ya riuedina, “Ko moiragi da nam raurubue ko beku!”

⁴¹ Dabudine na tauwai muriwatanama ya gosedi be ya naḡo da yeku ruburubunama ruvane nama, be tuapikane doḡae ya raupari da ya moiragi ⁴² be ya riuna, “Mamai, taugu nam ama ḡoēḡoena ḡoraḡoranama yà sigue, be naumeki da tam am ḡoanama yà voiena, be nam taugu yau ḡoana.” ⁴³ Dabudine anea marae ya yovo be ya kawa rewapanina. ⁴⁴ Yesu na nuaboyama ya moramoraba guratana, vutuna aubainama tauna ya moiragi gurata, be poya kosina maika

a tostitosina doḡae. ⁴⁵ Dabudine ya midisuḡu munaḡa be ya naḡona na tauwai muriwatanama ḡarodie da e kitana be taudi matabudi ai nuaboya kava be a kenakenana. ⁴⁶ Be tauna ya riuedina, “Aba aubainama ko kenakena? Ko midisuḡu be ko moiragi da taumi nam raurubue ko beku!”

Banaga Yesu a vunūḡina

(Mt 26:47-56; Mk 14:43-50; Jn 18:3-11)

⁴⁷ Yesu tauna yaḡoro ya giugiu be banaga toitoi a tavana, be apasol 12 nopodie apasol tenaḡa isanama Judas, tauna inam banegidima yai doke-dokedina, be Judas tauna ya saḡa da Yesu yai suruvena. ⁴⁸ Be Yesu ya riuna, “Judas, tam Banaga Natunama waisuruvaе kwa boruboru dobiḡe, bo?”

⁴⁹ Be raḡanine Yesu na tauwai muriwatanama nama kauinama a kitakitana, taudi a riuna, “Bada, kwa ḡoeḡoemaina tauma ama kwatik-watima ka kwadiedi, bo?” ⁵⁰ Naumeki da tauḡoma tenaḡa kwatikwati ya kwadie be pirisi adi badama na taunoyama beanama kasaunama yai miarakana.

⁵¹ Be Yesu ya riuna, “Avedi! Ko gose pore!” Dabudine Yesu inam tauḡominama beanama ya taukoni be yai yawasanina. ⁵² Be Yesu pirisi adi babadama, tempol babadidima be banaga adi babadama ḡesaudima mate ya riuedina, “Taumi kwapu be kwatikwati koya kiroḡa be koya verauna taudanedanene ko vunūḡi, bo?” ⁵³ Taugu raḡan matabuna taumi mate tempol nopone tè miamiana, be dabudine taumi nam ko vunūḡiguna. Be naumeki da yodi taumi ami

raġanima. Yodi tadiwanawana* na waibadama raġaninama.”

Pita Yesu e boviēna

(Mt 26:57-58, 69-75; Mk 14:53-54, 66-72; Jn 18:12-18, 25-27)

⁵⁴ Dabudine taudi Yesu a pani be a nawena pirisi adi badama na vadae. Be Pita muriġa yai muriwatanedina. ⁵⁵ Be inam banegidima taudi pirisi na vadama diane anikaba etare, dabudi kai a dena be diane a miamiana, be dabudine Pita mate diedie ya miamiana. ⁵⁶ Be taunoya waivinama tenaġa e kitana be Pita kai diane ya miamiana, dabudine ya kita yaġeyaġe be ya riuna, “Kaua tauġominama mate Yesu murinaġa ya naġonaġona!”

⁵⁷ Dabudine tauna ya bovi be ya riuna, “Ibewa! Taugu Yesu nam e kataiena!” ⁵⁸ Be a mia da raġan ġaubonaġa be banaga ġesau e kitana be ya riuna, “Tam mate Yesu turanama!” Be Pita ya riuna, “Ei, nam taugu!” ⁵⁹ Naumeki da a taumia raġan ġaubonaġa be tauġoma ġesau ya riu gurata be ya riuna, “Ee, riukaua inam tauna mate Yesu yawai muriwatanena, baninama tauna Galili provins baneginama!” ⁶⁰ Be Pita ya riuna, “Ei badam, tam aba kwa giugiuena taugu nam e kataiena.” Be Pita yaġoro nama ya giugiu be kamkam ya riuna.

⁶¹ Dabudine Bada yai tautinamuri be Pita ya kitadidina. Inam raġanine Pita Yesu na giuma uma ya noġotina, “Tam raġan rabuiteġa kwa boviēguna da tam nam taugu ku kataieguna,

* **22:53:** Baibol nopone ‘tadiwanawana’ e giugiuena, inam baninama penama bo Seitan adi rewapanama.

muriḡa da kamkam e riuna.’ ⁶² Be dabudine Pita ya dobi doḡae be ya ḡaba da ya ḡaba guratana.

Yesu a nawena tauwai tarapiri babadidima[†] ḡarodie

(Mt 26:59-66; Mk 14:55-64; Jn 18:19-24)

⁶³ Be banaga aitaḡa Yesu taukita wataninama taudi Yesu waivarevarenama be riḡanama ai karena. ⁶⁴ Taudi Yesu matanama a suma be a riuriuena, “Kwai peroveta da aitaḡa kabe ya riḡam.” ⁶⁵ Be taudi ḡasi gewegewedima toitoi mate tauna a riuriuena.

⁶⁶ Raḡantomtom babada a rawateḡeidina, taudi inam pirisi adi babadama, tarawatu tauwai katakataidima be banaga adi babadama. Yodibe Yesu ai doka verauḡena ḡarodie. ⁶⁷ Yodibe taudi Yesu ai taravirena, “Kwa riuemai, tam Keriso, bo?” Be tauna ya paribeedi be ya riuna, “Deḡoda taugu yà riuemina, taumi tokare nam koi sumaḡegu, ⁶⁸ be deḡoda taugu taumi sibo èi taraviremina, taumi nam tokare koya paribeegu. ⁶⁹ Be yodi da nokoi ya naḡona Banaga Natunama Mamaitua wairewapana vavasāḡinama ni-manama kasaune e miana.”

⁷⁰ Dabudine taudi matabudi ai taravirena, “Tam Mamaitua Natuna, bo?” Be tauna ya riuedina, “Taumi aba ko vatovatona, vutuna taugu.”

⁷¹ Be taudi a riuna, “Tauma yodi nam matamata ḡesaudima kama ḡoeḡoedina, baninama tauma matabumai kè vaiena tauna aba ya vatona.”

[†] **22:62:** Tauwai tarapiri babadidima inam banaga adi babadama, tarawatu tauwai katakataidima be pirisi adi babadama tauna boru yawai badena.

23

*Yesu a nawena Paelat be Herod ġarodie
(Mt 27:1-2, 11-14; Mk 15:1-5; Jn 18:28-38)*

¹ Dabudine banaga matabudi borue a midisuġu be Yesu a nawena Paelat ġarone. ² Be dabudi taudi waiwavunama ai karena be a riuna, “Tauma kè vaie da uma baneginama tauna banaga yawai doka waigewedi, be ya riuna da nam sibo Sisa ġarone ai teks, be mate tauna ya riuna da taunaġa guyau be Keriso.”

³ Vutuna aubainama Paelat Yesu yai taravirena, “Tam Jius adi guyau, bo?” Be tauna ya riuna, “Vutuna kwa vatovatona.” ⁴ Be Paelat, pirisi adi babadama be patara ya riuedina, “Taugu nam aba gewagewanama uma baneginama ġarone e banavina.” ⁵ Be taudi a riu vavasaġana, “Tauna Jius nopone na waikatakataima, aubainama banaga nuedima ya sorosoru viviridina. Tauna Galili nopone waikatakatai yai karena da uma dobudine ya tavana.”

⁶ Raġanine Paelat e vaiena be banaga Galili provins a vatovatona, dabudine tauna yai taravidedina, “Tauna Galili provins banegina, bo?”

⁷ Be dabudine e vaiena be Yesu Herod na waiguyauma* nopone, naumeki da tauna ya riu-porena Herod ġarone. Baninama inam raġanine tauna Jerusalemma ya miamiana aubainama.

⁸ Raġanine Herod Yesu ya kitakitana, tauna nuana ya vere kauana, baninama tauna bonideġo be ya ġoġoena sibo Yesu ya kitana. Baninama

* **23:7:** Herod na waiguyauma inam Galili provins nopone be Paelat na waiguyauma inam Judia provins nopone.

Yesu yaba toitoi yawai tubuḡidina ya vaiena, vutuna aubainama Herod yawai noḡotana Yesu sibo mataira ya voie be tauna ya kitana. ⁹ Be Herod giu toitoi Yesu yai taravirevirena, be Yesu nam i paribeena. ¹⁰ Dabudine pirisi adi babadama be tarawatu tauwai katakataidima a midisuḡu be Yesu ai wavu vavasāgena. ¹¹ Be Herod na tauḡarama mate Yesu ai varavara be a raukivi gewagewa kauena. Be Herod gara waimata kanikaninama Yesu yai kote be ya riupore nawe munaḡena Paelat ḡarone. ¹² Inam raḡanine Paelat be Herod ai turana kauana. Be noḡone taudi awai mia taurina.

Paelat ya riuna da Yesu e gurina

(Mt 27:15-26; Mk 15:6-15; Jn 18:39-19:16)

¹³ Paelat, pirisi adi babadama, babada ḡesaudima be banaga ya rawateḡeidi ¹⁴ be ya riuedina, “Taumi uma baneginama koya verauḡe ḡarogue be koya riuna da tauna banaga ya sorusoru viviridina, be taugu noḡomie è etare be è banavi da taumi ami waiwavuma matabudi nam banidi. ¹⁵ Be teneginama Herod nama, be ya riupore munaḡena ḡarode, baninama tauna nam aiyaba i banavina da Yesu sibo ai guri. ¹⁶ Vutuna aubainama taugu yodi tauna ya kovoḡi be ya riupore da e naḡona.” ¹⁷ (-)†

¹⁸ Be banaga matabudi a rauyogo tenaḡa be a riuna, “Koi guri, be Barabas ko kaiporena tauma ama ḡoanama!” ¹⁹ Be Barabas tauna

† **23:17:** Vers 17 inam banaga muriḡa baibol nopone a boru saḡena, noḡone nam i kenakenana. Vers 17 inam umanama: Soi matabuna nopodie Paelat dibura banegidima tenaḡaḡa e kaikaiporaḡana.

dibure a boruna, baninama tauna meagai nopone iğara dosinama yai kare, be banaga yai gurina. ²⁰ Be Paelat banaga ya riu munağedina, baninama tauna ya ġoeğoenā Yesu sibo ya kaiporena aubainama. ²¹ Be taudi Paelat a rauyogoe be a riuriuna, “Kwa tuparatu, kwa tuparatu!” ²² Be Paelat rağan wairabuiteğanama ya riu munağedina, “Be uma baneginama aba gewagewanama ya voie? Taugu nam aba e banavina da yài guri! Taugu yà kovoği be yà riupore be e nağona.”

²³ Be taudi a mia rasarasa be a ġoeğoenā sibo Yesu a tuparatuna korosie. Be taudi yağoro a rasarasana. ²⁴ Dabudine Paelat nuanama ya vitare da banaga adi ġoanama nama e voiena. ²⁵ Be tauğoma meagai nopone iğara yai kare be banaga yawai gurina, tauna dibure be Paelat ya riupore da ya nağona, banaga adi ġoanama ruvane. Be tauna Yesu taudi nimedie ya boru da adi ġoanama nama a voiena.

Yesu a tuparatuna korosie

(Mt 27:32-44; Mk 15:21-32; Jn 19:17-27)

²⁶ Dabudine Yesu ai doka dobiğe da a nawe-nawe, be kedae tauğoma tenağa a banavina isanama Saemon, tauna Sairin meagainama tauğominama. Tauna sipie be ya munamunağana meagaie. Naumeki da tauna a vunuği be korosi ai kiroğina, be tauna Yesu ya sagu da korosi ya kiroğina. ²⁷ Be patara dosinama tauna murinağa a nağonağona, be nopodie waiwaiwi mate, be taudi Yesu ai nuaboye be a ġabağabana. ²⁸ Dabudine Yesu yai tautinamuri be ya riuedina, “Taumi Jerusalem waiwaiwimima nam ko

gābegu, be taumi be ami sedama mate ko gāba munaḡemina! ²⁹ Baninama raḡan ta tavana da taumi ko riuna, ‘Nuavere dosinama waiwaivi kaikaipokidima ḡarodie be aitaḡa nam ti bogana be susudie nam seda ti susurubudina.’ ³⁰ Inam raḡanine banaga oya ta riuedina, ‘Debamaie ko beku da ko dobotawamai!’ Be oya ḡauḡaubodima ta riuedina, ‘Ko rupertawamai!’ ³¹ Deḡoda taugu kai gidegideviguma ḡarogue nama banaga ta voivoiana, naumeki da banaga maika kai pokidima ḡarodie tokare aba e tubuḡa?”

³² Be tauḡaiḡara banaga gewegewedima rabui mate ai doka tenaḡedina waiguridima aubainama.

³³ Raḡanine taudi dobu isanama ‘Debagarere’ dabudi a tavatavana, taudi korosie Yesu a tutuna, be banaga gewegewedima rabui mate. Tenaḡa Yesu kasaunama yauwane be tenaḡa seninama yauwane.

³⁴ Be Yesu ya riuna, “Mamai kwa noḡota poredi, baninama taudi nam ti kataiena aba ta voivoiena!” Be tauḡara Yesu na garama a kasiedina. ³⁵ Be banaga patara dabudine a midi be yaba matabuna a kitekitedina. Be babada Yesu ai kwatekwateve be a riuriuna, “Banaga ḡesaudima yai yawasanidina, be yodi taunaḡa ei yawasana munaḡe deḡoda tauna Keriso, Mamaitua na vinevinema!” ³⁶ Be tauḡaiḡara mate waikwatekwatevenama, aubainama taudi waen wairurunama ai tego be a riuna, ³⁷ “Deḡoda tam Jius adi guyauma, naumeki da kwai yawasana munaḡem!”

³⁸ Be kai ḡaubonama bogane a girumana raḡan rabuiteḡa, Gurik bonane, Letin bonane be Hibru bonane be a riuna:

UMA TAUNA JIUS ADI GUYAUMA
be korosi bogane a tutuna Yesu debane.

³⁹ Be gewagewa tauḡominama tenaḡa dabudi ya dawedawena yai diboḡi be ya riuna, “Tam Keriso da kwai yawasanim be kwai yawasanimai!” ⁴⁰ Be gewagewa baneginama ḡesaunama turanama ya riutuaḡaie be ya riuna, “Tam wainuatoitoi teneginama kwa paḡopaḡona maika Yesu, vutuna aubainama tam Mamaitua sibo kuya vivirena nam kuyai diboḡi, ⁴¹ baninama tauda tà gurina dà gewagewama aubaidima inam naumeki, be tauna nam aba gewagewanama i voiena da sibo ya guri.” ⁴² Be dabudine ya riuna, “Yesu tam am waiguyauma nopone kwa saḡasaḡana raḡanine, kwa noḡotiguna.” ⁴³ Be Yesu ya riuena, “Yà riuriu kauemna da tam manaka taugu mate paradaisie‡ tà miana.”

Yesu ya gurina

(Mt 27:45-56; Mk 15:33-41; Jn 19:28-30)

⁴⁴⁻⁴⁵ Naumeki be suaratopunama suara ya duba be dobu matabuna yai kupikupina, be nama ya kenana da ravie nama be dobu ya yana munaḡa. Inam raḡanine gara tempol nopone matakeda

‡ **23:43:** ‘Paradisi’ inam banaga aitaḡa Yesu tawai sumaḡe be ta gurigurina, dobudine ta naḡona.

awai saurina poune ya nuasika poraḡa§ da ma nevana a kenana. ⁴⁶ Be Yesu bonanama dosine ya riuna, “Mamai, aruiguma nimame ya boruboruna!” Tauna nama ya riuriuna, naumeki da ya gurina.

⁴⁷ Dabudine Rom adi badama aba a tubutubuḡana nama ya kitakitana, tauna Mamaitua isanama ya kaisuḡu be ya riuna, “Naumeki riukaua, uma tauna inam didimana baneginama.” ⁴⁸ Be banaga matabudi a veraverauna Yesu tuparatunama kitanama aubainama, raḡanine aba ya tubutubuḡana nama a kitekitedina, taudi ai nuaboya kaua be nimedima nukadedie a biridi be a munaḡana. ⁴⁹ Dabudi Yesu na banagama matabudi be waiwaivi Galilima be awai muriwatanena, taudi mate ḡavoe a midi be yaba matabudi a tubutubuḡana a kitekitedina.

Yesu waikokoaginama

(Mt 27:57-61; Mk 15:24-47; Jn 19:38-42)

⁵⁰ Dabudine tauḡoma tenaḡa isanama Jousep. Tauna tenaḡa tauwai tarapiri badanama, be tauna na yawasanama verenama be didimani-nama. Be tauna ⁵¹ Mamaitua na waiguyauma ya raberabena da sibo ya tavana. Be inam baneginama tauna na banagama yaba matabudi a giugiuedi be a voivoiedina tauna nam i aninedina. Tauna Jius meagaine, isanama Arimatiana, be ya verauna. ⁵² Naumeki be tauna ya naḡona

§ 23:44-45: Gara ya nuasikana, vutuna aubainama tauda yodi nam tempol bo pirisi bo musara ta raupuyo Mamaitua ḡarone. Baninama Yesu ya gurina, be yabedima matabudi a kovina. Be yodi tauda didimaninama Mamaitua ḡarone ta naḡo ḡomana.

Paelat ġarone be Yesu tubuġinama aubainama yai baġana. ⁵³ Yodibe ya kiroġa dobiġe da garae ya suma be kokoaga guba voivoienama nopone ya boruna, noġone nam aitau inam kokoagine ti boru rubuna.

⁵⁴ Inam raġaninama vokaukua na raġanima, be Sabat raġaninama ġaubonaġa e tava. ⁵⁵ Be dabudine waiwaivi aitaġa Yesu Galili provins nopone ai muriwatane be a veraverauna, taudi Jousep ai muriwatane da kokoagae be nema Yesu tubuġinama e boru bakena, vutuna kitanama aubainama. ⁵⁶ Dabudine waiwaivi a munaġana vadae da upa be bunama ġabuġabudima a vokaukuedina Yesu tubuġinama aubainama. Be Sabat raġanine taudi a siperena, adi tarawatuma e riuriuna nama.

24

Yesu e midisuġu munaġana

(Mt 28:1-10; Mk 16:1-8; Jn 20:1-10)

¹ Sande raġantomtom waiwaivi upa be bunama ġabuġabudima voivoia wainonoġidima a kiroġa be a naġona kokoagae.* ² Be taudi kokoagae a tavatavana, ta kitana be kokoaga matakedanama yeku waimiditomnama ya rawakui da ġavoe ya naġona. ³ Naumeki da taudi kokoaga nopone a saġana, be Bada Yesu tubuġinama nam dabudine. ⁴ Be taudi uma kauinama awai riu nuababaġe be tautauġoma rabui, adi garama waimatakanikanidima, ai raġantenage da diedie a maġatarana. ⁵ Dabudine waiwaivi a naira kaua

* **24:1:** Uma kokoaginama inam guba nopone.

be noḡodima doḡae ya yovona, be tautauḡoma rabui a riuna, “Aba aubainama taumi banaga yawawayasaninama banaga guriguridima nopodie ko wanewane? ⁶ Tauna nam uma dobudi. Ya midisuḡu munaḡana. Tauna boni taumi mate Galilima be nema ya riuriu bakemina, vutuna ko noḡoti! ⁷ Tauna umanama ya riuna, ‘Mamaitua ya ḡoena da Banaga Natunama banaga gewegewedima nimedie ta boru nawe da korosie ta tuparatuna. Be tauna raḡan wairabuiteḡane e midisuḡu munaḡana.’ ”

⁸ Dabudine waiwaiwi riunama a noḡotina ⁹ be kokoaga a gose pore da a munaḡana apasol 11 be tauwai muriwatana ḡesaudima mate ḡarodie. Be waiwaiwi yaba matabudi tauwai muriwatana a riuedina. ¹⁰ Inam waiwaividima taudi Meri Magdalin, Joana be Meri tauna Jeims tinanama. Taudi be waiwaiwi ḡesaudima mate uma kaudima apasol a riuedina. ¹¹ Be apasol ai noḡotana waiwaiwi adi riuma kabe kaiyovu aubainama, taudi nam ti sumaḡedina. ¹² Dabudine Pita ya midisuḡu, ya manini be kokoagae ya naḡona. Be tauna ya raudune yovo da garaḡa ya kitedina be nam aba ḡesau. Naumeki da ya munaḡana vadae, be ya nuababaḡana aba ya tubuḡa.

Tautauḡoma rabui Emausma a naḡonaḡo be Yesu ya maḡatarana
(Mk 16:12-13)

¹³ Inam raḡaninama tenegine tautauḡoma rabui taudi a naḡonaḡona meagaie, uma meagainama isanama Emaus. Be inam meagaina da Jerusalem na madanima inam 10 kilomita. ¹⁴ Be taudi

ma turana yaba matabudi Jerusalemma a tubu-
tubuḡana awai giugiuedina. ¹⁵ Dabudine taudiḡa
awai giugiu naḡo be Yesu ya tava da taudi mate a
naḡonaḡona. ¹⁶ Be taudi Yesu a kitana be nam ti
kataiena da tauna aitau.

¹⁷ Be Yesu ya riuedina, “Taumi aba kowai
giugiu naḡoe?” Naumeki da taudi ma nuaboyedi
a midi kwasa ¹⁸ be tauḡoma tenaḡa isanama
Kleopas, tauna Yesu ya riuena, “Tamḡa Jerusalem
nopone nam ku kataie da aba a tubuḡa uma
raḡandie?” ¹⁹ Be Yesu ya riuna, “Aba yabedi?”
Be taudi a paribeena, “Yaba matabuna Nasaret
Yesunama ḡarone a tubutubuḡana, vutuna ka
giugiuedina. Tauna peroveta be na giuma be
na voiama matabudi ai rewapana kauana yai
maḡataridina, Mamaitua be banaga matedie.
²⁰ Pirisi adi babadama be tauma ama babadama
ai utaena Rom ḡarodie da korosie a tuparatu be
ya gurina. ²¹ Be tauma kè noḡotana da tauna kabe
Israel damnama ei yawasanidi, be uma kaudima
a tubuḡana yodi raḡan rabuiteḡa a kovina. ²² Be
manaka waiwaivi ḡesaudima ḡaromaie a riuwai
nuababaḡimaina, baninama taudi raḡan tomtom
a naḡona kokoagae ²³ be Yesu tubuḡinama nam
ti banavina. Be taudi a verau munaḡa be a
riuna da anea ḡarodie a maḡatara be a riuna
da Yesu ya yawasanana. ²⁴ Naumeki da tauma
ama banagama ḡesaudima a naḡo kokoagae a
tavana, be aba waiwaivi a riuriuena nama a
kitana. Taudi Yesu nam ti kitana.”

²⁵ Dabudine Yesu taudi ya riuedina, “Taumi
buebuemima. Aba aubainama peroveta a riuri-
una taumi nam koi sumaḡedi? ²⁶ Keriso tauna

uma yabedie ei nuatoitoina muriḡa be e naḡona na neneḡarae.” ²⁷ Be dabudine Yesu peroveta adi giuma girugiruminama poranama nopone, matabudi tauna na kauama a giugiuena, taudi ya giu waibatedina. Tauna Mousis na bukae giu yai karena da peroveta ḡesaudima ḡarodie ya tavana.

²⁸ Be taudi meagai diane a tavatavana raḡanine, Yesu ya voie da kabe i dokadoka. ²⁹ Be taudi a riu vavasāḡena, “Suara ya kovina, kaiteka kupi, tauma mate t̄a miana!” Naumeki da tauna adi vadae ya saḡa be dabudi a miana. ³⁰ Be raḡanine kani aubainama dabudi Yesu buredi ya paḡo, da Mamaitua yai kaiwe, yodibe ya giva da ya utedina. ³¹ Be dabudine taudi matedima ya kaya be Yesu a kataiena, be inam dabudine yai raḡantenaḡe da tauna ya samoana.

³² Inam dabudine taudiḡa ai giugiu be a riuna, “Kwa noḡonoḡoti bo ibewa raḡanine kedae girugirumidima poranama ya giuedi be nuadama kai maika ya karatina.” ³³ Inam raḡaninama tenegine taudi a midisuḡu be a naḡona Jerusalemma apa-sol 11 be ḡesaudima mate ḡarodie. ³⁴ Be taudi raḡanine Jerusalemma vadae a saḡasaḡana, dabudine tauwai muriwatana inam banegidima rabui a riuedina, “Bada riukaua ya midisuḡuna, tauna Saemon ḡarone ya maḡatarana.” ³⁵ Dabudine tautauḡomidima rabui aba kedae ḡarodie ya tubu-tubuḡana tauwai muriwatana ai varidina. Be mate taudi ai varidina da Yesu buredi ya givagivana raḡanine, taudi a kataiena da tauna aitau.

Yesu na tauwai muriwatanama ḡarodie ya

maḡatarana

(*Mt 28:16-20; Mk 16:14-18; Jn 20:19-23; Ap 1:6-8*)

³⁶ Taudi inam kauinama yaḡoro a giugie be Yesu tauna ḡominama poudie ya raumidire be ya riuedina, “Suba ḡaromie e kenana.” ³⁷ Be taudi a ḡosoridi be naira nopodima ya moḡavuna, baninama taudi ai noḡotana kabe ḡaḡarua ti kitakita. ³⁸ Be tauna ya riuedina, “Taumi aba aubainama ko nainaira be nopomima e vovo raḡaraḡa? ³⁹ Nimagu be kaḡaguma ko kitedi be ko kataie da inam taugu. Be ko taukonigu da ko kataiegu da taugu nam ḡaḡarua, baninama ḡaḡarua taudi nam visiḡodi bo turiḡidi taugu maika.” ⁴⁰ Yesu nama ya riuriuna, naumeki da tauna nimana be kaḡanama yai kataidina.

⁴¹ Inam raḡanine taudi nuedima ya vere kua be a mosamosari koena be nam ti sumaḡena. Vutuna aubainama tauna ya riuedina, “Kani ḡaromie e kenakena bo ibewa da taugu ya kani?”

⁴² Be taudi iyana gabugabunama nevanama a utena. ⁴³ Be tauna ya paḡo be matedie ya kanina.

⁴⁴ Dabudine Yesu ya riuedina, “Dokane taugu taumi mate raḡanine be è riuemina da yaba matabudi Mousis na tarawatuma, peroveta be Salamo nopodie a girugirumidina taugu aubaiguma, nama yodi ta tubutubuḡana.”

⁴⁵ Dabudine Yesu taudi noḡota ya sagudi da taudi girugiruminama poranama a noḡoti be a kataiena, ⁴⁶ be ya riuedina, “Girugiruminama porane umanama a girumina: Keriso ei nuatoitoi be raḡan wairabuiteḡane guriguridima nopodie

tauna e midisuḡu munaḡana. ⁴⁷ Be tauna na rewapanae noḡota vitara be noḡota poraḡa dobu matabudi nopodie ta rauguguyedina. Be rauguguya inam Jerusalemma tai karena. ⁴⁸ Be taumi inam kaudima matabudi adi matamatama. ⁴⁹ Taugu Tamaguma aba ya riuriueguna,† tokare yà riuporena taumi ḡaromie. Be taumi Jerusalem meagaina ko miana, naumeki da Mamaitua na rewapanama ko paḡona.”

*Yesu e naḡonaḡona marae
(Mk 16:19-20; Ap 1:9-11)*

⁵⁰ Naumeki da Yesu na tauwai muriwatanama Jerusalem meagaina be yai doka nawedina Betenima. Dabudine tauna nimanama ya kaisuḡudi be na tauwai muriwatanama yai aiainidina. ⁵¹ Be tauna yawai aiainidina maika, Mamaitua tauna ya nawena marae. ⁵² Be tauwai muriwatana tauna a raudunee be nuedima ya vere vavasaḡana, be ma mosaridi a munaḡana Jerusalemma. ⁵³ Be raḡan matabuna taudi tempol nopone a mia be Mamaitua isanama a kaikai suḡusuḡuna.

† **24:49:** Baninama, inam da tauna Arua Babau e riuporena.

Vari Verenama
The New Testament in the Dawawa Language of
Papua New Guinea
Nupela Testamen long tokples Dawawa long Niugini
copyright © 2002 Wycliffe Bible Translators, Inc.

Language: Dawawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 21 Feb 2024 from source files dated 31 Aug 2023
9b8bda32-db42-5be3-9d24-4e4a5d5f65b2